

近代中國史料叢刊續編第二十輯
沈雲龍主編

趙裘萼公（熊詔）賸稿

趙侗數編

文海出版社
有限公司
印行

趙秉豐心贖稿

張鑑白印
歡許書局

Wt235/13

趙襄萼公賸藁目錄

男侗敦謹編

卷第一

奏摺五章

呈一首

賦二首

頌一首

序六首

碑記三首

跋四首

贊七首

論二首

卷第二

行述一首

祭文八首

卷第三

辛酉至戊子詩一百十三首

卷第四

己丑至庚子詩一百九十八首

古今詩文佳刻類多作者手自訂定其閒去留修飾以及魯魚亥豕必勘較無憾而後卽安惟我

先大夫髫年握管治舉子業而外旁及詩古文詩每有所作援筆立就雖不甚點竄而要皆起草日積月累動輒成束辛巳以後隨侍

先恭毅往來楚越間奚囊書篋纍纍如也泊乎供奉

內廷從戎西徼與當代名公冢卿分鑣並駕凡所以詠歌

聖朝之德業紀載山川之土風應接士大夫之慶弔并或序一

事賦一物刻畫風雲草木之奇雕繪鳥獸蟲魚之態有動

於中則時時閒作總計數十年來詩文彙集雖學力不齊

體格屢變然皆一時興會所寄每欲覓一餘閒流覽前後

諸作簡拔而編次之出以問世乃中道捐館遂不暇及而

篋篋所攜多散京邸其家閒故紙又半被六丁收去今

搜括於灰燼之餘羅致於別見之稿竭力薈萃不過存什

一於千百又奚忍隻字捨置以增餘恫耶爰乃略敘年月

概存前後諸作閒有缺譌不補不改釐爲四卷以附

恭毅公贍稿之後雖未克如手訂之無憾而吉光片羽僅見

人間亦庶幾先澤之不盡亡云爾乾隆二年三月上巳不

卷之三十一 月令

肖男侗敦謹識

趙婁萼公牘藁卷第一

男侗敬謹編

奏摺

恭謝 天恩摺

臣被花色參奏一案吏部議覆奉 旨趙熊詔陳璋從寬免交刑部審理著革職解退起居注於伊等原走處效力行走欽此臣聞命感泣如得再生伏念臣一介庸愚茫無知識 皇上養教訓已歷九年今以一言不慎爲同官參劾上負 主恩罪實難追復荷 聖明洞鑒矜憐寬宥仍令効力行走臣之身家性命皆蒙 皇上保全感激有心悚惶無地爲此叩謝 天恩謹奏

直陳迫切下情仰祈 聖明鑒察摺

臣弟趙鳳詔重受 主恩居官不職乃蒙 皇上暫緩典刑差

員前往追贓罪臣得延一日之命皆 聖主弘開再造之仁上年五月中部員關保等至山西省城即將鳳詔所有衣服杯緞等物傾銷變價不及坐贓原數十分之二已開冊報部續又將家人數十口舊衣服器皿書籍等項亦盡入官估變此外實一無所存鳳詔已受三次嚴刑絕而復甦現在獄中抱病親戚僮僕九人共經五十餘夾棍負罪深重雖闔門斃命亦有何辭但鳳詔所坐贓銀內有十三萬五千餘兩俱係猪羊米麪杯緞等物准折懸坐前年山西撫臣蘇克濟題參摘印之時當卽差委道府等官及巡撫家丁兵役同入太原府署搜檢只有現銀八百兩內二百兩係康熙四十一年 聖駕西巡恩賞鳳詔之銀其餘物件盡經點驗眾目共覩部員一到卽取出充贓如別有隱匿財物則鳳詔性命且不可保留之何用況家人疊受刑比

豈肯捨命而爲其主隱瞞今部員明知無
供鳳詔刑上加刑不待伏法必先殞命
色將山西省城內店鋪經紀及寺廟僧
復行查通屬州縣地方合郡驚惶是因
百姓鳳詔罪上加罪更有餘辜我皇
凡臣下私情皆可上達痛念臣幼年喪
一弟早亡僅存兩弟今鳳詔自作之孽
以七十四歲之老臣見此慘狀既不敢
忝列於卿班一年以來寢食俱廢形神
勢迫不得不哀求 聖主之前臣知鳳
實難完納惟本籍江南地方鳳詔尙有
有田二百畝請 敕下江南撫臣清查

皇上矜全免死舉家盡戴 天恩即使罪在不赦來生亦效犬馬冒死陳情伏祈 聖慈垂察爲此激切謹奏

泣謝 天恩摺

臣在肅州八里坤軍前効力走差康熙五十九年十一月二十日甘肅撫臣綽奇接奉撫遠大將軍王諭奉 旨尙書趙申喬於十月二十四日病故伊子趙熊詔令其自己力量星速回京欽此本月二十一日撫臣行文涼甘肅三道轉咨到 臣聞命之下五內摧裂痛不欲生卽於二十二日自備腳力起程星速來京伏念 臣父生前受 恩深重報效未終沒齒遺恨仰荷 聖明俯加優卹又憐 臣父子永訣不得一見 特旨令 臣回京得以料理 臣父身後諸事 皇上曲體下情仁至義盡 洪慈破格感激難言 臣尙未到家先匍匐叩首泣謝 天恩謹奏

叩謝 天恩摺

內閣大學士奏請 欽定 臣父趙申喬謚法欽奉 賜謚恭毅

臣聞 命之下痛心飲泣伏念 臣父生前受 恩深重臣職未

終今身後復蒙 皇上優卹 寵錫榮名流光奕世古云知臣

莫若君 臣父一生立心行事仰邀 聖明洞鑒盡在 欽定兩

字之中九原有知自當感涕至 臣合家兄弟子姪頂戴 主恩

非但力不能報亦且口不能言惟有焚香虔祝 萬壽無疆以

效犬馬之微誠耳爲此叩謝 天恩謹奏

主恩未報臣命垂危伏枕哀鳴謹瀝愚忱摺

臣 草茅下士忝中康熙四十八年第一甲第一名進士蒙 聖

恩高厚獲侍禁近時覲 天顏屢加賞賜又超陞翰林院侍讀

隆恩異數刻骨難忘 臣秉性愚昧自干罪戾幾入囹圄蒙

皇上特爲寬宥保全性命每一念及感泣不能自己臣在肅州
軍前兩次解餉巴爾庫爾冀效手足之勞報圖萬一臣父歿後
大將軍王傳奉 諭旨令臣星速回京臣於臣父未能親視舍
殮幸得扶櫬歸返故土不意臣於七月十七日到家卽患喘嗽
迄今八月十五日未及一月奄奄待盡從此永辭 聖世犬馬
之報願矢來生至臣子侗敦蒙 皇上南巡 欽取修書議敘
知縣幼子仔敦國子監生臣惟囑臣弟戊子科舉人臣鯉詔率
臣二子勉圖報效以繼臣父未盡之志抒微臣欲報之衷臣伏
枕叩首口授臣子侗敦繕摺謹奏

呈

懇甘撫代題爲 君恩高厚已極臣心感激難言籲懇代

題恭謝 天恩事呈

竊熊詔奉 命效力軍前離京幾及萬里父年已近八旬每得家書聞父精神日減氣血益衰熊詔兩奉差委解餉巴爾庫爾長途往返魂夢不寧今年五月回抵肅州始見邸抄父有微臣衰老等事一疏奉 旨卿効力年久清勤自勵簡任司農正資料理著照舊供職不必以老病求罷該部知道欽此又見父有微臣衰病等事一疏奉 旨前以老病求罷已有旨了著在任調理照舊供職該部知道欽此又奉 上諭前日覽戶部尙書趙申喬辭本朕深憐之念其操守到老清廉性雖暴躁爲人樸直年近八旬病勢難料全愈倘一時難保亦未可定趙申喬乃革職留任之官著照陳詵之例復還原職當賠之銀一概寬免內閣將此口傳旨意著速發去令病人早知一天或五內少得安寧服藥調攝即可頤養也欽此熊詔跪誦 溫綸淚隨聲下

旋又接父手信云近日腹瀉稍止但苦足痛難行肌肉消瘦蒙
皇上曲加憐念 恩旨頻頒俱出望外仰仗 聖明洪福調
理可以漸痊恐熊詔聞信焦心手書示慰等語熊詔驚魂始定
感極涕零伏念父子世受 主恩豢養教訓矜恤生成此日身
家性命無一非 皇上之所保全今又憐父老病 天語丁寧
聖心周至卽慈父之愛嬰兒不過如此凡屬臣僚盡爲感泣
況於身荷 隆施雖捐頂踵難報 高深惟有焚香虔祝 萬
壽無疆父子世世生生長爲犬馬以盡力耳查士民感沐 皇
恩亦有據情題達之例熊詔原係 內廷行走之員今遠在軍
前不能面奏下悃謹望 闕叩頭理合呈請代題恭謝 天恩
爲此激切具呈伏懇撫部院查照施行

賦

九龍山賦

毘陵之北有九龍山與黃山孤陳山相接而錫之慧山亦名九龍考諸郡國志及陸羽記皆合二山名雖同然攬勝者多稱慧山蓋慧以泉擅名宸遊駐輦寵以御書是蛟龍而得雲雨也譬諸兩韓翊在前必取作寒食詩人矣因爲之賦曰

維斗宿之分野兮步武蒼龍之後故神龍縱其出沒兮俾山川其挺秀旣蜿蜒而爲六兮復夭矯而爲九錫山之西慧山在焉舊號九龍厥狀云然層巒伏而忽起疊嶂斷而猶連九澗環其下九峯據其巔恍蒼虬之鬪野儼文螭之負天爾其下瞰五湖俯臨眾阜萬頃琉璃一碧軒牖大雷小雷如在左右聳壑昂巖爲龍之首若夫嶺黛橫鋪岡雲斜曳霧鎖峯腰烟籠岫額朝暉

乍迎晚翠欲滴峴參差爲龍之脊迺其梵殿峩峩流觴曲曲
洞號仙人之居坡名孝子之築千葉兮蓮花一池兮錦穀掩映
樓臺爲龍之腹若其倒峽留雲迴峯帶雨落雁字於坡中織魚
梭於澗底拂小塵於千尋掉長虹之萬里如有如無爲龍之尾
至如中嵐蕩鬱危磴嵯嶺叢篁巢翠灌木栖鴉一層兩層兮峻
岫怪石五出六出兮搖曳山花極千態與萬狀爲龍之鱗甲與
爪牙別有石穴淵淵石乳涓涓品由陸子題曰二泉苔封兮古
螿雪濺兮亭軒行行兮白玉筍點點兮珍珠簾金蓮沼中似承
仙掌之露若冰洞口疑探星海之源此又龍之領下珠足以興
雲噴雨於九天者也故其谷連嶂峒麓互舜柯南北延袤有如
龍臥襟環孟堅肘抱秦園縈紆繚繞有如龍蟠蓉湖爲鏡膠山
作屏浮青湧碧有如龍騰雨後垂蘿風前捲籜怒石攢崖有如

龍攬幽澗響冷泉鳴千年松吼萬壑濤奔天籟四起有如龍吟
是皆山中之勝景堪豁目而賞心則有松菊高人菰蘆逸士芳
草王孫芝蘭公子半榻山寮一帆蕭寺於是躡謝公之屐掛阮
子之囊拂荀令之席登庾老之牀泛玉川之椀引右軍之觴投
賀監之金龜解相如之鸕鷀攜大蘇之小團月酌太白之紫瓊
霜眺李丞相之書臺訪湛長史之草堂黃公澗畔啼春鳥秦皇
鳴下咽寒螿蓮荷塘邊浣紗女薜荔坡前鬪草孃掃山眉於裙
袖牽水鏡以縹緗斯卽衡湘九轉之面武夷九曲之岡亦未足
擬乎是鄉者也吁嗟夫此山無靈巖邃洞瀑布建瓴之紀勝亦
無修廊曲檻奇葩異卉之飾觀一經鴻漸品題之後遂使伯仲
中洽頽頽簾谷而擅名吳會之間然亦止伏龍之月旦未增重
乎名山迺以 萬乘來遊六龍翩翩停仙仗駐鳴鑾激 御墨

灑宸翰筆翔蚪紙落雲烟錫爾嘉名界以品泉問山靈之
何幸兮遇飛龍之在天方不愧乎九龍之號兮行恐其乘風雨
而高騫

江天一覽賦

鐵甕之西大江之支洪濤澎湃峻湍漩滲吞吐靈湖瀆瀑千磯
懸崖雲矗斷岸虹飛江名揚子泉號中冷眾峯環遶迅瀆滌滄
其中有金山焉蒼翠萬狀突兀嶙峋烟嵐如畫灑黛浮青岑峯
茈鬱岡巒糾紛含谿藏霧觸石吐雲湧波心而立鵠疑廣眉之
照人山之上寺橫橋欹磴曲檻層城蓮棹藻梲玉舄金楹參
差寶塔上出重霄縹緲琳宮下臨無地臺曰妙高旁開側嶺亭
曰留雲巍峩聳峙裴頭陀之所得金陸茶顛之所品味蘇學士
之玉帶永鎮山門了和尙之禪牀一塵不寄俯瞰江流則穿渠

漫汗平眺長空則極目萬里信江天之一色可一覽而盡矣爾
乃金飈方退玉露猶凝遠天賓雁溟壑搏鵬瑤花飛而積雪水
葉落而堅冰具若此之壯觀宜應候而登臨時值 聖駕南巡
鼓柁中洲鬱鬱蔥蔥若沉若浮潮平麓坦擁護 宸游於是
天子戴翠帽御雲裘駕鳳輦纒龍舟命陽侯以開徑召山靈以
導朝騰千騎而雜遝扈萬乘之驂旂迅翠華之戾止駐警蹕於
山頭俯雕甍凭碧螯陟崇阪籠絕岫岡阜曠其顧盼川澤弘其
盱覲閱天高與地迥真一瞬乎宇宙近而視之若琨林琪樹映
曦暉於瓊圃遠而望之若珠樓玉宇啟金銀之瑞圉飄忽兮若
廣寒清虛之府皎潔兮若白雪陽春之晝超方丈與蓬萊渺天
池與靈鷲至夫漻漻瀨瀚激灑灑潮汐驚浪雷奔駭濤電掣盤渦
谷轉捲瀾岸磧天輪觸而下垂地軸迴而上揭扶桑翔於蛟宮

望舒馳於鼇窟清風起而混漾陰霧蔽而嘘噏海童乍出以閃
爍天吳隱現而髣髴冰夷倚湍以傲睨江妃含顰而睇絕琴高
天矯以凌波岷精垂曜而澄澈介鯨激石兮瀑沫江豚隨風兮
出沒鰓鯨揚鬣兮漂泊駉馬掉尾兮踈蹠月珠含蚌兮爭光冰
晶麗蜃兮炫睫芳薜叢生兮島中水松隱藹兮汀側蘆荻搖漾
兮遠涯蘭茝蔓牽兮潯澤楓垂紅兮極浦梧映碧兮遙隰固靡
境而不矚亦靡景而不挹若乃廣莫不翔五兩輕颺驅舩艇漂
餘艫牙檣錦纜金牛呂梁舳艫連屬桅帆相望運天儲于帝
京輸玉粒於神倉迅如晨霞孤征渺若雲翼飛揚登高而俯見
宛似掠波之鷗鷺而戲水之鴛鴦更有釣艇羅筌漁舟奪鮮罟
罟夾澗罾罾並舩或投綸於鳧渚或結網於鱻淵或飄蓬而銜
艘或中瀨而橫旋爾且鼓蘭橈排畫舫紛紛兮錦標燦燦兮彩

航金鼓喧闐兮乘風波浪旌旗蔽天兮鬪紫流黃勝觀之已極
兮復何羨乎瀟湘於是縱目八荒山水蒼茫丹灤朱滄縈其宅
具區洮滙互其旁白馬射陽供其映帶芙蓉長蕩接其濫觴望
焦光之廬瞻招隱之莊盼羅浮之頂睥崑崙之岡睇黃鶴之峯
矚九龍之障睠乎其左瞬乎其右瞪乎其前瞠乎其後峩峩之
影若接玉壘之雲待收日下之長安不遠星漢之支機可求指
北辰通南宿窮東溘竭西陬識乾坤之浩蕩恍天上以遨遊
天子顧而樂之曰是江天之勝境也不可以無誌時乃潑 御
墨揮神鋒落蝌蚪走蛟龍丹鳳篆紫泥封暢一覽乎空碧爰鐫
石於亭中

頌

擬漢華平頌

元和中華平出郡國按張衡賦曰植華平於春圃固瑞木也王者有德則生其枝俯仰可驗君德之剛柔不儘瑞木且聖物矣與冀莢屈軼可相頡頏眞太平兆也故爲之頌頌曰

眞人繼統禎祥畢呈九州向化萬物咸亨垂裳曰聖靈枝故生非號奇木不比芝英春圃是植厥名華平圃柯皆坦拱幹無傾渾疑蕉葉純似浮苹翹翹而歧其氣向榮芄芄而盛其貌橋衡以占君德惟剛克成岐山之陽梧桐鳳鳴西土壽考棫樸縱橫山榛陽苓美人繫情芳蘅香茵碩士馳聲獨此瑞應海晏河清一人有道四海無兵疇庇靡涯膏雨自盈不才獻頌聊作稱觥序

恭擬朱子全書序

朕萬幾之暇卽於四子六經研精覃思深見治國平天下之理本於誠意正心惟孔子立其教而朱子闡其訓故遍覽儒先諸書尤心好朱子蓋朱子之爲言也凡理氣之流行鬼神之情狀綱常性命之原歷代盛衰治忽之故百家二氏之異同以及天文地理山川草木鳥獸之名象義類與夫禮樂兵農刑政諸大端靡不兼綜條貫探賾抉微本末咸該鉅細畢舉昔人謂孔子集羣聖之大成朱子集諸儒之大成非臆論也今其傳注章句班班具在而其他散見於語類文集遺書數編非廣爲蒐討恐有闕遺朕欲成朱子全書以表章集大成之意初命大學士熊賜履校輯甫屬藁數帙而罷復命李光地踵成之博採類纂每一帙竟卽令進呈親覽編定書成迺鳩工內府刊刻之字畫句音微有譌漏悉加修改校讐必嚴雕鏤必精明所重也朕於是

書手披口誦歷有年所矣因思大道待人而行自堯舜以十六
字傳心禹湯文武遞衍其緒數聖人相與懋建人極主斯道於
上精一執中之統如日中天千五百餘年而不晦皆古之爲帝
王者以身任道之力也迨乎孔孟則道在師儒聖賢既往微言
將絕漢唐諸子無實見道體者有宋真儒輩出倡正學於世遠
言湮之餘而著書立說發蒙振聵先聖之道燦然復明豈非帝
王所不能任者而師儒任之歟然朕觀諸儒所言或近於偏倚
或失之躡駁惟朱子之書粹然一出於大中至正而無復有大
醇小疵之憾且其爲說不徒託諸空言而實可見諸行事朕每
讀其書做其意而行之皆有徵驗信乎孔孟以下一人而已夫
以朱子之言論深切著明如此宜乎聞之者無弗真知篤信如
菽粟布帛之不可離規矩準繩之不可易矣然當時君相不能

行其言而陸九淵王守仁輩後先唱和執主靜良知之說分幟而樹之敵甚且深詆痛毀抑又何也夫亦未嘗備攷其論議學術之源流而見理不真則聞言不信歟程子有言曰天下之學非淺陋固滯則入於佛老之虛無朕縱觀典籍曾亦旁逮佛老見其說自顧一身則有餘施諸天下國家則一無所用而世之學佛老者更失其宗旨襲其膚辭險詖幻誕歸於無忌憚而止是故朱子一生力闢異端窮理躬行總以居敬爲主堯舜曰欽禹曰祗德湯之聖敬文武之敬止敬勝皆是心也朕君臨天下五十餘年於敬之一字頗有體會雖不敢自謂有得於堯舜禹湯文武之道而讀朱子之書益信千古聖賢其道同其心同也遂撮其大要而序之俾天下後世讀是書者咸知所折衷焉

恭擬周易折中序

自羲文周孔數聖人相繼而興易之書始成易之道始備大而三才萬物小而一器一名微而窮理盡性顯而經綸參贊無不包舉乎其中故大傳曰廣大配天地變通配四時又曰變動不居周流六虛此作易者所以爲聖而言易者蓋難乎爲其言也由漢而下田孟費鄭之學出人自爲師家自爲說厥後王弼孔穎達爲之注疏語尤龐雜至於京焦之卦氣衛嵩之元包皆假借乎易而於易相去實遠蓋易之理千變萬化無所不該故人人可竊其緒餘成一家之言亦惟易之理一中而不可過差故後人之詮解愈繁而古聖之心傳愈晦迨宋程子作傳朱子作本義而晦者復明然朱子猶以程傳止言理而不及象數爲未愜故曰易爲卜筮而作離卻象數不得也甚矣言易者之難也朕蚤歲嗜書諸經無不覽誦而最愛讀易常就其本文沉潛玩

索有契於心復博觀羣書旁考眾說凡於易理足相發明者咸擇取而默識之研思不輟已五十餘年大學士李光地深於易學老而不倦每進對之頃朕與之講易輒欣然若聞所未聞因相與商榷稽訂以本義爲宗程傳爲輔更採輯諸家論說之精粹者綴於下其有疏解異同或義蘊未盡者則爲案語以參補之經文十翼次第悉從古本且先之以綱領撮舉作易讀易之大指也附之以啟蒙闡明畫卦揲蓍之本原也益之以附論見天下方圓乘除循環動靜之數無不起於河洛也終之以明義見序卦雜卦之先後錯綜皆有精義存於其閒也書成統計若干卷名之曰周易折中蓋易之爲書以變易交易而成中也者不易簡易之謂也理求其確言軌於正斯簡易而不易矣朕於是編披覽再四晨夕寒暑未嘗少懈數易藁而後定豈敢謂羲

文周孔之祕奧盡乎此哉亦庶幾使天下後世之學易者如射之有鵠如測景之有標準皆視一中以爲歸不至惑於歧趨而誤向焉此則朕之志也夫

重刊夏忠靖公集序

士君子經世之學必其所見者大而後極天下艱鉅非常之事集於其躬可以從容應之而不亂而其發爲言也亦皆本乎至性形諸至情粹然儒者之言不假雕琢而自得乎風人之旨故其人傳其文亦傳夫子曰有德者必有言蓋言者心之聲仁義之人其言藹如也勝代名卿賢相楚產最盛而君臣相得直追都兪喜起之風功名始終無毫髮遺憾者惟夏忠靖劉忠宣兩公有焉忠靖籍湘陰忠宣籍華容地之相去不遠也忠宣在孝廟時軍國大事悉咨議而後行言聽計從得君矣而未及相忠

靖厯事四朝職雖農部實兼九卿之任仁廟時進少保宣宗時復念公春秋高俾輟部務專論道左右則隱然爰立之意也余嘗訪二公遺集不可得嗣得忠宣遺藁於其裔孫學坦孝廉迺鈔本未授梓寥寥不數篇存什一于千百而已旣而湘陰學博詹孝廉以重刊忠靖集請序於余予喜若獲拱璧受而卒讀如見公之爲人因歎公立朝幾四十年器量宏遠而遇事能斷鎮定不撓雖賫育無以奪之蓋其爲國爲民所見者大而不在于區區利害得失閒也公之輔監國治水患大績具載史策弗暇更僕數觀其進言於君將順匡救不爲激直之詞似乎以柔克者然奉命拜西域法王竟長揖不屈及諫北征受命整邊儲尋遣錦衣召還趣行甚急公徐徐俟治粟畢方行至御前極言宜修內治不當勤遠略厯數古今成敗持論侃侃不少變又何其強

哉矯也當是時國家方繁費動以億萬計公盡心理財一切調度無弗給者嘗取天下賦役糧儲之數書小帖置袖中及顧問縷縷條對不失龠黍至其治水東南也有言水退田淤可召民佃耕以益國用者詔問公公以民疲已甚不堪重役亟馳奏之事得寢嗚呼非深識遠謀不爲利害得失所動搖者惡能若是士不可以不弘毅如公者可謂弘與毅兼之矣所著詩文樸而雅莊而溫天真爛熳辭達而止顧其忠君愛國仁民利物之意已洋溢楮墨間有德者之言宜其然也抑公尤篤於孝友母太夫人歿公方坐繫仁宗卽位急出公令視事泣請終喪疏十餘上不允嘗夜哭聲徹廳事間兼食兩俸任其季弟取之不復問每有賜物必捧而泣痛太夫人之不及見也必以分遺兩弟故集中思親寄弟諸詩尤悱惻動人然則公之德被生民功施社

稷不動聲色而措天下於泰山磐石之安皆其天性過人立本以致用者也而士君子有志於不朽之業者本之不立遑問立德立功與立言哉余旣景仰公之爲人而復嘉學博之能網羅舊聞表章先哲也爲書數言於簡端庶幾後之君子覽觀而興起焉

鏡彙序

昔唐太宗曰以鏡爲鑑可照妍媸以人爲鑑可明得失然則鑑於鏡曷若鑑於人哉而以人爲鑑者莫如史蓋上下千百年氣運之升降國家之盛衰君臣政治之美惡與夫人之邪正事之成敗無不呈形肖象於目前一覽而可辨猶明鏡當空萬物羣品紛然雜至而莫之能遁也近世士大夫殫心史學者絕少謙牧先生以勳舊世家被服儒雅篤好典墳其詩文筆墨妙天下

而尤嗜讀史於朱子綱目一書反復披省歷有歲年深得其褒貶勸懲之大旨藉以檢身考道孜孜弗之釋顧恐學者苦其卷帙浩繁茫乎不知畔岸或至於因噎而廢食也爰是循其條貫繫其要領句刪而字節之期於事詳詞簡而仍無挂漏之病錄成若干卷名曰鏡彙先生之意蓋謂以多爲彙不如以精爲彙也譬諸鏡大則其光散而對鏡者目不暇給鏡小則其光聚而千態萬狀不轉瞬而畢見焉庶幾讀是書者開卷有益不患乎掩卷茫然矣書曰辭尚體要孟子曰博學而詳說之將以反說約也是編也要歟約歟其眞明鏡不疲於屢照者歟

秦紫銘窗稿序

胸中有萬卷書筆下無一點塵斯二語蓋相對而實相因者也古人於書無所不讀挹其菁華發爲文章故能吐棄一切自成

杼軸今之學者專攻一經猶不成誦其他間有涉獵亦生吞活剝未嘗融治厭飫於心雖臨文構思而莫爲之用無怪其筆之所至塵滓盈紙瘠者槁項而菜色肥者亦饜饕於糠覈而已安能斟酌飽滿蕩滌埃垢而驅筆下之塵哉吾邑秦子紫銘績學工文鬢序最有聲余違故鄉已久耳其名而未覲其面未覩其文己亥之夏奉命從戎於酒泉秦子亦偕其友至出一編示余乃其歷年所爲制舉業也余受而讀之甫入目卽灑然改觀篝燈卒讀悅而忘倦蓋其天分固高兼以經子史羅列胸中下筆時絡繹奔赴故吐屬純乎卷軸之氣觀其文而其平日之讀書嗜古可想而見矣且風格非一種因年而進研辭鍊句淡而彌腴險而不詭視彼時流俗好挾兔園冊子相誇者若將浼已然今秦子年方壯更能加膏希光以造於大醕無疵之域其所

建昌縣志卷之二
一
詣又止是乎哉或有諷秦子以貶技逢時者余獨以爲不然遇
合有數存焉寧爲不知者所棄毋爲識者所嗤少陵云文章干
古事得失寸心知吾誠有得於心而益精其學則吾之自知既
真天下之大未必其無一知我者相賞於風塵物色之外也奚
以貶技爲

涼莊何參藩母陶太夫人八十壽序

嘗讀小雅四牡之詩曰不遑將母又曰將母來諗古人勞於王
事而思念其親如此其至也夫庭闈之內朝夕周旋鞶韞鞠脰
舉觴上壽身當其境者直尋常視之不自覺其樂一旦經營四
方馳驅萬里瞻望白雲遠違子舍然後歎天倫聚順之爲真樂
而承歡色養爲人生不易得之事也雖然爲子者旣以其母之
身出而事君則國爾忘家亦人臣之分幸而自天佑之使其親

康彊書

海內之

不猶命

有足矣

余與交

療姑諸

尊嫜以

勤且儉

莊報晨

一切微

酒泉指

之在南

失而太夫人郵書慰勉勿以老親分乃心參藩亦奉命惟謹今
太夫人年八十矣設悅之辰正屆重九識者曰九陽節也重剛
而數不窮女而有士行者當之必其德性堅定精神強固有永
錫難老之徵焉他日參藩功成受上賞畫錦而歸更爲母稱百
歲觴其所以報母氏劬勞之恩而仰承 聖天子以孝治天下
之心者固自有在今日將母之思於是乎大慰也已余與參藩
共事戎行不獲登堂而祝特以是言爲壽太夫人聞之當必道
然而進一觴也

碑記

重修東林書院碑記

東林吾道中一赤幟也自龜山先生以道南一脈倡於毘陵講
道城東隅一十八年從游者雲集梁谿之東林於是乎得名厥

後歷宋季元明四百餘年不絕僅如縷弘治中二泉先生起而修復之至萬曆甲辰涇陽先生偕景逸先生輩尋其遺緒而光大焉會吳越士講學其中而東林大振雖然清者濁之仇也正者邪之敵也諸君子既以其絃歌誦讀之身明正誼樹清標則邪濁之小人自羣起而與爲難書院之毀於逆璫也理勢必然固無足怪當魏崔煽焰時海內承望風旨以東林爲眾射之的喙如矢集諸君子幾不獲免曩時絃歌誦讀之場一旦鞠爲茂草及其敗也浮雲盡皎日明諸君子幸而有以自白然老成凋謝先民有存什不得一二僅從殘垣敗瓦中歛噓憑弔曰某堂某室昔日諸君子杖履所優游也某齋某戶昔日諸君子班荆論道處也而今安在也蓋東林之不振亦已久矣意者清流之輩造物亦嫉而忌之耶抑成毀有數一興一廢而不可常耶願

嘗按其本末考其盛衰東林何以崛起於萬厯之季也神廟晚年倦勤世教頹而士習壞諸君子退而藏修兢兢焉持一身以爲之砥也不幸奸人志得而東林摧東林摧而奸人之焰益熾而不可遏迨信王繼統破邪謀擯逆黨而東林之聲氣乃復伸於天下是其一廢一興實爲前明二百六十餘年剝復否泰轉移之一大關然則居今日而圖修復者非有名公鉅儒與昔日諸君子臭味相孚而又適當夫正學昌明之會孰能微顯闡幽振遺風於將墜乎潛庵湯公以閣學來撫吾吳毅然以修舉廢墜爲已任至梁谿訪東林遺址因鳩工復其舊迺堂迺構不崇朝而告成凡龜山以下諸君子皆尸視其中歲時俎豆不絕邑之人遊其地者瞻拜之下肅然改容曰是殆公之藉以教我郡人者歟噫公之意念深矣夫東林之在當日議論不無偏激氣

節不無過高然謂之非中行則可謂之非狂狷則不可江河日下賴此數君子爲之維持其廉頑立懦之功誠不在夷惠下公之意其在斯乎公固中州鉅儒也潛心理學有年其於道南一脈蓋有深契焉斯役也所補於世道人心豈淺鮮哉今中丞宋公繼撫我邦益力表章其事公與湯公固同郡人輝映後先若合符節於是三吳之士交口稱之曰東林諸賢得二公而益彰也或曰二公之嘉績藉東林而益傳也子獨以爲不然夫闡揚名教以維風善俗者大臣之職也崇尚實學振興儒術俾臣下得以承流而宣化者 聖天子之德也假使黨人有碑南北部有議則賢士大夫且引嫌避咎不敢與李范齊名矣而何有於東林敬以質之公公曰懿哉斯言遂書而鑱諸石

恭擬重修西頂廣仁宮碑記

天地之大德曰生在四時爲春在四德爲仁大易曰元者善之長也君子體仁足以長人自古帝王茂對育物使四海之大萬民之眾以及昆蟲草木之細各遂其生者無非體天地好生之德推而廣之以流澤於無窮也然易之繫辭言乾大生坤廣生則是生物之功天始之而地更廣之蓋坤者母道也母道主慈其於生物尤近是故崇祀報功之典必以子惠吾民者爲重焉京城西直門外有西頂舊建碧霞元君宮西山環翠玉泉映碧林木蒼萃烟靄縱橫固郊畿一勝境也元君初號天妃宋宣和間始著靈異厥後禦災捍患奇蹟屢彰下迄元明代加封號因是都人多爲立廟請祈報賽之禮歲時勿絕而西頂其一也廟久漸圯檁桷弗整墁堊弗新其謂安神何歲在戊子發帑金命有司鳩工重葺之帑一載而落成棟宇穹然垣墉翼然殿寢秩

然丹腹燦然瞻拜其下者虔肅有加焉朕於萬幾之暇亦往展禮爲 聖母祝釐爲蒼生徼福迺顏其額曰廣仁宮羣臣請立石以紀之朕思仁之爲道大矣擴之可放六合約之止在一心先儒論仁謂心如穀種其生之性卽爲仁故物物而有仁則生生而不已天地之生物父母之生子皆是道也朕君臨天下日以養育羣生爲念俾穉者得以長壯者得以樂老者得以安期於生齒殷繁兵刑寢息民無天札物無疵癘總以一仁推之而有餘今獨於茲廟曰廣仁者蓋以元君之爲神有母道焉母道莫大於坤惟元君其佐坤之厚德以廣其仁庶足以食報永世云

巴爾庫爾關廟碑記

巴爾庫爾關聖帝君廟迺靖逆將軍吏部尙書富公駐兵時所

創建也易之彖傳曰聖人以神道設教而天下服蓋神之爲道
卽人心之靈爲之聖人設教不過因乎人心之所同然而動乎
其所不得不然是以下觀而化也今 聖天子仁壽合天覆育
萬類中外一家遐方絕徼罔有不庭蠢茲小醜阿喇布坦恃遠
背德侵陵外藩 天子軫念遠人皆吾赤子不忍聽其自相戕
虐遂命公統領滿漢蒙古諸軍駐於巴爾庫爾聲罪致討將士
人人自奮欲殲此而朝食 天子復不忍遽加翦薙姑緩師以
俟其悔罪來歸數年以來土馬之雄甲兵之盛芻茭糗糧之廣
饒豈有待於神力之佑助哉然而 天戈所指萬靈呵護神人
協應幽顯同揆况關聖帝君忠義大節炳天日而貫古今當此
小醜遊魂大師雲集之地有不日鑿在茲而輔相 皇威者乎
爰就諸營適中爽塏之區爲帝君立廟章服儀衛森嚴具備凡

歲時朔望公必率將士而拜謁焉夫普天之下方隅之鄉無不
虔奉帝君廟食其土雖愚夫庸豎聞帝君之名則肅然起畏見
帝君之像則悚然改容皆由忠義之氣有以感之使然也今流
沙荒漠廟貌巋然爲從來所未有諸將士往來瞻禮仰帝君赫
奕千秋之靈益服 天子懷柔百神之德由是眾一乃心人百
其勇不啻冥冥中潛驅而默翼之至於西域遠夷重譯通貢過
而見之者其震懾惕息更可知也此固人心之所同然而又出
於不得不然者揆之聖人神道設教之意殆有合歟是役也經
始於康熙五十七年之某月落成於某月門殿樓廡暨茨丹堊
不踰時而畢舉斯卽軍心鼓舞窮寇殄滅之徵也 某董事戎行
目擊其盛承公之命謹爲文記之以示後云

跋

跋郭于宮隨侍集

秋云暮矣朔塞棲遲月彩流天霜華滿地風鳴紙罅蛩叫籬根
茫茫百端誰與消遣適于宮郭子手塞外近著一編相示諷詠
數過悠然殆移我情觀其託物寄興因事感懷以兀稟卓犖之
才而自得乎清曠夷猶之致非所謂灑氣發清響剛健含婀娜
者耶余尤愛其踏生雲白處人淡葉紅時到館見紅燭懷人當
素秋等句不減辭司隸人歸雁後思發花前也謝君佳句爲我
排愁因書數語以識之

跋肯齋額後

貞巖林老先生爲晉江望族曩與余同官京師稔知封君禹城
公以純孝著稱保世克家詒謀甚裕貞巖紹庭惟謹以故治事
郎曹出守廬陵歷有政績嗣以讀禮言歸於霞陽中葺一精舍

自顏曰肯齋蓋取若考作室厥子堂構之意也余奉命從軍
酒泉貞巖亦至復共事戎行晨夕相遇敘及構齋之事且屬爲
書額余美其一居處不敢忘親善繼善述已見乎此因樂書之
并綴數語於後以表其志之所存云

跋友人手鈔孝經後

昔孝經成而虹玉降甚矣孝之可以動天地通神明也夫子自
言行在孝經先儒云世間極繁難事自聖賢爲之則無難所最
難者一孝耳蓋孝無成轍亦無盡境日用行習之間眞有他人
不及知而已獨知之者經文具在人人可體認而得也寫是經
者手鈔目覽口誦心維永言孝思念茲在茲可謂有心人哉

郵書彪弟入泮文尾

兩義並有結構筆鋒亦銛利無前杆軸予懷眞覺行文爲樂事

也吾叔父視學山左齋鹽不給扶病衡文盡瘁蚤世迄今忽忽逾三年矣緬想音容愴然如昨諸弟藐孤頗知努力自振以續書香余年來滯迹京師時復寓書戒勉以仲弟未獲一衿尤諄諄致勸焉比者扈從塞垣接吾大人手諭云汝彪弟已得入泮可慰汝叔之靈弟亦鈔其試文示余捧讀色喜旣而念學使者宮諭先生向與叔父爲同年性命交道義相敦一介不苟叔父在山左時先生一無所請託客冬奉命莅吾鄉余亦絕不敢干以私然吾弟卒未嘗不受知於先生也余旣服先生之公明而又痛吾叔父與先生舊日之交誼如此乃先生今日賞拔其遺孤而竟不及見矣因揮淚志其文尾郵以示之

贊

觀世音像贊

色相皆空何名爲觀聲聞俱寂何名爲音以大慈悲發大聰明
大千世界悉見悉聞救眾生難現說法身楊枝甘露蒲團寶瓔
千變萬化一菩提心不觀是觀無音是音是名爲觀世音

諸羅漢像贊

繡出枯禪活現真圖直豎拄杖做甚工夫鍼鋒對著一字也無
試問拄杖是甚麼答不來固錯答得來也錯丟開拄杖頭頭是
路

布袋和尚稀奇笑口終日嘻嘻天生偌大肚皮有甚不合時宜
袋中空洞無物納著芥子須彌看恁干鍼百縷剎那現出菩提
卻是袒肩露胸半身不掛一絲

猛獸易伏猿馬難降佛子無心無意跨背橫衝直撞甚麼是猿
甚麼是馬空山霹靂一聲萬緣一齊放下

手拈拂子只弄獅子置下獅子有甚宗旨不如豎卻一指萬法歸根都是

小畜猙獰搖耳豎尾像個貓兒像個狗子纔著擬議一口咬死滿堂糟漢癡呆老僧一棒在此要去便去回頭只爭些子昭昭乎龍之爲靈老僧視之如蠅蚋無欲者能制有欲忘形者能藏幻形倒出淨瓶甘露鱗爪拏攫風腥究竟真龍歸甚處雲在青天水在瓶

論

黃鍾萬事根本論

天下之事必先有本而後有末一事各有一本而萬事又其有一本索諸形象則滯求諸幽渺則虛惟深明理數者溯流窮源因端竟委要不外聲氣之元而得之知此而可以論京房所云

黃鍾萬事根本之說矣夫數始於一終於十而成于三易言天地生成之數自一至十而河圖則五與十並居中宮十無專位洛書則戴九履一其數卽止於九蓋九者以三乘三之數也黃鍾之長九寸殆本於河洛之相爲經緯者乎由是下生者三分損一上生者三分益一黃鍾生林鍾至仲呂復生黃鍾而十二律具焉凡高下清濁之節皆可於九寸之管次第推之此審樂之根本也仲冬之月律中黃鍾而歷家以十一月甲子朔旦冬至爲歷元故先儒云律元得而歷元可正此造歷之根本也且以九十分黃鍾之長一爲一分遞而十之爲寸爲尺爲丈爲引而長短可度矣黃鍾之管容子穀秬黍中者一千二百以爲龠遞而十之爲合爲升爲斗爲斛而多寡可量矣黃鍾之龠所容千二百黍重十二銖倍之爲兩十六兩爲斤三十斤爲鈞四鈞

爲石而輕重可權矣更廣而言之唐虞之九官禹貢之九州成周之九服九賦亦黃鍾之九數也然則黃鍾爲萬事根本誠數之自然卽理之一定者哉蓋黃鍾者聲之元也五聲以宮爲君黃鍾屬宮而臣民事物胥統於一聲黃鍾者又氣之元也二十四氣並開於子黃鍾屬子而生長收藏胥備於一氣譬如草木之有根本焉其始生也甚微漸而句萌甲坼漸而華實暢茂生生不窮莫可限量也是故黃鍾於五行則爲土土能生物在六十四卦則爲復一陽始生之卦也明乎天地生生之道其於黃鍾根本之說自心悟而神解矣

先天後天論

易卦有先後天之不同何也曰不同者其位而同者其理與數也先天之爲乾兌離震巽坎艮坤以對待之體言之也後天之

爲乾坎艮震巽離坤兌以流行之用言之也此其位之不同者也若夫先天乾位乎南而巽與兌離三陰卦居其左右坤位乎北而震與坎艮三陽卦列其東西以明陰陽有交錯之義後天則自東南以至西巽離兌之三女從乎坤自西北以至東坎艮震之三男從乎乾以明陰陽有一定之分然乾坤兼統乎六子男以代父而匪母則不育女以代母而匪父則不生是定分者未始不交錯也先天由震之一陽歷離兌之二陽以至於乾由巽之一陰歷坎艮之二陰以至於坤見陰陽皆始微而終盛有並行不悖之功後天則由震至坤爲春夏之生長以震之一陽始由兌至艮爲秋冬之斂藏以艮之一陽終見萬物所成終而成始有一氣貫通之妙然陰陽消長於剝復復爲陽生卽始於震之一陽剝爲陰盛仍終於艮之一陽是並行者未始非一氣

也此其理之同者也至於先後天相易之數亦有可言者乾坤之易爲離坎則乾坤互交而並易其中也離坎之易爲震兌亦離坎互交而各易其上下也四正之卦皆變其一畫耳先天之巽易以震之上二畫而爲後天之坤先天之艮易以兌之下二畫而爲後天之乾先天之兌反之卽爲後天之巽亦取於艮之上下兩畫也先天之震反之卽爲後天之艮亦取於巽之上下兩畫也四維之卦各易其兩畫存其一而不變焉孰非就先天之對待者而交易之乎此又其數之可推而知者也蓋伏羲之八卦以陰陽相配而成位乃化工自然之象是謂先天而天弗違文王之八卦以奇偶錯綜而就列乃歲功迭運之序是謂後天而奉天時先聖後聖其揆一而已矣說者又謂艮旣易兌之二畫而爲乾則兌何不易艮之二畫而爲坤乎巽旣易震之二

畫而爲坤則震何不易巽之二畫而爲乾乎夫後天之必以乾居西北坤位西南其理與數自有確然而不可移者邵子得其圖而未洩其義朱子於說卦亦未之詳苟非大聖人者心涵河洛之祕道契羲文之傳豈能闡其精微而發其神妙也哉

趙裘萼公賡藁卷第一

浙江書局刊

張大昌校

姚煥校

張景雲校

趙襄萼公贍藁卷第二

男侗敦謹編

行述

先考戶部尙書諡恭毅松伍府君暨先妣龔夫人行述

嗚呼天乎天之待府君者素厚何至今日而忍施慘酷乎縱不孝熊詔螻蟻微軀不足以代父之命獨不可以一家子姓台減數十年之算爲府君少假數年俾不孝侍一日湯藥跪受彌留一言捧手足視含襚以安府君之魄猶得比於子數耶今何使我至於此極也府君年垂八十以身報國以勞盡忠以死勤事病起未久日進官署治文書歸而委頓倦卧兩晝夜奄忽以終時惟不孝鯉詔暨兩孫在側不孝熊詔方奉命從軍酒泉見府君再疏乞罷略陳病狀心膽墮地然亦夢不到此事莫大於送死痛莫甚於傷心名教之罪人直無所容於天地之間惟

有一慟而絕，遂從府君九泉。訢兩載別離之慘，敘萬里馳驅之苦，夜臺絮語，繞膝相依，差可塞恨耳。更何以生爲哉？迺荷 聖明軫恤，特召奔喪，感激 君恩，勉延殘喘。因念府君一生自少至耄，立心制行，竭力致身，諸大節海內無貴賤賢愚皆能道之，而不託於當代之文章，以附史乘，而垂無窮，則不孝死有餘責。用是草土衰經，中與不孝鯉，詔日相嚮，號哭已輒，各憶見聞，濡血和墨，粗述梗槩，以備名卿鉅儒采擇焉。府君諱申喬，字慎旃，松伍其號也。趙氏支裔，本宋魏王德昭傳十四世孫，爲叔珍公子，貧依外家，始遷常郡西鄉之觀莊，以農業自振。叔珍三傳至南沙公，思賢世寔，以昌南沙生西溪公，鑑西溪生復溪公，綱復溪生見瀾公，珊見瀾生元台公，名臣以府君遇。覃恩贈資政大夫都察院左都御史配高氏，贈夫人是爲府君祖考妣。

也生丈夫子四先王父贈資政大夫都察院左都御史止安公
繼鼎行第三自始遷祖叔珍公而下至先王父始以儒術顯中
前明崇禎丙子舉人庚辰進士授湖廣公安令三院合薦治行
爲楚省第一因入覲遷兵部車駕司主政卽奔元台公喪歸杜
門不出元配前王母贈夫人白氏卒於公安官署生四子皆歿
殤繼配王母贈夫人白氏卽前王母嗣妹也生府君之日嚮晨
紅光滿室俄而分娩眾咸異焉甫五齡族難蠶起先王父變姓
名渡江而北以推命賣卜爲業族讐因壞我邱壟燬我廬舍府
君日夜號泣不止幸直指趨正張公慎學廉其狀諭邑令敦請
回籍府君聞先王父歸未及里門卽踴躍令人抱持登舟執手
號哭蓋其天性純孝自幼已然也先王父罹難後歲歲授徒以
餬八口毅然以師道爲己任自稱江南老教書府君隨侍館中

父子如師徒十一歲作嘗獨立兩節題文結云於此見夫子爲人父之甚慈凡天下之爲父者視諸此於此見伯魚爲人子之甚孝凡天下之爲子者視諸此先王父批文尾云說到慈孝是大道理亦見心術之正固蚤期爲大受矣歲辛丑江陵念蒿胡先生在恪視學江左府君應童子試以五經七藝拔冠一郡壬寅食餼娶吾母龔夫人合卺未彌月卽隨先王父宿館中晝夜勤讀嘗下帷郊外僧寺寺多孤客遺棺年久朽壞每至夜分青燐滿室府君心惻爲擇寺後隙地瘞埋堆塚若干併立標識以待伊親領回己酉讀書祖居之觀莊先王父手授先正程墨藏本丹黃評隲曰此正宗法派也府君奉爲典型研精覃思簡練揣摩臨場構藝幾於句無泛設字無虛下一洗時俗庸濫之習及錄遺兩試無名最後始得見收距場期僅一日耳旣入試二

場甫脫稿忽有墨痕污卷頁以管刮之而蹟愈露是科貼例甚嚴府君自分不免因念先王父春秋高奈何不自慎預致擯落以重傷親意遂於燭下割題紙爲誓文數百言焚禱於神終卷而出榜發捷音至府君追憶前事大哭不止不孝時方七歲目覩情景至今宛然如昨卷出闔中朱含英先生維高之門而座主則交河蘇次公先生銓東莞祁如松先生文友也庚戌捷南宮總裁爲柏鄉相國魏先生合肥芝麓龔先生海豐冰壺王先生高平沛蒼田先生本房爲揭陽楊大山先生鍾岳諸先生初閱府君卷皆以爲必老年名宿泊相見知尙未及壯輒驚喜嘉歎先王父喜步武有人半生沈結幽憂之思亦稍釋而家貧不能具菽水硯田外無可以爲生者府君爲諸生時嘗館於皖江釋褐後主人固邀仍復就館歲得脩脯封識不啟盡遺王父母

爲饗殮助癸丑有事濠梁過關山忽心動謁關廟占籤復不吉
乃亟歸而先王父已疾作延醫日進參藥卒不瘳遵遺命三七
而葬拮据棺衾經營窶窶艱苦萬狀越一載而吾母龔夫人又
復捐閭府君義重糟糠誓不再娶兩遭喪變意興蕭索嗚聲在
廬淚痕在枕三年不少輟辛酉筮仕商邱時白太夫人在養奉
板輿以迎先意承歡婉容愉色邑最煩劇隻手治官書不資幕
客嘗徹曙不寐晨出視事端坐堂皇者竟日斷決如流有投牒
者一經訊問數年後見之猶能指其姓名人咸以張睢陽爲比
邑素多盜因嚴行保甲法如有匪類令鄉耆各行指報訊得實
則重懲不貸盜遂斂跡邑中糧地徵收恆患版籍不清有虛糧
而無田者有實田而無糧者迺於推收時每戶給照單一紙令
填寫田畝四址及完糧里甲隱匿者許其自首而虛糧盡與豁

除編號鈐印付民執業後有買賣單隨契轉糧地由此一清康熙二十二年歲饑各縣煮振多鶩虛名府君獨親臨檢視遠者給米糧近者施糜粥鄰民趨赴日增倍蕪僉云吾邑散振若得如此盡沾實惠寧忍遠離鄉井耶府君爲之憮然捐俸募資購米接濟猶苦不贍署有數縑都變賣充用所全活者甚眾窮鄉嫠婦青年矢節白首完貞舉報無人多致湮沒府君諄諭諸生采訪一生流涕不止自言其母早寡苦節家貧無力表揚今聞鈞諭不禁傷感府君卽令諸生核報在任數年凡節婦合例者概請題旌樹坊府君有事出過綽楔下輒展拜以示風勵至以人命控者卽單騎相驗若係自盡立時斷結以免拖累某村離城數十里有民家子被誰何所殺薄暮來控鐘定後策馬出城至村方四鼓憩古廟中俟天明相驗適見隣屋僻處有一血褲

元三卷之月三卷一
拘訊卽得眞凶人咸以爲神先數日廟祝夢神云某夜有文曲
星到此吾當退避是夕府君至適符其夢鄉民有患瘧者用紅
箋書本縣趙公在此瘧遂已至今猶驗丙寅夏行取入都以部
員用戊辰春授刑部主事未數月聞白太夫人訃徒跣南奔盡
哀盡禮終制尙茹素不輟也壬申冬再補西曹以廉辦著稱楚
中有命案讞辭多文致例應駁減滿大司寇不可府君侃侃據
律力爭卒得減等甲戌春陞副郎未一月卽以怔忡疾乞假滿
大司寇深致惜焉里居七載讀書課孫不輕謁當事邑中官吏
有因公舞弊病民者則指陳利弊娓娓數千言不少假當事屏
息欽服庚辰冬奉 特旨召見辛巳赴 闕超授浙江布政使
陞辭面奏 臣 受 恩非常自當竭誠報效倘有不法求 皇
上加等治罪并奏求 宸翰俾得朝夕瞻仰如對 天顏 上

云且看汝一年之後隨策蹇出國門由家之任受事三日卽具
詳兩院請革南糧口袋查浙省南糧月給旗營官兵關領每石
兵則歲索一口袋旗員則每次索一口袋卽不及一石者亦如
之派取民間每袋折收錢四十文省倉歲收米九萬六千七百
石卽派收口袋十萬有奇約費銀四千兩民力幾何堪此駁削
請照京倉例令官兵各自備口袋關領兩院隨移將軍罷之自
是南糧口袋之派累始除又州縣解餉兌收時筭庫請示兌法
府君厲聲曰銀百卽兌百何問爲自是藩庫之加平始革又檄
告通屬謂欲清州縣虧空先革藩司陋規若錢糧加平若餽送
禮節若兵餉掛發若奏銷部費若委署夤緣若南糧徵收所有
陋規盡革除之以免民間派累又詳請給發外營兵餉銀米舊
例解府轉發今令悉歸本州縣支給不必再解以滋需擾又詳

請均山陰縣坊鄉田畝一例當差以絕徭役偏枯又司庫有府
解戶役款項爲解部本色物料貼費歲支不及什之四五存者
卽歸藩橐名曰羨餘府君則毫毛無所動將授代命主者核籍
竟存二千餘金令封識貯庫留交新司曰吾上年奏銷未用一
錢繼我者勢必不能得此足辦今歲事矣毋再擾民爲也吾家
距杭甚近府君每於家人往來輒令攜米十數斛抵署備用或
誚府君曰公清風峻節固迥出羣表然位致方伯而饗殮仍取
給故鄉毋乃有平津布被之嫌乎府君曰君言良是但吾之爲
此者實以寥寥數口挈之偕來薄田所出正供而外無所用與
其貲吾家曷若供吾署取諸田省諸市譬如販粟來杭獲價而
歸不亦可乎且吾不欲以口食累吾民也言者歎服大堂揭一
聯云 君不可負只是心難負負心者不容於堯舜天不可欺

誰謂人易欺欺人者如見其肺肝嘗誠曹掾曰吾無幕客一切
案牘皆吾手理汝曹若相欺能保事事不敗乎掾頓首言掾雖
賤亦有天良如公者掾固不敢欺實亦不忍欺言已泣下府君
爲之動容壬午春遷本省巡撫襟被一肩書卷數篋依然泔浙
時也 上賜御書崔子玉座右銘恭摹勒石建亭供奉時瞻誦
以自警是秋錢塘江潮迅猛隄岸坍塌日甚府君迺齋戒三日
虔設牲醴自撰祝文率僚吏將士赴江干祭告時潮甫至風狂
浪激溢湧如射觀者踉蹌奔避府君獨朝服屹立不動潮乃距
祭所丈餘忽止若有所限者官民環觀駭異府君因與江神約
願假數旬以畢興築嗣後潮汐遂不逼塘先是府君任藩司時
見城臨大江潮汛洶湧直逼塘根石者傾缺土者衝噴勢甚險
迫力言於撫軍繪圖題請興築部議準借歲修銀應用府君復

葦穰司庫閒欸悉構工料將盡易土以石并築子塘以護其基
而水發江漲畚鍤莫展至是得以及時施工越七旬塘成而潮
始至江神爲宋進士陳賢浙之皞人也府君後任偏撫時題請
封祀焉歲當大比疏請增廣解額格於部議 特旨允行監臨
文闈內外肅然無敢以身試法者及主試武闈亦然十月奉
命會審湖南鎮筵紅苗一案事竣遂調撫偏沅癸未春 皇上
閱視河工府君疏請 陛見因馳赴 行在白淮至蘇屢覲
天顏蒙 賜御書督撫箴暨綬輯撫安扁額又以湖南積習相
仍私徵無藝 特頒坐名 諭旨力減加耗盡革私徵如有藐
法害民者聽爾糾參治罪并 面諭云汝勉力做去府君至長
沙通飭各屬恭奉 上諭建亭勒石萬姓歡呼官吏屏息湖南
積習橫行私派重收火耗正供外巧設輓擡硬馳公費腳價諸

名目有每糧一石加派四五錢至二三兩不等者有借稱公務
逐事私派一年之內難以計數者至花戶完納條編重戥秤收
又每兩加耗二三錢不等府君遵 旨嚴行禁飭寬其既往許
以自新又念州縣私派重耗之由一迫於上司之需索一惑於
姦棍之逢迎遂爾罔顧名節甘蹈法網乃矢心刻勵以身表率
咨明兵部止留標下隨丁糧二十名歲得餉銀二百兩米七十
二石爲日給之需其官商一切規例餽遺毫不收受因酌減司
道府州之交際以清吏治嚴革地總歇保之包攬以塞貪源屬
員中有操守清廉辦事勤慎者則薦揚不遺餘力如衡永郴道
張公仕可藍山令楊公宗仁桂陽牧伍公士琪皆膺卓選衡永
郴道王公朝恩以僉事題授臬司薦贖已上不使之知也若貪
污敗檢如安化令之多收火耗岳州衛之私用重法署湘潭令

之見事婪贓黔陽令之違禁雜派則立登白簡不少姑容八年於楚上行下效大法小廉積習盡除民歌樂利至驛鹽糧道衙門叢弊尤加釐剔有驛州縣本地實徵銀兩不令坐支必俟解道赴領從中勒扣又買補倒馬銀兩不卽給發必俟再三守候多方需索府君因嚴飭該道將各驛所需夫料銀兩先儘本地坐支外有不敷亦徑赴各州縣支驛站協濟止令按季詳報其倒馬銀兩隨倒隨支買補不必解領於是各驛之苦累始除漕糧向例州縣僉派里民包收包解又藉稱折銀赴岳買米多勒重價而糧道兌漕則有篩颺樣米修倉填單挿籌畫會裝艙鋪艙開鑼穩跳船規腳價花紅酒禮諸名色恣意魚肉府君條示禁革并當堂較發制斛令州縣官收官解於是里民之派累始除湖南例食淮鹽運腳既重而自院道以及州縣鹽規又恣行

需索以致商無忌憚高擡價值府君過武昌卽傳集各商面諭各衙門陋規盡行革除并檄行司道酌定衡永寶三府鹽價總照長沙時價低昂外加腳價鹽租務照淮揚解包勛數不得任意抽減於是商知畏法民不淡食南秋米石例於七月開徵而撥供制營月米則又應按月關支故春夏二季兵米州縣每多預徵以應青黃不接民苦輸將府君查湖南長衡岳寶靖五府州應徵南秋二米一十三萬有零而湖南二十三標鎮協營止需月米七萬有奇餘米六萬則解貯道庫以俟變價充餉若將貯庫充餉米石撥給春夏二季兵糧其秋冬二季就於七月新徵內支給每年除現給本年秋冬二季外卽留充下年春夏二季兵米可免預徵疏三上得旨俞允於是兵有鼓腹之樂民無剗肉之虞科臣條奏漕糧抵通多有掛欠嗣後耗贈漕截銀

米暫存道庫俟回空時倉場查明掛欠行知扣抵如交納無欠方許照數支給已經部議題準府君念湖南運道遠於江浙而漕截漕贈惟江浙爲獨有若湖南則僅藉二耗以資飛輓今併扣存徒以五十兩四錢之行月厯江湖涉淮黃越數千里以達京師窮丁卽有急公之心重運終鮮神輸之術束手坐視必致誤漕迫令開幫豈能枵腹因將二耗照舊給發責令旗丁尅日開幫具疏上聞奉 旨這耗贈米石若不預行支給旗丁必至困苦卽無掛欠回省或有不肖官員不給旗丁侵蝕入己亦未可定趙申喬將耗贈米石預給旗丁甚是爾部照戴璠條陳議奏不合這事仍照舊例行欽此湖南學校冒濫成風文武諸生每多鬼接頭飛過海及附案諸名色而學政考校又多優劣不分徇情濫取并任聽經承沈攔紅案招搖舞弊添換姓名倒提

等第府君不避嫌怨糾參釐革庠序肅清至教職例在本省銓
選湖廣南北省延袤數千里中隔洞庭若以南而選北以北而
選南途路既遙風波復險或苦於盤費而力難赴任或渡湖阻
滯而憑限多違府君因爲題請將嗣後歲貢候補教職畫分南
北選授奉 旨俞允著爲定例而寒儒老生得免險阻跋涉矣
府君素重名節每於政治之暇留心采訪遇有前代理學忠義
諸先正墳墓祠宇傾頽者必竭力設法修葺如屈賈祠宋眞西
山祠李忠節公芾祠鄒忠公道鄉祠趙忠定公汝愚祠明蔡忠
烈公道憲周公二南二忠祠劉忠毅公熙祚祠陳忠潔公純德
祠多爲居民侵踞春秋失祭府君令有司勘實清釐舊址復祠
崇祀而於蔡公更爲理其田表其墓以志嚮往焉至各屬舉報
節婦飭令州縣通報文到立批司詳覆隨到隨題復爲題請建

坊銀兩照舊於師生空缺俸廩內支給奉 旨俞允至今遵行
不替康熙四十二年府君奉 命勦撫鎮筸紅苗會同 欽差
督提懸軍深入親歷苗寨宣布 朝廷威德且撫且勦一夕行
營從者纔二十餘人在巉巖密箐中忽聞礮聲沸起則頑苗弄
兵鳴鑼已達制府帳前各營惶駭俱策馬疾馳府君獨屹然不
動攬轡徐行勒兵彈壓苗乃懾服振旅而還丁酉冬蒙 皇上
面加嘉獎具見 聖聰之無微弗徹也至被朱閣學誣參又被
俞提督訐奏幾罹不測俱荷格外 殊恩曲賜保全府君每一
言及輒感泣不能自己戊子春 上閱視溜淮套工程 巡幸
江南府君馳赴清江浦迎 駕 皇上下詢湖南吏治民情府
君一一奏對 天顏溫霽恩賜有加 頒賞哈密瓜葡萄榛松
瓜條乳餅羊二隻併 賜綠松寶鏡一方玻璃眼鏡一匣令回

原任辛卯正月蒙 恩陞補都察院左都御史屬吏見府君清風兩袖幾不克備行李彙送贐儀以供芻秣府君堅卻之仍策蹇入都門蕭然襤被雖單寒儒素不是過也啟行之日士民攀留不遂皆執香號慟自長至岳數百里叩送不絕州縣多建祠設位以祝長生又搜輯在任奏章咨移批詳牌示共六卷刻之名曰趙公實政錄以志不忘云府君任總憲職司風紀砥節奉公不敢營私而植黨不務搏擊以沽名韜仰體 皇上如傷念切廣求民瘼苟有便民之處輒見章奏以廣 皇仁屢蒙 俞允檢有 聖世施恩已極一疏查康熙五十年奉天應徵米豆部議蠲免至臺灣應蠲穀石奉 旨已經徵完在宮雖蠲免與小民無益將五十一年穀石著行蠲免等因欽遵在案請將潼關衛與大同府五十一年未免米豆草束懇賜與奉天一例恩

蠲倘或已徵在官亦懇照臺灣例準於下年蠲免部覆無庸議
奉旨潼關衛大同府所屬五十一年應徵米豆草束既已徵
完今雖蠲免亦無益於小民明年應徵米豆草束着蠲免欽此
又有恭逢萬壽昌期謹推三年蠲免錢糧之例請免官地房
租以廣皇仁事一疏得蒙俞可列入康熙五十二年三月
十八日恩詔欵內辛卯秋典試京闈壬辰充會試總裁皆藝
香設誓藉神明以佐國法評隲每逾午夜繙繹或達晨曦經藝
與書藝兼衡後場與前場並重諸經房遺卷有佳者搜羅無失
殫精疲神以至手皸目眇不自恤也三月十一日府君尙在禮
闈特賜硯一方是年冬九卿面奏江南督撫互參一案上
論及天下清官因云趙申喬任偏沅巡撫時居官甚清但有性
氣人皆畏其口直與俞益謨互相訐參彼時亦有以趙申喬爲

非者朕細加察訪卽彼所轄武官及陝西人良心不昧俱言俞益謨之非無有以趙申喬爲不是者清官固所當惜而其言之不可行者朕亦不行如趙申喬條奏黃河坍塌地免糧一事朕亦不準行雖所言未當而並無私見凡交與伊一應事情皆實心辦理朕亦以此護惜之欽此府君隨叩謝 天恩感激之私非可言喻 皇上六旬萬壽 賜貂帽一頂團龍緞袍掛一襲松花石硯一方 覃恩封贈三代蔭一子入監讀書四月 上以粵東米價騰貴恐民乏食停徵本年錢糧 特差府君偕傅少宰前往會同督撫減價平糶倉穀并遵 恩詔賞賚兵丁府君到粵卽宣布 皇上德意協同督撫商榷平糶謂價若昂則病民價太減則阻商每石以一兩八錢爲率於是商賈雲集市價遞減民賴以活隨徧厯營汛按籍給賞訓練士卒整飭行伍浮

者汰之缺者補之老弱不堪者易之將弁懾服軍政肅清粵地
濱海時值溽暑蚊蚋甚多僕從卧不安席府君獨寢一室不施
帷帳寂無蚊聲至今宦粵者詫爲異事是歲府君年登七十奉
差在粵不孝熊詔又扈 蹕塞外不克隨侍膝下捧觴上壽因
於侍直間從容求賞匾額蒙 皇上御書匪懈堂三大字以賜
不孝隨遣子桐敷馳捧代祝府君拜受喜動顏色連進數觥不
孝聞之方謂 天書寵錫庶保永年豈意未屆耄期竟棄捐不
孝而去也嗚呼痛哉甲午二月府君回京奏覆稱 旨時已遷
戶部尙書部務冗沓卯出酉歸寒冬晷短則攜稿回寓燃燈批
閱恆至四鼓不輟有支領錢糧者必詳慎句稽雖叢怨招尤勿
恤也又河閒府滄洲旗退民地七百八頃有奇久奉 旨永停
圈撥百姓行差納糧載在全書忽有莊頭李必達等具呈內務

府行文欲在內撥給六百一十頃零撫臣以此地滄民承種輪租已久若一撥取則千百窮黎俱無依賴勢必失所請將李必達等在各屬旗退地內均勻撥給部議不準府君獨議應如所請以免窮黎失業以廣 聖主洪慈奉 旨依議又買賣人馬維屏等呈請繳銀萬兩交部領換大錢在於京城內外收買小錢陸續交局改鑄奉 旨著交包衣昂邦內務府已准其所請將稿送部會題府君以小錢驟難禁止故前議寬限使大小攬行正於商民兩便若准其所請收買則錢價必致騰貴且恐奉行不善或致多事擾累地方應無庸議奉 旨這事議得狠是欽此壬辰乙未 殿試府君兩充讀卷官蒙 賜聖製七言律詩大金扇一柄又 御書水能澹性爲良友竹本虛心自得師對聯一副眞異數也丁酉三月因奏鉛筋壞爛部議革職奉

旨著革職在任効力四月又因劉芳昇一案與九卿兩議自行
檢舉部議革任奉 旨從寬仍留任戊戌會闈開列主試府君
自以齒力衰邁腕疼目眩移部注假及屆期宣 旨仍奉 命
偕冢宰張公爲大總裁府君感 聖恩高厚衡文重任屢膺
特簡因力疾評閱不敢言勞雖精神日以消耗形容日以憔悴
府君竟不自知也是冬不孝熊詔奉 命從役西陲啟行有日
府君見不孝依依膝下神色慘阻毅然曰馳驅 王事分也戮
力供職毋以我老爲念不孝跪而受教因與鯉詔揮涕曰我生
不辰獨以老父相累矣辭訣而行自是京邸日以遠魂夢日以
離跨馬從戎輸餉巴里坤者再關山萬里睽隔兩年晨昏不克
定省盤匱不克捧持疾痛疴癢不克承寧出入憂喜不克瞻顧
撫心飲泣仰天禱祝惟冀殲厥小醜旦晚凱旋猶得展拜高堂

以補供子職豈期親不我俟一日之生離竟爲百年之永訣耶
嗚呼痛哉庚子三月府君寒熱數日忽患洞泄不止十五日猶
至西苑坐班歸寓連瀉數次足冷至膝十八日叩祝 萬壽不
能自起賴同官扶掖成禮因具疏乞休奉 旨卿効力年久清
勤自勵簡任司農正資料理著照舊供職不必以老病求罷該
部知道府君感極涕零伏牀叩頭恭謝越數日腹瀉不休足難
履地復具微臣衰病難瘳事一疏仍蒙 溫旨慰留又奉 上
諭前覽曰部尙書趙申喬辭本朕深憐之念其操守到老清廉
性雖暴躁爲人朴直年近八旬病勢難料全愈倘一時難保亦
未可定趙申喬乃革職留任之官著照陳詵之例復還原職當
賠之銀一概寬免內閣將此口傳旨意着速發去令病人早知
一天或五內少得安寧服藥調攝即可頤養也府君跪誦 天

言淚隨聲下隨具摺遣鯉詔齋往熱河謝 恩蒙 皇上連賜膏藥及藥丸隨貼臍併尾閭腹泄頓止七月足痛漸愈隨於二十四日親赴熱河叩謝 皇恩獲覲 天顏不勝欣幸入月初自熱河歸卽進部辦事斯時身體尙未復舊祇以受 恩深重圖報念切不敢再以衰老求退又不敢在寓偃息朝夕勞勩不異從前十月望日隨諸大臣忭舞叩賀又蒙 溫諭垂問歸語兒孫闔門感泣十六日更定後回寓心神恍惚語言蹇澀天明稍覺清爽仍赴部如常十九日又隨九卿赴西苑二十日尙力疾到部滿尙書孫公慰勸始歸二十一日力乏不能起牀口中誦言部事喃喃不絕二十二日喘急愈甚易簣時兩目瞪視自歎 主恩未報齋恨重泉口授遺疏令鯉詔繕進時不孝婦陸氏侍疾牀前念不孝遠涉西陲未卜稅駕因涕泣逡巡冀或一

語家事府君張目顧之終無一言迨鯉詔捧參藥以進而氣息益微不復續矣嗚呼痛哉此情此景不孝總未見也卽碎身萬段決脰剜心擢筋剔骨豈能蔽厥辜而銷長恨哉二十五日晚上見遺本卽傳奏事大人問趙申喬是幾時沒有如何沒有

的皆回奏云不知奉 旨趙申喬効力年久清勤自勵簡任司農實心辦事忽聞溘逝朕心深爲軫惻應得卹典著察例具奏

二十七日 特命宗室公南書房張少司寇漢侍衛六人臨奠茶酒行三叩禮不循常格禮臣具典禮以聞蒙 賜卹如制閣臣擬諡上請 特予恭毅二字不孝等子子孫孫卽捐糜頂踵未足仰酬萬一也語云知子莫若父知臣莫若君先王父之臨沒也呼府君曰爾知字汝意乎諸葛武侯王佐才而其自信不過曰謹慎而已今府君不惟恪守慎之一言且併武侯之鞠躬

盡瘁死而後已者視之亦爲無忝府君與人交終身無惰容倨色爲撫藩接見屬吏必以禮入居九列動容辭氣滋益恭庶幾古君子行己之道嘗言大丈夫事業一生豈做得盡惟有做一日僧撞一日鐘捐館前二日猶晨起入部執筆判牘不肯休若不知身之有病者曾子論士之弘毅終之以死而後已朱子所謂一息尙存此志不容少懈也今府君刻苦數十年品行經濟盡在 賜諡兩言之中非 皇上深知篤信於老臣何以得此古來臣子之受知於君父孰有過於府君者哉居常訓不孝輩曰今人多好以清官自負夫清非僅不名一錢也須兼廉明兩義始得廉則一塵不染如冰雪之清明則一毫不蔽如水鏡之清若徒一介不取而處事糊塗世安用此清官爲吾外厯藩撫十載何曾做得清官來如初任浙藩時兌解協餉每平贏出錢

許詢之庫胥則云前任收兌稍重些需故耳合計可四百餘金
吾藉以餬口兩載此可謂之清乎撫浙不及一年變賣本衙門
朽壞號船一隻并繳進水手工食銀共七十兩有奇爲差往鎮
筭路費此可謂之清乎泊移撫偏沅隨丁二十名咨部食守兵
糧歲得餉銀二百餘兩米七十二石闔署待哺於此此可謂之
清乎所自信者吾於地方利弊民生疾苦蚤作夜思知無不爲
爲無不力差免糊塗之責耳至於戶部衙門苟有所得絲毫尤
爲不義非飭法欺 君此錢安得入手故吾在部未嘗敢私一
錢凡吾所爲有不可以告 皇上者卽不可以告家人爾曹雖
不言吾能不內愧於心乎府君不飾名不矯節循理而行審義
而處生平無一事不可對人言者大率如此不孝兄弟才並驚
下命復乖舛不能爲府君分憂反多以事貽老親憂丁酉二月

不孝被同官誣訐記注一事吏議必欲寘之死請移讞西曹
上洞悉無辜折本者再又傳問九卿亦僉議如前本既上而
旨未下時不孝待罪西苑寓中薄暮府君馳一介至且攜一閩
柑賜不孝啖曰一有消息速報我旋聞上折本不孝感極痛
深失聲而慟卽作手稟遣家人馳還抵邸舍已嚮晨府君猶一
燈熒然兀坐以待蓋竟夜不寢矣翼日府君以奏事至西苑語
不孝曰疇昔之夜神思荒亂殆不可言狀所以攜一柑啖汝者
恐一從吏議汝便當入請室吾豈能卽與汝相見故以此略示
分甘耳尋荷 聖恩矜宥不孝僅從削職仍供奉 內廷吾父
率不孝涕泣謝 恩兩月之憂懼始釋仲弟鳳詔初授山右沁
水令府君適任西曹臨歧誠囑有詩云保民若子方成子治邑
如家莫爲家所以鳳詔外任廿餘年從未敢以俸資攜寄故鄉

買田一畝置屋一椽此媼黨皆知之戊戌春鳳詔罹於法府君
方典試南宮出闈後始知之曰此子負君恩死國法吾何悲
焉但吾老矣不意暮年見子刑戮也自此慘戚之容時見於色
是秋部檄原籍查家產邑令意有希合以寒家薄產無幾難於
開報遂及三黨羅織橫行二三親戚凡有餽粥田數頃者輒繫
之獄盡籍其田以充數至於寒舍所有一盃一箸一紙一縷悉
登冊以輸之官賴觀察李公太守劉公秉公持正令亦悍然不
顧猶以爲未足力請於上官疏參鯉詔禱職嚴追將得而甘心
焉府君憂之甚憐之甚一如不孝待罪時乃蒙皇仁浩蕩概
免查追不惟鯉詔幸獲生全諸親友皆反故物得免餓殍府君
聞命淚如雨下曰上實使老臣再生恐老臣不能報矣世
世子孫敢忘此日耶不孝次男佺徵府君最鍾愛襁褓中卽提

抱左右稍長自課之識字讀書九歲後府君宦浙宦楚俱挈隨
行命庶母張撫之兒亦善承意指頗能服勞辛卯春府君入都
雖官御史大夫而僮僕寥寥門無賓客不孝復倖直 禁中扈
從塞外定省多闕鯁詔以邱墓祭掃數往來南北間蕭寓晨昏
惟祖孫兩人聚首未嘗頃刻離也戊戌五月佺徵以暴病死府
君哭之慟連呼曰天喪予旣而曰吾非敢妄比孔顏也以吾兩
人相依爲命直同此痛耳厥後府君貌益憔悴意緒更復無聊
每退食歸寓形影淒其輒呼孫乳名哭之逾歲猶然侗數生男
元次七歲端慧如成人丙申以痘殤府君悲不自勝曰此吾冢
曾孫也曾孫與曾祖中隔兩葉且未識面然天性之痛欲遏轉
深良由我有餘殃累及童穉因手書淚語十數行命家人南歸
持羹飯詣塚哭焚之孰意今日不孝不得侍吾父而佺徵反得

長奉色笑如舊元次亦從地下初見曾祖跪拜起居也嗚呼痛哉府君少丁族難中膺劇邑末齒敷歷中外隻手撐擘勤苦勝於諸生時屈指七年來大抵憂患之日居多燕閒則愁眉默坐出接賓客閒亦酬荅歡笑從未露齒縱聲比年骨肉彫殘生離死別感舊傷今老而彌甚加以年運轍軻動輒得咎操心慮患晝夜靡寧以故氣血日益耗精力日益枯一蹶而幸復支再蹶而遽不起也嗚呼痛忍言哉府君篤於友愛止安公自生府君後閱二十年復舉一子卽翰林院編修提督山東學政蔚什公也止安公捐棄時蔚什公甫十一歲府君親自督課長爲完娶以祖屋讓與獨居而田產則公析外復於不孝輩分箸時仍照分授田百畝丁丑蔚什公成進士府君郵寄一聯云痛思往事無忘吾父之艱難慈念永圖甯效乃兄之迂拙蔚什公捧之涕

泣受教迨仕遷江府君爲拮据資斧令抵任癸未春府君隨
駕行在 天語詢及子弟履歷一一奏對後復從容奏云臣弟
申季遠任瘴鄉臣年已老恐此生不復相見 上頷之未一載
蔚什公遂得引 見改授翰林院編修旋提學山左以校士積
勞卒於濟南官署訃至府君痛悼殊甚每道及輒涕泣不自勝
府君尤篤於淵源之誼閩中朱公已酉房師也後爲瑞金令被
誣受劾府君親詣江右力白於大吏寃始得雪座師東莞祁公
後嗣式微書香中絕府君勉自節縮爲之援例禮闈房師揭陽
楊公謝世後諸孤孱弱府君竭力維持得免外侮初應童子試
受知于學使江陵胡公及撫楚南胡公適以壽終府君爲文哭
之周恤遺孤而勉襄其喪事府君愛惜人才樂於推輓任總憲
司農每遇九卿廷推人員一有所知卽急爲援引如陝西學道

今總憲朱公兩淮運使今兩淮鹽院張公皆府君保薦非有平生之素一見卽深器之又湖南舊屬藍山令尹秦臨湘令傅霽城步令趙璐府君遵 旨保舉得行取引 見又雲貴廣西會試限於定額府君將落卷進呈蒙 恩覆試雲南鄒啟孟貴州王夢旭廣西李祖望俱得 恩賜進士府君存心仁厚表裏坦白不設城府崖岸尤不喜訐人之短其有一言一行之幾於道則識之不忘方謂天佑吉人宜享上壽不意遽棄諸孤而逝也嗚呼痛哉府君淡於仕進里居時卽有終焉之志戊寅元旦年五十五歲自題神主曰白雲舊人并爲之說云白雲者何居白雲渡濱也舊人者何今古無常存之人歲月有易盡之景在今日則爲人在他年則爲舊也府君於去來之際固有洒然脫然不少繫戀者惟是捐棄不孝曾無片語留付此日夜椎心泣血

恨不得相從於地下也嗚呼痛其有極哉吾母龔夫人庠生雨若公女贈文林郎湖州府推官鹿萍公孫女也于歸府君時吾家貧無力備鼓樂止用布幔肩輿外家又被盜燬廬亦不能具奩資吾母處之泊如也先王父治家嚴肅屋宇湫隘吾母歛容屏息終歲不聞笑語聲先王母白太夫人素慈愛吾母朝夕隨侍備得歡心與諸姑尤和好無閒丙午秋府君被放更深後吾母猶飲泣不止府君慰云吾未及壯未必無出頭日子汝不必重自苦吾母揮淚曰吾非慮爾無進步惟念阿翁春秋高試事兩番報罷無乃重辜老人望耶府君亦不勝悲慟越三載登第吾母喜動顏色幸老人之及見此也後府君歸里吾母相謂曰吾家固寒素不必學他人具冠帔亦不必買紉綺爲我製一青布衫足矣府君欣然諾之癸丑八月先王父疾大漸治棺孔亟

有親知告云日辰與冢婦相衝大不便宜易之吾母堅持不可
曰奈何以我故遲誤老人大事且修短自有定數無庸慮也迨
甲寅秋遭疾彌留時執先王母白太夫人手嗚咽不忍釋且云
婦職未終反以諸雛上累阿姑歿有餘恨而捐閭之期與先王
父屬續之月日時一一相符數耶命耶天道果有知耶其無知
耶而吾母孝思肫篤不暇自顧可勝痛哉府君嘗語不孝兄弟
云吾與汝母伉儷十五年爲貧所困汝母仰事俯育旦夕拮据
辛苦備嘗未曾一日伸眉吾冀有以償之者而今已矣輒潛然
淚下嗚呼不孝追思及此終天之恨甯有極耶府君中康熙己
酉舉人庚戌進士歷任戶部尙書兼管錢法堂事務康熙五十
二年三月恭遇 萬壽覃恩誥授資政大夫生於順治元年六
月十八日卯時卒於康熙五十九年十月二十二日酉時享年

七十有七 特旨諭祭 賜全葬 賜諡恭毅 吾母生於明崇禎十五年二月初六日酉時卒於康熙十三年八月二十四日卯時年三十有三歲康熙五十二年三月恭遇 萬壽覃恩 誥贈夫人庶母張氏先卒子四長卽不孝熊詔康熙己卯順天舉人己丑 賜進士及第翰林院侍讀革職仍 內廷供奉娶陸氏封安人次鳳詔康熙丁卯舉人戊辰進士原任山西太原府知府娶唐氏次鶴詔早卒娶白氏苦節三十年待 旌次鯉詔康熙戊子舉人候補內閣中書娶楊氏女二俱早殤孫九伺數邑庠生 賜監議敘知縣卽用娶黃氏侄徵太學生早卒娶張氏備敷太學生出嗣鶴弟娶儲氏仔敦太學生娶王氏俱不孝熊詔出健敘娶徐氏鳳詔出位敘聘陳氏鯉詔出偉枚聘許氏倚敬聘劉氏傳敬幼未聘俱鳳詔出孫女十一不孝熊詔出者

三鳳詔出者四鶴詔出者一鯉詔出者三曾孫四壽男侗敷出
彙男佺徵出智男侗敷出貽男儁敷出俱幼未聘不孝熊詔創
巨痛深神昏思瞽語無倫次掛一漏萬伏祈大人先生俯賜採
擇錫之琬琰以登史乘以賁泉壤世世子孫感且不朽

祭文

祭勵母紀恭人文

溯詩書之世澤毓嘉質之徽柔痛修齡之未逮聞懿風而涕流
繫伯姬之苗裔追前軌以相伴肅黃門之家範幼婉婉而幽修
寶靈珠之在握爲賢姑而相攸維文恪之愛子頗慎選夫好述
欣兩美之旣合乃無嗟乎河洲奉盤匝而慈飭潔蘋藻以薦羞
佐敬養其內備終溫惠而無尤遠姑嫜之邁疾竭焚禱以上求
繼高堂之易簣歎佳婦以冥眸洵相夫而有禮助膏晷之旁搜

觀成章而心喜託曠業以懷憂會卯辰之屢捷猶助勉其勤謀
既中祕而受渥且禁直而登優惕尚職以冰蘖戒凌雜之勿諛
惟中饋之是主酌豐儉而咸周隱自安於食淡斯百爲之善籌
若尙方之隆錫必莊拜而珍收遵大體以立議思仰答之難酬
暨內外之無閒和姊嬃於同儔撫嬌甥如己出資奩具而盈稠
兼無妬於貳室似高柯之下穆羣三索而誕育常顧復之懷懷
衍單緒於綿旒宜懿矩之長庥何二豎之不想虔祀佛而無瘳
竟悉空乎五蘊均夢幻於浮漚拜 賜額之榮寵疆伏枕而叩
頭忽奄然其遐逝先夫子之旋騶曾不及乎永訣悵視舍之無
由慘嗒焉於總帳尤淒清於凜秋 某 忝承乎年譜日侍訓于應
劉接話言之藹郁聆述行之綢繆瞻起居而抱疚心怵怛而弗
休賦雲鸞之渺渺悲夜魄之悠悠倘西極之返顧乘泰素以神

遊鑿椒漿之前酌及肴核之旅修駕第帷而來格庶誠感而延
留嗚呼尙饗

祭楊年嫂田恭人文

嗚呼寶婺星沈瑤池駕杳作配玉堂之彥生前象服堪榮永留
彤管之名身後芳徽不泯悵女宗之乍失誦壺範而增悲緬惟
恭人順表坤儀貞稱恆德家承恩澤漢初樊鄴之封產自名門
唐世崔盧之族幼嫺姆訓顧家之閨秀爲隣長習女功薛氏之
鍼神與匹荆花方茂玉鏡斯求旣協兆於雀屏乃嗣徽於鳳卜
宜家人而有譽相夫子以成名潔治灑滲翬翟佐斑衣之戲靜
諧琴瑟雞鳴理雜佩之遺禮肅如賓能使伯鸞加敬職勞中饋
不教洗馬言愁冀北空羣雙珠早誕關西清德四世益隆載邀
鸞誥之自天爭羨魚軒之耀路尊榮未艾勤儉依然方期克享

修齡詎意遽逢疾疾益壽之泉罔效返魂之藥無靈孫楚有文情深伉儷曾參至性口絕水漿里巷盡爲歔歔族黨尤多悼歎某等誼辱蘭交心儀蕙質因風柳絮未聆道韞清言倚玉蒹葭得悉大家矩步追躡承華之列自愧後塵備員載筆之班敢揚懿行些音愴咽珮響歸遲靈其來歎嗚呼尙饗

祭大同守洪崑霞年兄文

嗚呼兄之捐館舍距今將一暮矣余至今日而始得爲文以哭兄者非余之敢後也去冬之杪凶問至京師始聞而驚繼而痛轉而疑以爲傳之非其真耳欲哭於寢門之外而未敢也今春訃至而疑者信矣痛不可忍矣卽欲走一介執雞絮哭於喪次而余適爲同官所擠因事彈中吏議欲寘之死將下於理幸天子知其枉僅從削職仍供奉禁廷當是時一夫張弧舉朝袒

臂余杜門待罪如孤萍斷梗飄泊於風濤險隘之中恐終已不
得哭兄以伸吾痛也勉強索紙作書而茫茫百端不能成一語
以故盡然中止未幾扈從塞外持橐簪筆無餘閒又遲遲未逮
今聞窀穸有期矣既不能憑棺而視歛復不能執紼以引車日
月云徂幽明永隔數千里外臨風一慟其能已於言耶始余之
得交於兄也在戊寅之冬皆以滏陽夫子選拔士入京師時則
又有王子庭曙大武舒子寶田旅邸連楹而余居獨遠一見歡
如舊相識卽徙余同寓於正陽門外之僧舍相與圍爐翦燭論
文賦詩更縱談古今賢豪之出處及品評當代人物興至則飲
酒歌呼以爲笑樂蓋五人者方俱壯年氣盛志高因相謂曰異
日富貴毋忘死生勿易也已卯秋余偕大武舉京兆而兄與庭
曙寶田屈抑不得志寶田先歸江南兄與庭曙被選上舍教習

八旗俊秀兄又暫歸越明年大武成進士余下第先後出國門而庭曙獨留京師於是五人者盡散而各一方每當風雨雞鳴索居斗室思從曩遊邈不可得然後歎知己聚合之難而友朋樂事之不常有也癸未余上公車兄與庭曙大武俱在京師復相聚者數月次歲兄至毘陵與余踐婚姻之約庭曙大武爲之執柯復一聚於吾郡是冬余赴長沙過維揚兄偕難弟孝儀邀至其寓齋庭曙亦至乃命酒徵歌放舟隋堤爲歡累日此一歲之中得再聚焉丙戌大武方官西曹兄亦以選人需次余循例避南宮試不得已旅食京師復日相往來慰我羈客窮愁之況然而寶田戀於其鄉庭曙又居憂未闋僅吾三人者盤桓於茲已淒然有寥落之感矣閱數月兄授交城令當之官余送出郭握手丁寧以爲雖暫相別不久卽以最遷可復相聚孰謂此別

遂成永訣也兄在交城時一月中書問必再至凡地方利弊若何官箴得失若何輿論傳聞之褒貶若何諄諄咨詢不憚煩其後牧霍州也亦然又其後守雲中也亦然余以日侍直廬辰入酉出偶不暇答而兄書問不絕且云吾兩人遙相念止欲數行書達彼此平安信耳兄素知我貧歲必分俸數十金爲芻馬僕賃之費又憐余薄宦三載尙寄跡僧寮傲居無策復爲假貸以助焉嗚呼兄之待我厚矣而余曾何有毫髮之補於兄耶自兄之別我而去京師也後四年大武出守章貢不半載卒于官余哭之庭曙則又四至京師兩年前卒於京余又哭之昔日之相聚而相知者又有金子以時去年春亦卒於滇余又哭之不一而足而又哭兄也嗟夫死生聚散之際固如是其奄忽耶以時年長而兄與余齊年庭曙少余數歲大武又少庭曙數歲回憶戊

寅舊遊不過二十年閒事而故交零落已如此其幸而存者惟
余與寶田然六年之閒余哭四人焉而余亦將衰矣兄在雲中
卽得疾余亟馳書慰問答書云調治已漸愈繼遭太恭人之喪
疾復發余遣人弔且問疾亦答云體漸平復然余見來書筆墨
語言似有精神恍惚之狀心竊憂之尋聞南歸抵家疾發卽瘥
余憂乃少釋謂居家逸不若居官之勞善自攝養可以無恙兄
之仲子封旅吾壻也去春來京師亦云眠食無損矣孰意不逾
歲而終以此疾至於不起哉又聞兄之疾因余弟而加劇也蓋
余仲弟守太原與兄共事交契最深今以得罪上官陷於重法
含冤茹枉控籲無門惟兄熟悉其情事必有爲之憤懣不平者
嗚呼兄已棄人閒世一載矣而余弟尙幽羈請室未知性命安
歸余痛吾弟能勿益痛兄耶近世士大夫往往家於官兄之家

則以官而廢三任晉中廉聲籍甚宦橐如洗復傾家以代人補
苴沒後遺孤十一人未婚娶者過半非有難弟孝儀推己所有
佐其兄則受累於官者無終期而藐諸孤且饔飧不給也夫今
之人不講於孝友之道久矣家有孝友之君子同室無私財撫
兄子如己出九原有知亦何憾乎吾壻封旅頗能自刻苦他日
庶有以自立余于兄尙有所負俟余力可以償當付之封旅以
完吾志此平日所欲告兄而未及者也嗚呼哭兄之淚蘊結一
年而所以爲兄告者不過如是言有盡而意無窮冥冥中之知
我豈遂不如疇昔相聚之時也耶哀哉尙饗

祭 誥封一品夫人李師母文

天壽平格元老是昆內政肅離曰維母儀女宗紀美五紀於斯
倏承遠訃理不可推恭聞懿行冠於閨帷晉江巨姓朱紱垂垂

令善宣昭笄珈孔宜崇秩極品德稱弗疑繫惟相國出應昌期
文武勛德蔚爲邦基內修其勤嘿若相之惟 帝念功端揆來
咨彌諧單心罔顧於私家督孰理截然不移維我相國忠清勿
欺素心如水皎皎不溜家承其廉潔盪滌區困倉誰糜文錦胡
被貴而弗驕禮以自持維我相國燭照靡遺四海九州罔不受
治家承其明毫末悉釐家人婦子莫敢嗃嘻紀綱僕御順令無
疵大家之教典則靡戲申國之法莊恪弗劇豈同臭味而有差
池順承合德麗於坤維母訓旣立諸子是規叢桂清芬五株森
奇巫咸同招劬勞心悲長公滄粹文高一時經術湛深不克究
施惟此蘭蓀九畹方滋敦敏性成誦習孜孜有孫有曾克承燕
貽朝夕顧視樂以含飴春秋旣高登邁於耆睽念鄉閭歸憩在
茲宜履上壽飲食支頤遲公林泉采采巖芝輕輿載軒委蛇相

隨何圖仙籍與世長辭舉國心悼疑天嶮巖凡屬宇下泣涕漣
漣某等溯風鳴噎道遠莫追或源伊雒上附孫枝或承牆廡瞻
望親慈或拜牀下摯誼惟祇無從執紼心傷涕洟杳杳南天曷
慰我思雖云大德蠡管難窺潛焉寫哀抒此寸詞跽奠椒醕將
以瑤卮雲車僊僊來鑿來綏嗚呼尙饗

祭銓部張鞠菴文

嗚呼庭生玉樹代小金甌譽綿弓冶緒振箕裘地靈人傑燕翼
厥謀霞鬱雲蒸世德是求穎南擢秀曲江匹休維君望族閎闕
罕儔太翁起家冠冕時流爲名進士發祥所由青萍出匣屠龍
志酌含香粉署 楓宸眷優尊鱸早嗜綠筵歸游千里名駒步
武驂騑桂叢香發杏苑花稠英年射策如矢汰駟扶搖羽翮廊
廟琳瑯旋入承明職典使輶皇華四牡咨度咨諏六載考績

帝嘉乃猷游陟銓曹亮采惠疇嗣遷郎正引對螭頭 天語春
溫謂拔其尤掌頌制詰茹剛吐柔待錫新綸星躔未周胡然化
鶴倏焉駕虬君稟夙慧庭訓冥搜政漁墳典沈酣索邱提攜玉
友勛以藏修分衡鎖院奇俊畢蒐自官京師漳鄉路悠望雲子
舍祈添海籌蘭芽瑜珥繞膝扶鳩叔季鵠起懷珍北遊田荆姜
被指日綢繆何其不弔朝露溘收笙遙緜嶺文召玉樓錦茵撤
兮荀香暗浮瓊花謝兮子規夜愁韶光石火天地蜉蝣名場噩
夢滄波逝漚山邱華屋瞬息千秋 某等盍簪輦下締譜同舟聚
散如斯慟哭西州生芻一束清醕一卣靈其降鑒詎隔明幽嗚
呼尙饗

祭二弟文

維康熙五十七年二月廿八日同懷兄 某以酒一卮飯一盂紙

錢一陌遙呼二弟而哭告曰痛哉痛哉天何使吾弟至於此極也自廿三日晡後聞信以來余與四弟淚眼已枯驚魂未帖展轉思維誠不料吾弟至於此極也上年十月之前無日不慮有此事至十一月廿六日啟奏天威震怒欲允九卿之議時已萬無生理及暮而復折本次早余從父親匍匐宮門哀籲卽下九卿議覆而亦折本天心微轉似有生機謂自此以往可以不死矣今年正月柯參戎有人西去家書中作好言相慰彼時情形實然非欺語也孰意今月廿三日折本忽上聖明遍問執政皆云國法不可寬而弟竟死矣假令是日不奏則遷延旬時或可以不死卽不然而緩之數日則三月停刑此月猶可以不死弟之竟死於此月也執政爲之也誠知其如此則前月之家書便勸令自裁猶得全首領以沒而何爲以好言相

慰也痛某有極哉悔其有極哉 旨下之後父親方在闈中一
求不允再求何益既不敢復哀叫於 九閻又不能馳急足於
千里廿四日遣萬本西行計其到時弟已不及待故未發家書
是此段情形吾弟遂終已不聞也今爲略述之一紙淚言九原
其得見耶廿五日部文下廿八日當抵太原是日遇齋戒廿九
日卽吾弟畢命之辰矣出獄之狀若何臨刑之慘若何棺衾不
能豫辦畏殮豈能如法守尸何人寄覩何地數日來一日九迴
而予腸亦寸寸斷矣吾弟平時一切吉凶先期有夢徵今日之
事母親暨弟婦能攝魂魄而先告之否晨夕與獄神相對皋陶
有靈肯垂憐而示之兆否嗚呼痛忍言哉雖然夙世劫緣人誰
無死死於牀簀死於市朝均一死也勿苦勿怖黃泉差樂何怨
何尤 本朝七十餘年培養士氣冠帶之倫苟非極惡大慙概

邀寬典從未卽加刑戮今吾弟獨遭此厄天也天可逃乎且吾弟被叅之後朝野聞之每多婉歎則含冤負屈而死猶勝於情眞罪當而死也查追家產一本尙未奏請異日尙邀君恩寬貸得留寸椽尺土則煢煢眷屬便可南還挈弟之棺及考姪之棺歸與弟婦之棺暫厝先塋之左近俟卜一兆而合窆焉弟所舊居之室子女聊可棲身教諸子以望其成養諸女以待其嫁余與四弟此身尙存決不使幽魂遺恨於地下也揮淚作此以補前日之家書冥冥中不致浮沈吾弟見之或可瞑目長逝矣
嗚呼痛哉

祭岳母陸太安人龔太君文

嗚呼岳母竟溘焉長往耶年踰八袞壽不爲少子姓滿前福不爲薄考終寢室洒脫塵緣人生至此亦復何悲然余之所以不

能已於悲者則以母視余猶子而余不得視猶母也蓋母出自
名門嬪于華胄識詩書明義理巾幗而有丈夫之志爲先太岳
翁觀察公所器重乃屯難頻乘世業中落齋志以終天年其胸
中鬱結幽憂之隱有不能爲子女家人告者余小子聆音察色
知之最深方謂彼蒼嗇其遇而豐其年可以坐享期頤上壽余
乞身歸田猶得進旨甘承色笑而不意遽棄捐於今日也憶甲
申之冬余趨侍家君於南楚旋以薄宦滯京師與母不相見者
凡九年余之婦乃母愛女也不忍使之遠離癸巳夏挈女至京
師余具冠帶拜謁母爲一解顏雖寓居湫隘脫粟藜羹處之怡
然余又僂直禁中扈從奉外不獲長侍左右歲不過半載月一
再至邸舍定省家君因得問母起居計母居京師三年而余之
與母相見者不及月餘屈指再留三年當爲母稱八十觴乃丙

申夏婦兄堅請南歸家君力止之母亦躊躇未決而重違子請
不得已洒淚就道余送出國門扶輿泣別母猶強歡笑相慰謝
不謂此日遂成永訣也嗚呼痛哉先王父與太岳翁爲同年友
相約爲婚媾余生癸卯越一年余婦生遂締姻焉先母夫人與
母同族也閔予不造髫年失恃哀慄成疾母日遣人視問餉之
藥餌乃得瘳年十五補弟子員母爲製青衫送學又三歲家君
欲授室而貧不能娶母因館甥於家衣之食之如己出余潦倒
諸生二十餘年母常顰眉太息迨己卯上賢書己丑倖及第母
輒喜曰婿自幼不凡遲之至今始見其成名吾相攸無憾矣嗚
呼母誠視余猶子也追念舊恩依依如昨能不思而痛痛而長
慟哉余家查產一案波及三黨邑長吏耽耽逐逐擇肥而食虎
狼四出羅織無辜母有饘粥田數頃併籍於官且陷婦兄於獄

餬口之計將絕母郵手書示女曰女勿憂若兄亦不汝怨區區
薄產譬如昔年作汝奩資可耳幸荷 皇仁寬免各產仍歸其
主而貪吏亦以暴病死去歲余奉 命從戎母聞欷歔不自勝
手書來云王事賢勞臣職應爾其如寒官無力何且吾老矣萬
里征人可復相見耶嗚呼余無以報母而反以累母更以遠役
爲老人憂其相負尙可言哉今年五月余甫入關回酒泉浹旬
得都下家書知母有凶耗而訃未至然鄉人音間皆云然嗟乎
其信然矣欲如曩日之聚首蝸廬絮絮述家常話不可再得矣
病不知何證卒不知何時彌留不知何語殮不能憑棺以整衾
襚祖載不能執紼以引輜車窆不能臨穴以襄其窆窆關山遙
隔生死長辭母誠視余猶子而余終不得視猶母也嗚呼母止
一壻雖有如無若此徒使桑榆日暮望遠懷悲骨肉天涯九原

不與人生世上亦安用兒女爲哉母之愛女哀毀不欲生將匍匐南行送母之葬跋涉數千里恐不及事母鑒此情或不增其怨恫也哀哉尙饗

祭署理西安將軍額公文代

大清康熙五十八年歲次己亥四月己巳朔越十二日辛巳撫遠大將軍王謹以剛鬣柔毛之儀致祭於署理西安將軍印務湖廣總督額某之靈曰嗚呼欲惡莫大乎人倫綱常首重夫忠孝然生死之所遭有順逆忠孝之所成有大小若備員于朝考終於室歿不足道存無可述死而徒死者無論已卽智效一官能盡一職鄉表其閭邑食其德雖能生誌乘之光未足立顯揚之極若夫景行已而有恥疾沒世而無聞臨大節而不奪無求生以害仁光被山河入地化蓂弘之血位乎箕尾歸天爲傳說

之星死而不死如將軍者其人矣將軍世作朝勳家傳將略才
稱虞陞之夔龍任畀荆蠻之鎖鑰乃以小醜背恩猖狂荒服職
授龍驤權分虎竹將軍則勇奮於心義形於色忿此狡焉以啟
疆逝將滅此而朝食視士卒如一體唐勳可奏乎汾陽謀舉動
於萬全漢策莫良於充國有虔秉鉞分道揚鑣礪劍崑岡之石
洗兵蒲海之潮雲罕星羅彌天旣布釜魚籠鳥穴地難逃何期
豎子貪功鄙夫被惑重地遙臨短兵近接日暮途窮羽書火急
同患爲懷懸軍深入蓐食飛馳革囊利涉轉戰無期相持浹月
獨木兼支長鞭莫及矢必命中而後發兵則一夫而當百尙制
勝以設奇每摧堅而擊實乃敵人懼遺後患計欲生擒起傾國
之眾置等身之金檻羊並力奔獸同心飛矢於壘伏礮於岑陣
餘雪擁戰苦雲深將軍猶裹創而陷敵楊腹以先登斯時也士

馬爲之嗚咽鼓角爲之悲涼原野爲之變色天日爲之無光將
軍雖摧敵百重圍而身受十餘創矣但見彼眾益增我軍漸折
短髮蓬飛雄心氣結痛主恩之未報悲臣力之已竭於是望
北闕以長辭引龍泉以自決握拳透爪顏平原死不忘君嚙
齒穿齦張睢陽鬼猶殺賊所以大宛小月咸灑淚於龍沙因而
賊子亂臣亦痛心於馬革者也嗚呼星隕人寰訃聞天表百辟
咨嗟九重震悼爰命本王恭膺天討馬牧三邊兵分十
道伸將軍未竟之志慰聖主如傷之抱縱鴻毛蔽野何能當
烈火之焚諒敗葉淩霜豈足敵颶風之掃茲本王節駐湟中誓
師西徼遙望風雲爰伸祭弔嗚呼將軍其死而不死者耶於忠
也舍生取義爲我皇父社稷之臣於孝也殺身成仁爲爾先
人堂構之子嗚呼將軍其死而不死者耶雖酌天酒以報崇功

昭代之衰榮未艾而列庶饑以景芳烈本王之哀感良多乃復
爲招魂之歌歌曰華戎相去兮萬里隔上下攸分兮天與澤來
享來王兮奉天職作不靖兮乃自絕嗚呼將軍兮明大節從容
就義兮尊中國羌部聞風兮心膽裂英氣如生兮懾西域魂兮
歸來兮來歆格銘鼎鐘兮炳史冊親顯名揚兮永無斃哀哉尙
饗

趙裘萼公贍藁卷第二

趙裘萼公賸藁卷第三

男侗敬謹編

詩一 辛酉至戊子

任公釣臺

荆溪之中水如練荆溪之上臺如弁兀兀臺前一釣磯吞波截
湍橫溪面相傳任昉來築此占盡風流賢刺史公餘無事學投
綸至今嘖嘖芬人齒我聞使君最好賢冠蓋輻輳多翩翩鄭莊
置驛常五日田文食客恒三千胡爲閒向溪頭釣落落烟波迎
夕照一竿到處驚魚龍濯足滄浪寄長嘯吁嗟使君自有心公
等碌碌誰知音隨波上下本無定貪吾餌者爲吾擒多應自笑
門如布聊傲當年釣鼈李虹霓爲絲月爲鉤啖以人閒媚骨土
君不見金蘭把臂舊簪裾一朝遺棄如前魚西華公子窮途泣
孝標慷慨絕交書只今惟有荆溪月爲公千載留清白昨夜秋

風捲碧濤臺空烟鎖無人迹

月下觀惠山泉二首

此夜清輝好來尋第一泉影分揚子月光近太湖天古砌涵秋色空亭帶晚烟半輪愁滴碎斜照石欄邊

爲愛團欒景重來翠壁閒有心常對月無意復看山亭浸寒光
閣泉流素影閒徘徊九龍下疑是戲珠還

陽羨采茶歌

采茶天三月布穀遞埜烟驚雷嫩莢纔抽綠處處開園好摘鮮
采茶山蝦虎城頭罨畫灣昔傳天使來唐貢揀得冰芽逐笑顏
采茶人一筐收盡滿山春更有小僮能解事帶汲金沙欲試新
采茶路飛青疊翠迷如霧任教裁璧與抽金暗香猶向蹊閒度
采茶名紗帽棋盤並紫英別有靈芽稱廟後龍團鳳餅何足評

采茶焙竹爐松火聲如雷研膏架動蒸且馥紛紛但見販芽來
采茶市漲沙羅芥憑君指品到人間第一茗其價直與黃金比
我今連唱采茶歌風生兩腋信如何假使濁醪能解渴敢笑盧
仝椀數多天生佳種實靈竒烹之有法采有時才人意味逾清
苦定知茗戰甘如霽畢竟愁腸無浣地旗槍那得都如意君不
見陽羨之茶中冷泉人間兩美天涯異

擬冬日演武場較射畢同登君山游宴

鵬鷲騰秋遠蛟龍變化時珠璣先炫目弓矢待搜竒建纛開正
鵠登壇校武罷嫖姚爭獻技踈跣盡長嘶枯草隨翎沒鳴潮逐
鼓移一聲魚貫集三箭驥羣追野闊籟音噪山高晚色披韜戈
出畫帳歷磴度層陂樽綠消餘興江紅映夜藜峻巒燈閃爍斜
壁馬舒遲飲酒宜詩檄冬寒喜獵馳雅歌添逸趣觴宴應昌期

盛世惟觀德元戎慰素思

擬冬至南郊禮成恭紀二十韻

丹厯千秋永黃鍾一日開飛葭迎瑞靄緹管靜寒雷陽始天休
降升中帝輦來六龍珠耀彩五鳳玉銜枚醜享瞻彤砌陪壇
薦紫杯陶匏羅海甸柴帛接星台羽綴瑤階舞簫聲碧月催嵩
呼齊鷺序嶽拜繞鸞臺寶篆沈香結祥花彩燭裁慶雲籠繡幕
甘露灑金鬘萬歲山頭震三光轂上廻冕旒垂肅穆邊豆徹埏
垓北極迎新祉南郊闋夏陔廻輿應絳雪警蹕軼蒼苔歧穗盈
疇穫芝英滿陌栽醴泉隨湧穴瓜棗獻蓬萊虞鬯行宗岱姬筵
肇有邵元音超舜樂御籙駕周禎青瑣思揮翰華封辱賜醅綫
添多淑氣早折上林梅

壽岳母龔夫人五十初度

三月春光春欲暮錯愛春光春再度黃鸝送春柳如烟紫燕迎
春花似霧捲簾貪看燕蹁躑卻逢青鳥銜雲箋昨夜瑤池桃已
熟王母親摘鋪華筵荷香馥郁蘭香濃寶婺髣髴臨其中爲羨
瓊樓不耐暑畫堂結幌逞春風瀛洲掇棗如瓜大豈須沈綠與
浮紅花茵柳幕堆珍果指點蓬萊第幾宮宣公閱閱名貫耳渤
海來嬪眞女士但聞內助古有稱瞻拜母儀洵罕似寒門三世
締金蘭辱教蘿葛攀珠玕鐘郝芳型時接日敢隨彤管快濡翰
風絮才思徒炫綺鸞曜齊眉還足鄙我瞻壺範不尋常奚但蘋
蘩相夫子玉樹高鶩獨軼羣吸月吞雲傲青紫瑜珥蘭芽遶膝
前英英頭角充閭社滿庭斑綵喜欲狂拜獻一觴復一觴我亦
從茲陳酒醴青衫羞對舊東牀拂拭東牀思總卅十年前事渾
如幻曾攜玉鏡甥館棲授衣授粢餘恩盼駑馬伏櫪嘗踟躕繫

母不嫌戀豆棧鷓枝自甘菘菜紛繫母將雛無悔訕相收愧厠
冰玉列涓陽幸映花萼牒我登岷巔懷北堂拜母依稀萱影接
幼年未解舞斑衣今朝歎羨心馳獵爰傍門楣肅復歌錦堂佳
宴慶如何永錫期頤纔紀半竚看環珮徹鳴珂喜駐丹顏應不
老待周甲子祝三多人生吉祥隨所受天倫樂事居八九爲詠
周詩思媚篇肅肅雍雍嘉祉綿

七夕步十叔韻

雲暮星稠早露灑依稀烏鵲架成梁參商終歲應穿眼牛女今
宵解別腸會少離多愁淡漢晝長漏短怨斜陽來朝重起相思
夢淚滴機絲色更涼

詠綠牡丹

小院名葩絕代無雨餘新翠出叢孤芳姿點染勞青帝媚態依

稀見綠珠色借苔紋春自占影分竹葉望來殊徐熙好倩閨中
黛別寫雕欄富貴圖

沁園春

用陳其年烏絲詞韻

似紙才名如霧前程真難主張但袖中短刺行乎且止懷中美
玉沽也還藏劍吐芙蓉詩成芍藥誰道斯文獨擅場從前誤枉
傾殘墨雨走禿毫霜 半生閱盡炎涼更躑躅長安別故鄉豈
畫手新翻多調脂粉阿婆未老自作衣裳鬼縱挪揄天雖憐懂
奇字驚人恥問揚春來矣且尋梅野外領取寒香

詠梅

荒徑春風外細梅萼漸舒夕陽餘澹蕩野外怡清疏庚嶺枝何
在含章殿已虛獨憐何水部東閣只吟渠

蒙陰道上步雪

崑帆奇峯簇馬前紛紛雪舞散寒烟黛橫遠岫明如畫粉貼疏
林老更妍一片素光浮曠野幾層空影落平川相逢誰是剡溪
客把酒尋梅臘月天

菊月五日呂東曙邀遊青山莊步少陵游何將軍山林韻

十首

泛艇青山外莊前臥小橋廊斜常引月峯絕欲凌霄面壁光如
畫臨池影自招勝游期歷盡佳境故逍遙

萬籟從空發秋聲入耳清畫梁纔別燕古木乍遷鶯菊綻淵明
徑蓴香張翰羹幾灣流曲水疑在島中行

小山坳叢桂花重蒂難支滿地鋪金椀盤根浸石池迎風香自

透落日影先知暫憇空亭頂羅衣且散披

中有小山
坳植桂

最愛亭池好環栽君子花葉翻驚鳥雀枝臥走龍蛇遊倦香偏

引詩狂酒易賒依稀蘇學士蓮炬送歸家

中有靜香亭種荷

遠砌羅嘉蔭參差小岫開愚亭臨古柏客社傍寒梅野色隨雲

起秋聲逐樹來但看隔岸影一片碧於苔

中有又愚亭五客社

孤塔身橫嶺雙菴面湧泉老藤常掛網衰柳斷飛綿蟬噪林添

鱗魚驚浪舞錢園亭多勝景獨讓吐長川

中有小塔并水香諸菴

點綴蓬萊界惟聞細草香枕流邀晚月坐磴浴新涼迷客秋跡

興名園烟鎖藏主人愁寂寞山水自蒼蒼

負郭鋤雲頃環邨畜鯉池讀書翻鄴架醉酒倒山羅野趣酬吾

癖嬉游學小兒自來幽勝地清夢影相隨

迤邐西堂外迴看滿苑雲欄杆紅結字石壁粉鐫文途路隨花

指聯吟信口分園林爭餞客但有落英紛

西堂前有長廊壁鐫日新月

白眼長如此青山景奈何阮途應未到謝屐不堪多揮手時狂

嘯移舟復醉歌歸來忘寫繪明日可重過

翌日復偕叔弟同遊步少陵重過何氏韻五首

再理扁舟棹重飛雁足書停樽邀碧月拾翠傍青廬

是日遊樹人頗眾

密無驚鳥橋平有躍魚敲門引從客幾訝是吾居

望苑虹初結穿廊日已移遠香知桂子低唱識樵兒雲擁孤峯石秋橫千頃陂花枝點綴好搖漾在東籬

登高須九日作賦可今時苔繡痕成字泉明韻叶詩獨行尋鳥跡遙眺拂蛛絲邱壑參差畫依稀素所期

靜渚山容小閒門口影長素心存水月世事說滄桑濠濮千層浪邯鄲一枕梁烟霞容我伴早已傲羲皇

頗怪書癡懶窺園禁十年兩遊忘折屐萬斛湧源泉客別青山面溪鳴綠水田鶴枝如可借此日便颺然

詠廬墅采菱五首仍步前韻

野墅方開徑遊訶滿壁書菱花迷水鏡苔碣掩山廬散屐憑雲
鶴邀朋覓鯉魚曾攜樽酒過彷彿舊僧居

蘭亭新訂聚小艇傍花移話久青山老歌傳紅雪兒製衣催楚
棹投杖擬仙陂兩岸喧秋籟清風透隔離

菊叢尋還早菱翻采適時綠波誇左賦紫角綴韓詩嬾步因忘
味知音少色絲烟霞誠有伴茅舍洒襟期

水泛舟橫小池灣漫引長翠紅鋪錦障頭角鬪茶槍桂墅開鱸
宴蘆花寄雁梁倚帆吐珠玉嘯月誦軒皇

岸沙迎落日秋實喜逢年醉飲貪冰笋狂歌奏響泉臨溪獨古
寺負郭有良田黃鶴爭先步巴音博粲然

壽蔣賡廬三十初度

時丁卯正月

玉兔浮光正此秋先看紫氣滿瀛洲
催梅倩點雕弧彩折桂遙
添綺席籌三徑早開宮泮側一杯
留向曲江頭勸君莫怪韶華
迅尙有班生把筆投

丁卯秋叔父偕二弟獲雋嚴君勗以短章六首余亦勉賦
八截藉以言志未足云賀也

玉藥冰輪徹碧窗幾番促席話書釭而今振轡春風裏國士於
家獨有雙

當年舞勺媿芝蘭共博含飴咀劔歡深羨吹簾先奪錦慰令白
髮好加餐

鯉趨日日繞庭前弓冶全憑仲氏賢慚倒芙蓉秋色老斑斕依
舊一青氈

每攜陟屺痛萱花幸護低枝早放葩迴想掌珠辛苦狀淚彈衫

子映飛霞

傳家清白蔭餘休
聯袂齊登花萼樓
早識蚌珠須再索
驂駟何用鷲當頭

曾奪終軍片席雄
十年還自泣秋風
乍看一戰鷲飛去
麟木應難奏蕊宮

雲渡青燈伴苦辛
蟾光祇喜耀重輪
迄今藜炤長安地
夜半書聲少一人

杏園佳色到江城
翽羽先驚雁塔鳴
三世科名終合璧
好乘龍榜嗣家聲

步岳翁來亭陸公有懷堂詩原韻四首

岳翁近築別墅於其先壠之左
疏窗小室幽情逼人有
堂三楹顏曰有懷蓋取諸宛鳩也
製韻索和余媿諸生

遼倒槩泣鉛愁書逋未了烏能詩然自念父母俱存古
人所樂余獨不造萱寢早捐風木淒其終天抱恨且嚴
君正在讀禮晨夕苦塊尤切痛心焉三復原詠觸緒生
悲率爾奉酬聊當鵲啼非敢貂續也

方寸縈愁覺夢遙千秋遺詠句中標深情久歎今人少芳徑偏
逢昨日招壠月伴眠孤閣枕松風吹送小池橈非關雅好離鶯
市敢爲晨昏志未消

堂構於斯已落成小窗橫榻篆烟生拈詩講法如無意種竹披
雲更有情野籟空清堪助寂山花點綴宛相迎瞻依識得悲歡
味陌上臨風日再行

憐余何計破愁城還向天倫自忖營鯉步學趨瞻讀禮鳩鳴習
詠手批評其中真境憑吾造此外虛名任彼爭憶昨暫遊芳草

地方知風味屬清卿

留賓忙自剪春畦且喜泉池傍址棲莫道騷人添逸趣故將真
性託標題傳家待列門前駟卜筮還耽隴上鷗令我情牽頻陟
屺幾回萱寢泣寒雞

來亭丈人豫建壽域志卜遐齡詩以賀之

蔥蔥佳氣萃佳城藉擁岡陵百歲禎早遣牛眠呈福地不封馬
鬣慶長生燈開玉蕊迎山碧酒煖金卮映水深信吉人多遠
策且看海屋已添庚

磊落胸襟傲百城肯隨碌碌羨凡禎幽情早逐松風去曠解還
從杯酒生不向蓬萊探徑遠好依弓冶俟河清會看手琢龍鱗
幹指點高枝遡甲庚

無緣了悟破愁城富貴因人幻說禎業許酒詩娛百歲何妨山

水證三生烟霞攜入深齋暖風月遙觀午夜清未雨綢繆詳解
意憑將心事托先庚

題漁翁圖

古木森森翠壁環垂楊影裏鳥來還漁翁卻傍蘆深處明月空
航接遠山

題本如上人肖像贊

俗也麼僧僧也麼俗公案聽推敲印界應何蹙眼前香如花花
香味誰掬日月看如梭幾嘗織成縠老僧具慧眼合掌還拳足
鑽入無明無味中捫着頭皮原贖禿四大五蘊是耶非臨去秋
波直也曲老僧都不解禪經無句讀水影和月影山邱共華屋
傳神多阿堵形伏神難伏拈花撲鼻香蜂蜜知未熟禪心如化
工點睛添頰增眉目參透畫中人回頭已隔皮和肉

壽舅母龔孺人黃氏五十

長齡白古稱松柏黛葉蒼枝傲冰雪百年常見挺孤貞掃盡鉛
華標勁節任他桃李鬪芳菲幾度春風片片飛獨有南山松柏
在虬龍蟠結世間稀我登南山有所思思將彤管繪冰姿忽聞
王母雲璈曲更逢婺女摘靈芝摘得靈芝贈與誰錦堂懸幌綵
光垂當年誓矢柏舟賦今日稱觴憶畫眉玉樹翩翩娛左右強
爲阿母陳樽酒翹望清秋月一輪籌盈大衍如岡阜人月雙清
誠可羨桂花廳處開瓊讌依稀人在小蓬萊青鳥銜箋聲百轉
樗櫟慚非宅相才鉛槧沈埋笑駑駘欲綴巴詞還面頰祇增惆
悵詠南陔我詠南陔人莫和相看杯捲愁難砂從今瞻拜錦堂
前歸來頻諷蔚蒿篇

己巳夏杪潘斯柔世兄聚首經旬匆匆言別口占當錢

有鳥栖窮林逢秋常鍛翮斥鷃每笑之鴻鵠憐其厄一鵬自遠
來相見如疇昔引吭呼爲羣清風生兩腋勁骨傲凌雲長嘯振
空碧幾回欲翱翔盤桓復朝夕時聆烏悲鳴側耳頻歎惜烏與
訴衷腸羽翮方落魄曩覩鷓鴣飛顧影多踟躕感伊慰好音珍
重來秋役千里求友聲許贈上林帛臨別再叮嚀聞言將腕扼
今日何遄征明月稀星驛搔首問青天天乎眼亦白

題羅子

名

秉乾尊慈苦節像

像手執念珠額戴碧玉

俠骨貞心誰與傳丹青繪出女中仙寒霜歷盡姿逾潔皎日盟
深色更鮮合浦離珠留掌握名山韞璞耀釵鈿憑將辛苦和盤
託慚倒蛾眉有萬千

王中秋杪閱仲弟悼亡諸詠追維往事觸緒生悲漫成數
絕以助傷絃併哭亡姪嗟乎楚客多愁每得斷腸之句

招魂作賦不堪回首之思訴舊恨於重泉行行是淚寫
新哀於片紙字字如癡但些音愴悵未諧雕工笳拍蕭
涼自慙怨亂云

問天奇妒有還無多少英雄此日宰若使文章聊吐氣便將餘
刼付妻孥

三世悲絃總一音年華漸短到如今緣何慣選嬌兒殉鐵券誰
操仔細尋前大母歿諸先伯相繼而
亡于母歿後亦傷一弟

新詩讀罷淚千行聽說閨中心更傷典盡春衫還未了半生辛
苦爲窮忙弟述婦生時食貧
有深痛不忍言者

于歸連步傍青雲爭羨門楣獨缺羣妯娌至今垂淚道未將榮
貴傲釵裙

珍重池塘草色新漫尋好語解眉攣幽明兩地都休痛還勝牛

元正... 月... 日... 歲...

衣對泣人

我祖修文廿載餘玉樓清課近何如曾孫若欲探奇字好叩江

南老教書于大父生時自稱

舊日登堂侍祖姑每邀阿姆隔窗呼于父舊與大母並楹而居可憐金粟松

風裏定省泉臺片影孤

幾番回首痛萱親未見門迎于婦新今日姍姍來地下拜姑還

是少年人

未亡哭姆聽逾悲血淚聲聲叫杜規若遣兒郎尋小叔問伊幼

子可相隨于三弟早夭遺孤亦殤

風絮颺零悼昔年謝家道韞早歸泉余妹未笄而夭嫂姑未會生前面

悄敘寒溫且共憐

西河抱痛我先知長向秋風哭望兒于殤子名望馨小阮去時應作伴

好隨吾母待舍館

記得烝嘗拜跪時笑看穉子習威儀家大人祀先每命諸孫隨後習禮而今摧

斷成行雁何處呼童覓阿宜杜牧之詩小姪名阿宜

人閒染淚寫哀吟曾否秋風爲送音泉下望夫如有句試教兒

讀定沾襟

寂寞雙鳧上帝畿弟將調選淮南雞犬事全非總帷深銷梨花月

只有空梁燕子歸

千里征鞭落照中尙攜小影伴囊空弟爲婦圖小照攜行芳魂果向長安

路應自低頭拜阿翁家大人現

莫猜夫壻少情癡鴛塚于今既有詩未訣糟糠先告我傷心祇

許阿兄知弟婦歿前兩日夜半召醫弟與子徘徊月下顧影神傷卽有斷絃不續之語

又哭亡姪福馨六截句

淒絕嬌兒淚雨濛
總帷扶病哭秋風
靈牀繞遍無尋處
尋向黃泉碧落中

奇字曾從碧巖探
呶陪到死尙喃喃
白雲渡口書聲冷
衰柳依然影碧潭

賸得殘編飽蠹魚
赤文綠字玉樓空
似伊敏慧塵寰少
應向天宮讀異書

怪爾端莊儼老成
孩提一笑比河清
森羅殿上休心怖
還似當初緩步行

北堂留恨向誰論
一去難招已逝魂
弱弟事生兄事死
幽明各伴半晨昏

傷心骨肉墓門寒
宿草淒迷淚未乾
此去夜臺應聚首
爲余一問平安

癸酉天中節前四日夜半哭亡兒保馨

西河疊恨訴誰知此夜湖邊忍痛思轉眼已經成死別回頭猶
記是生離燈前哭影疑非我夢裏聞聲錯認伊寄語九原佳節
近魂歸好共飲蒲卮

甲戌二月之望省視亡兒保馨塚廻憶去年此日余入鄉
讀書兒依依戀別遂成永訣今日墓草已青青矣爲長
慟以紀之

去年此日傷心處今年今日更足悲送客春光依舊至牽衣稚
子竟何之生離再憶當初恨死別新添隔歲思纔向塚邊揮淚
過歸來魂影可相隨

潦到青衫泣路窮暫移蠹卷伴村農嬌雛遶屋追行屐淚眼扶
窗送遠蓬風慧痛伊知永訣無情恨我未從容斷裾壯志成何

事枉酒今朝杜宇紅

最慘臨歧強抱攜低呼小字急追隨

見每自呼保保

隔宵絮絮猶喃語

此刻依依僅鎖眉記得離家旋自悻遙知覓父定如癡三生石上休相負我到泉臺亦未遲

一年底事歎匆匆回首渾如瞬息中渡口層樓猶滯影階前小

草尙留蹤

兒好登樓又好摘百卉

墓烟寂寞籠荒塚曉月淒迷臥短松春

信兩番都幻夢生生死死總成空

和優尼了上人韻

上人系出名門于歸望族閨中林下兩擅其奇俠骨柔

腸獨居其勝風波亭上幾回磨百鍊之銅愛慾河邊一

日破千層之浪俗緣已解慧業都消以憂患之餘生証

空王之妙悟甲戌冬月鼓棹秣陵道過燕子磯特赴寶

山參禮韋馱尊者卽以是日祝髮焉回首昔年芳心如
碎因口占一律備迷其胸中不平之感及再吟兩韻而
悲從中來不覺嘔血已數升矣故其次律至今尙未續
成也余以潦倒文場重來白下登堂拜謁卽出前詩相
示并囑繕書嗟乎紅袖青衫千秋同恨嵇琴蔡拍兩地
關心手錄未終頓觸離騷之句捧吟數過平添洗馬之
愁聊步韻以和歌自方擊筑抑寄懷於同調竊愧效顰
云爾時丙子七月旣望二日

聞道紅顏每不辰千秋閨恨已陳陳風波有日終須盡魂礪無
涯總未伸兒女浮漚原是夢夫妻幻影只如賓空王旣許尋歸
宿好放愁眉亟問津

休恨從前幾度春彼蒼常妒有心人深情早付東流水始信多

才未足珍

飛花四絕

枉教辛苦費天工此別何由返故叢落水露泥判未得爲君珍
重舞迴風

惺忪無奈曉風催抵死空堦去復回傷別有人慵未起又隨蝴蝶夢中來

色香銷盡賸清涼羞逐東風度短牆斷送一春空愛好有何心
緒嫁王昌

地老天荒夢裏身東西未卜去來因不如一片隨流水猶有漁
郎解問津

望江南

脚杯客裏漫尋歡忽憶江南興欲闌小閣夢驚晨罷繡高堂盼

斷午停餐桂曾落子難消恨梅爲傷心未解酸聽說不如歸去
好夕陽山外有遞鵲

家言十章步韻

昌黎曰物不得其平則鳴廬陵又云詩愈窮則愈工信
斯言也屈騷哀怨勝於金馬揮毫賈鵬悲歌善於上林
獻賦耶丙子歲涂月余奉家大夫命省仲弟於石樓官
舍手足相依破涕爲笑隨以家言十章示余蓋吾弟筮
仕出國門時家大夫口占書示者也後有叔父和言乃
昨歲署中所作滿腔憤鬱溢於楮墨閒捧讀之餘愁添
十斛久欲步吟而閣筆者再因念弟以年少科名長於
吏治視我已不遞霄壤卽叔父潦倒賢書十年面壁今
復一鳴驚人矣廻首卅角受書時夜雨燈前曉風窗下

相與促膝伊唔者惟我一人長落坑塹耳薄命至此尙
何言哉三萬六千場無時出夢一部十七史何處開談
然若昌黎廬陵所言則窮莫如余不平莫如余雖不工
亦安得而不鳴也但恐青紫叢中又增一乞相話頭未
免令花城削色矣

小窗螢雪共當年彈指雲泥已判然花縣無端來措大慚余翻
似利名牽

高堂屬望意偏殷音自西歸每色訴我聽深山呼召杜江東有
路可曾聞

一縑定省尙頻揮望斷雲溪子舍依但念長安詩句好應知養
志在無違

少小愁聞萱草名看花此地更傷情生兒薄命都如我珈珮誰

將贈母笄

孱陵昔日撫流亡遺愛瀟湘月影蒼梅杏河邊堪步武絃歌譜

出舊文章

大父昔令公安

梁苑棠陰昨再過青衫仍自愧蹉跎故人若問佳公子引向龍

岡看碧蘿

予自家來沁道出梁園爲家大人舊宰地

作更天涯劇苦辛罄鹽小鑰半隨身可憐九載糟糠婦分俸無

緣枉食貧

琴堂雅韻遍村民課子還攜卷帙新愧我書逋償未了翻將豚

犬累尊人

家大人休休里居課孫自樂

義方苦口藥誠良記取叮嚀戒不獲題向御屏勤誦省章弦勝

佩荳蘭芳

邑有御屏山

傷心日暮阮途賒每聽參衙悄自嗟踏破碧峯花六出勞人旅

夢亦忘家

今春沁苦旱弟刺血書
禱神旋得雨雪連日

題叔父壁閒詩後

時在沁署丁丑
三月望前一日

細雨窗前燈半明疏鐘簾外月三更每將好句頻頻誦欹枕無
言淚自橫

昨夜琴堂送捷書碧紗籠畔燄光舒從今刪卻多愁句賸有牢
騷儘付余

石城官舍同人唱和蕉窗聽雨得林字

雨壓綠窗影愁聲曉夜侵似隨譙漏急不並寺鐘沈點點成孤
韻蕭蕭雜遠林寸心原易碎敢自傲知音

小院籟俱寂輕紗浸綠陰何來十八拍忍度兩三碇節短心頻
數風高響未沈相疑雨珠玉頃刻化瑤林

皖城署中和張中峯年伯

臨去方知聚首難，幾番辛苦亦成歡。
追隨學步拋長鋏，指點文心闢彈丸。
負笈漫思充籠藥，通門自愧遶堦蘭。
天涯離合都如夢，敢學新亭泣楚冠。

廿年心事竟全非，栩栩夢難消。
蝴蝶衣每憶高堂稱執友，相看古道信知希。
匣中劍氣隨雲合，江上帆聲帶雨飛。
此去廳蓬渾莫定，杜鵑休喚不如歸。

客窗苦雨

得殘字

憔悴春光欲度難，更憐春向雨中殘。
一聲河滿鄉心碎，數疊淋鈴旅夢寒。
望裏愁絲渾似織，窗前淚點爲誰彈。
小桃也學人含恨，獨裏香顛倚曲欄。

庭中二桃未放

清明曉發宣城

得城字

銜雨春山送曉行，客中佳節倍分明。
金鋪淺陌黃花瘦，玉碎平

沙碧浪輕松蓋有風吹紙蝶柳簷無絮點啼鶯敬亭四望渾如
醉此日炊烟已滿城

地爐 限韻分詠

不動簾櫳裊篆絲地中依約展風旗薪傳獨仗吹灰易席暖翻
教擁絮遲小屋春深如有腳短窗霧鎖若爲籬可能長吐炎炎
氣悄讀寒爐撥盡詩

暖窗深鎖黛烟絲洞口飈飛似揭旗爲愛洪爐隨地轉不愁曲
突徙薪遲劫灰疑鑿昆明沼春色能回處士籬寫入畫圖渾未
識依稀陶穴記周詩

長安旅舍與大武聯句

南望江南欲去難 侯強將濁酒醉長安子山枯樹名應在 大武阮
籍窮途淚已乾絮被煖知春意近 侯蘆簾破覺夜風寒莫愁半

折新豐劍

大武

長負司空取自看

侯赤

冬夜小集

得嗟字

不是新亭也歎嗟客心如醉寄窗紗強攜竹葉邀寒月爲愛金
蘭逐曉霞澆恨漫勞填海衛洗愁欲問補天媧年來聚散知何
許小小佳音看燭花

長安除夕感懷八首

用秋興
杜韻

戊寅大除浪跡京華驚心改歲瞻 帝闕而日近望親
舍而雲飛立雪依依祇作江城之夢班荆草草都爲萍
水之踪折雁字於天邊填簾誰和憶鳳簫於樓畔綦縞
堪憐鬱鬱今宵茫茫交集偕旦平大武兩兄用工部秋
興韵各賦八首聊作癡鼓之賣耳慚無酒脯以祭之
天外寒鐘徹暮林 帝城車馬尙森森漸來春色遲今夕未去

年華託寸陰紅蠟半燒遊子淚綠醅重醉故鄉心歲除不并愁
除盡賸與山頭憶藁砧

黃金臺上夕陽斜獨對茫茫感歲華萑茨無心常落葉蓬萊有
路未通槎天高雲障千層闕塞近風移一曲笳 聖世不勞諛
頌奏擁衾閒坐酌椒花

南望關山隱落暉不堪暮景更霏微雪憐臥客偏遲至雲妬思
家故遠飛廿載悲秋看歲改半生愛日歎今違雁魚欲問新消
息認取離人瘦與肥

斗轉星移一局棋眼前成敗任歡悲笑人鄧禹知名日送鬼昌
黎失意時幻影總隨殘照盡寒香莫怨賞花遲朔風吹斷江城
夢不斷平生國士思

裙逢青眼是西山爽氣攜來襟袖閒心爲歲寒貪柏酒人如春

瘦掩松關詩囊有祭惟陳淚藥竈無丹可駐顏誰遣笑歌忘永
夕陶陶不讓尹和班

筆戰文壇少寸功評章聲價有無中三年血淚秦淮月一夜悲
歌燕趙風夢短暗吟池草綠心遙小卜燭花紅故園兄弟應憐
我獨向天涯問塞翁

柳色遲遲上陌頭落霞枯樹澹於秋小樓今夜添新淚孤館隨
人說舊愁機錦迴文思繫雁寰瀛歸路夢如鷗江南聞道多風
雪莫見寒衣憶 帝州

天關地軸兩逶迤人事如園平與陂餞臘待沾燕市酒望春欲
借上林枝千山凍色和星滅萬戶輕塵逐曉移落拓自嘲癡未
賣半牀書卷半簾垂

長安送春與大武旦平聯句二首

天許疏狂作酒徒武大借君花管賦三都指閒沸沸開旗鼓旦身

外茫茫問雉盧薄醉可堪輕潑墨赤侯微名不合強吹竽須知此

會真難得武大就裏何人獨向隅旦平

暗覺東風去欲留武大彩雲徐度滯簾鉤三分花氣隨人遠旦平一

寸春陰共我愁天地無情輕作別赤侯江湖有恨亦同流休將此

夕深閨思武大送入燕山塞勒秋旦平

祝李次公

花飄旭日影遲遲正值懸弧初度時仙掌露凝鵲觀御爐香

繞鳳凰池長趨北闕承恩綉近對東籬挹壽卮仗取陽和吹細

草春來早放上林枝

輓韓貞女詩貞女受李氏聘未嫁而殉

俠骨冰心亘古稀殉夫還着女郎衣三生劫盡虛鴛夢一縷魂

隨化鶴飛天上蟠根應有伴人間留珮亦增輝疾風勁草輪闔
閣不羨西山幾葉薇

壽人五十詩

自有瑤池百歲觴韶華方半正流長才名久占青蓮座闕闕羣
推仙李行綺戶春風誇畫錦綠衣旭日炫明璫遙知柏葉添新
綠氤氳蓬萊接九閭

和達儒上人留別韻

厭踏紅塵憶故鄉袈裟鉢杖是行裝一肩明月空如色半枕清
風般若香說法無心花作供苦吟得句錦爲囊看山玩水多禪
趣好滌餘囂入雁堂

庚辰榜後四首

戰敗方知取勝難不關天意好摧殘抱冰悔未因人熱采茵憑

誰守歲寒花樣月翻遲乞巧烏魂顛顛易驚尤此閒那得中山
酒醒後重登舊將壇

奪錦人爭歸故鄉天涯何事絆疏狂雨絲細織愁成片風絮新
鋪淚點裳中酒病深佯薄醉賭棋輸盡怯稱降夜來匣劍聲如
吼夢逐荆高易水旁

春色欺人薄命宜劇憐風景太差池歐陽竄遠生離日謂彭城

謝朓修文死別時謂慈谿冷落花城殘似箨謂懷來翻新刀筆

細於絲一朝衣鉢廳零盡歸燕詩成獨自題

增繳餘生已倦飛君恩似海許忘機玉階應制遭逢盛鎖院
論文心事違不飯王孫甯便死長貧季子豈無歸等閒莫拭華
陰土曾有光鋌動紫微

壬午除夕行次邵伯

纔跨征鞍恰歲除客中風景竟何如亂飛絲勝千門畫不斷金
鏡萬艘居爆竹聲催春雨後辛盤味借市羹餘此行悔未將癡
賣又解奚囊夜讀書

癸未新歲次順河集用壁閒韻

浪逐公車隊囊空腹未便春愁長似織人意薄於綿萍合多知
已途窮欲問天夜來風雨急清夢落誰邊

偕閩中諸孝廉冒雨行次紅花埠仍用前韻

此日悲行路休談腹笥便鶯花雖有約風雪正如綿樹暗遙村
地沙明細雨天青衫拚再濕策馬酒旗邊

尋春得快友相對敢便便裘傲猶經雨情溫不借綿追隨嘶馬
地消受妬花天莫歎增憔悴長安近日邊

和蒙陰旅店壁閒韻

蚤起度平沙春寒覺路賒星疏沒曉漢風細漾晴霞雁宿孤汀
草鶯催上苑花杖頭難買醉隨意品蒙茶

將遊歷下留別閩中諸子

傾蓋成知己天涯有弟兄晨昏長聚首辛苦共關情我自悲歧
路君多悵遠行他年車笠遇應勿負平生

過毛萇故里

距趙州
十二里

匹馬衝泥南望賒毛公故里夕陽斜遙林密翠藏鴉影老屋頽
青障麥花三百詩篇珍小笈五千驛路間長沙停鞭弔古情何
極漫學尋章賦棧車

過黃梁祠見盧生夢像

南去邯鄲
二十里

盧生一夢原來幻何況盧生亦幻身裝點形骸添鬢景標題姓
氏掛浮塵臨川遊戲談烏有肉眼驚奇錯認真玉茗堂中頻喚

醒等閒誰見不癡人

癸未下第赴長沙初夏廿日旅次衛輝見壁閒十七歲女
子貞菴登望京樓一詞清芬沁人心腑馬上口占和之

調寄最高樓步韻

傷心候春恨上眉頭鎮日壓雙眸新巢舊壘迷歸燕
蓑風笠雨聽嗁鳩弔繁華胸魂磊砢山邱瞥然見簪花
題細草朗吟過輕簧如小鳥清淚漬暗香浮珊珊環珮
今何在但教粉壁占風流有心人牢記取最高樓

附原詞

層臺迥百尺最高頭登眺一舒眸山橫淺黛新過雨
陰陰宮柳陋鳴鳩是當年繁華境盡荒邱歌舞地雕欄
埋碧草畫眉處空梁棲宿鳥今惟有亂雲浮頽垣孤月
香魂杳空教才

女弔風流到如今只賸得望京樓

途中寄和內子贈公車六首

傷心敗北理征鑣羸馬蕭然舊草幃春去淚痕曾減未青衫濕
盡已如潮

去越還吳祇浹旬楚天遙別白雲椿

余以壬午臘月自浙返里時家中丞奉命有事楚

南重來惹得鶯花恨兩地關情有夢親

社燕歸栖已過時江南花鳥未全欺獨憐遠向長沙去妾面羞

郎寄語遲

離別頻年冷翠幃食貧常典嫁時衣一囊書劔金釵換愧煞飄
零季子歸

幾得閒情學畫眉遠山長鎖對吟時無端又聽南宮罷辜負心
吞默默期

南北驅馳總浪遊不堪相見話新愁如雲匪我思存久日暮聊
登黃鶴樓

五月六日漢口旅店苦雨

江干蝸舍強停鞭風雨欺人倍可憐竹瓦但聞聲滴瀝蘆牀早
見水潺湲措身尺寸真無地着意催殘獨有天慚愧囊空同趙
壹五陵公子自翻翻

十月廿五風阻皖江和同舟楚黃張子葆文用原韻

縹緲江雲送客舟滿懷離恨逐東流逢君劔識豐城氣愧我詩
殘赤壁秋風浪無端羈皖渡夢魂猶自繞潭州相看不用相驚
詫洗馬由來只善愁

廿六日再和葆文

老樹孤雲插遠天御風無計學飛仙偶從萍梗江頭合時聽呖

晤水上傳抱膝雄心乘破浪投箋詩思湧如泉吳儂一曲慚同
調贈與韓山片石前

廿八日舟次蕪關謝葆文爲余推命

曾弔長沙賦鵬哀愁城難倩五丁開羞灰壯志常如夢悔負浮
名願不才駒隙半生歌當哭江聲徹夜去還來憑君算取窮通
數白眼從今識楚材

甲申初夏徐州李夫子南遊毘陵聚談竟日不勝今昔之

感卽席紀懷呈政

五年前事竟何如幻夢都應付子虛吾道得門終立雪君恩
似海許懸車局棋劫盡輸贏見杯酒澆空碗礪餘卻憶漢家馮
大樹射釣猶願記當初

匠石曾經顧社樗不才空負選輪輿羞餐豚望神仙字悔讀昌

黎科目書壯志有天難
筮卜拙身無計可樵漁
感恩且進尊前酒
萬點浮雲一夕鋤

天賦才情本不羈
破除韁鎖更權奇
龍門筆有山川氣
夔府吟無怨誹詞
冀北風塵千里夢
江南烟雨一帆詩
只愁聖世徵書急
未許嚴陵理釣絲

丈夫何必合時宜
放眼開襟任所之花鳥
不關成敗事江山
長動古今思
王曾溫飽原無志
蘇軾文章舊有知
領取夜闌酬唱意
科名人重是吾師

子先上人訪兄遼陽西歸徐州夫子以詩送之今同游毘陵出詩相示依韻奉贈兼呈夫子

卓帽遺踪安在哉
度遼芒錫已歸來
十香詞弔迴心院
九里山尋戲馬臺
刻韻烏絲分潑墨
停歌紅豆促銜杯
多因棣萼情如

海到處天花爛熳開

甲申九月十五祝玉峯徐年伯母金夫人七十壽

兩世金蘭契結時雲泥路迥倍相思過江門第多賓客入洛聲
名在鼓旗松菊不愁三徑老衣冠猶見六朝遺只今鞠脰行觴
處乍捲珠簾亦解頤

燕許文章擅大名齊眉應不愧卿卿山河象服恩綸重琴瑟
雞鳴雜佩輕叢桂秋深花更好蓬萊人共月雙清憐予陟屺情
何極檢讀南陔但有聲

和姚子生山谿山書屋後詩

甲申冬余赴楚江與生山
同舟出詩索和依韻奉酬

虎邱巖下卜精廬愛看谿山烟雨餘
恰喜經營能匠意不教寂寞子雲居

平生不好步兵厨罵座何當學灌夫
但得山光深處醉肯催明

月上高梧

七里山塘泛艇遲
看花拾翠趁春時
小堂偏足幽棲韻
一幅丹青一卷詩

圖畫天然山外山
短牆繡出古苔斑
更饒異響風前聽
萬頃松濤碧落閒

可中亭外雨聲聽
捲盡繁華入暮秋
賸有千人石頑物
點頭未解愛清幽

一壑一邱非草草
有花有石更彬彬
谿山本色原如許
不放東籬傲逸民

景物寫生詩句裏
風流覲面酒尊前
主人相識不相厭
可許桐

陰一醉眠

余與生山
同舟初面

和洪去蕪兼懷崑霞孝儀庭曙卻寄

蕪城落日大江晨身似颺蓬過眼新萬里寒烟荒渚月一林紅
葉遠山春風低雁陣驚孤夢浪湧漁燈照旅人回首天涯知己
在歌殘燭盡尙留賓

一夕離樽悵別來鄉關極目畏登臺洞庭落木虛無影楚岫連
雲鬱不開蝶夢淒迷江上柳魚書寂寞隴頭梅衡峯絕頂堪攜
句獨寫愁心餞雁迴

江舟長至

去歲故鄉長至好今年長至客中過洞庭葉下空山小江渚人
稀落雁多獨擁寒爐消永夜誰拋彩線鬪宮娥深閨此日應愁
絕添得愁絲又幾何

丙戌新正十二日宿亢村旅店同楚中夏元音李荏洲兩

孝廉檢視行筭舊藁用原韻

連榻郵亭苦漏長挑燈相對檢奚囊温尋舊賦無佳句欲引新
詩有別腸三月鶯花先入夢七年傀儡再登場此行曾戒題橋
筆故態重來笑我狂

丙戌夏日送洪崑霞年兄之任交城

崑霞一字秋山

漢室重郎官唐亦崇大令厥職號親民舉動關民命上檄旁午
來匪令誰與應下情呼籲急匪令莫與請鉅若引千鈞細如蝟
毛迸兼聽且並觀疇非令爲政黷虐不足論闕葺卽深病古稱
民父母痛癢須勤訊撫摩噢咻之時以心相證此任詎易勝斯
名亦難稱百里非大賢予聞常不信吾友秋山子文譽起齟齬
藝圃恣改漁詩苑窮探濬涸倘儻復權奇偶儕罕能競憶得九年
前同駕孫陽乘先後入京師傾蓋平生罄其時得五人意氣堪
投贈旣爲芝蘭交更以金石訂促席雲霞生連牀風雨聽分題

鬪揮酒執卷互批評酒酣耳熱時長歌對短檠咸云非偶然良
會永無竟秋風偏作惡雁羽差池甚相思在天涯相見如電瞬
今年復聚首問君行藏徑卞玉泣三別席珍宜受聘男兒事業
多何必老蟬燒筮仕得交城君才可游刃勿嫌烹小鮮萬里茲
發軔寄語我仲氏堅持冰蘖性車輔宰相依磨礪期就正埴篲
臭味同深交自合并君速飛雙鳧我猶伏攫竽愧無送行物聊
以前言贖

送蔣開泰之任龍溪

丁亥

新捧除書出 帝京徵驂早向五雲迎廣都政績棠陰遠公琰
才名劒氣橫浪靜龍江春有腳風清鶴嶺月無聲懸知仙舄飛
翔近鷓鴣灘前好送行

題畫

一幅生綃寫牡丹天然富貴湧毫端閨中不怕遭時眼少着燕脂也耐看

膩粉嬌紅奪化工引將蜂蝶認花叢豔香肯讓三郎占供奉而今是主翁

得家書有感

丁亥除夕前四日

南鴻頻見送音郵此夕無端動旅愁貧賤未知娛少壯別離空自記春秋三年客夢柔魂結一紙家書遠淚修聞道香車齊過市獨憐人在舊妝樓

家書爲同鄉迎眷入都所寄

壽吉水李夫子四首

聖天子功德隆盛東漸於海西被流沙朔南暨凡擔爵食祿者
東西南北唯所使而不自暇逸固其分也吉水夫子獨
以一身兼之今方位秩宗掌邦禮而奉使懿績烺烺在

人耳目聞傳頌弗絕使於四方不辱君命夫子有焉謹
依四韻別爲四體賦詩以述其事

帝簡鴻才重品題手持玉尺到關西鎬豐人物三秋競秦漢文
章異代齊鎖院於今瞻紫氣石渠依舊照青藜軒采盡藍田
種光映平沙待築隄

典試秦中

秦產之寶精英含網羅入貢空穀函使者還報 天子命 帝
曰揆文唯汝堪吳越自古號才敷改遣侍從窮蒐探視學舊制
迺始復我公銜命來江南選奇拔尤歸冶鑄驅囂滌滓澄寒潭
聲名騰蹕達閭闔黃麻遙拜綸扉參匠伯斧斤及社樑十年旣
廩如分甘蠹魚未食神仙字駕足羞並驂騶駝腋集彙征與羣
雅倒餐蔗尾傳美談

夫子試士後有彙
征錄羣雅集二刻

林林百尺豐碑在謚思

舊德猶沈酣師儒事業壽金石黼黻

聖明文教覃

視學
江左

嶽嶺稱殷禮絲綸賁大東使車清禁出祝版慶雲籠日觀羣峯
小滄波萬壑窮香浮山色翠燎射海潮紅學士威儀肅公侯望
秩崇旌幢過漢時絃誦聽齊風人以文章貴詞因眺覽工皇華
已三賦歸奏履聲中

祭告海岱

聖世重民依民依在稼穡畿輔偶失稔比戶嗟艱食 天子由
已饑發粟俾乃粒疇咨董其事有孚惠我德時公佐邦治稽首
曰臣職單車式遄行周察秋毫析搜剔絕漏卮豆區均手給童
叟爭謹呼簞筥來似織使臣能活我崇朝蘇菜色公曰予不有
再造皆 帝力馳驅歷四方歌思在四國丈夫始生時桑弧蓬
矢執允矣建功名東西暨南北

監賑畿輔

壽平漢凝七十

時令山右陵川縣

紫氣西游接翠微薰風入座舞斑衣山城如畫人烟遠琴閣常

鳴案牘稀爲政心閒應不老乘時吏隱卽知幾梁園舊事堪回首盼取雙鳧指日飛

先生昔與家大人共事睢陽

輓鶴千張處士兼示令嗣瑤典

昨夜春風嘯白楊招魂誰贈返魂香千年漢玉蠹魚在一片秦蟬蝌蚪荒手澤自堪追籀筆家聲早已續縹囊平生訪有韓山石好爲高人表墓旁

壽彭石源太史封君五秩兼賀太史歸娶

太史乘龍新卜日椿庭方屈服官年鯉趨晝錦君恩重鳳吹瑤臺吉事駢坐看璧人雙進酒初陳榛贄特加蓮江湘咫尺笙歌沸不數蓬萊有洞天

題李蕭仞斷腸集虞姬圖

縱橫楚漢爭秦鹿成敗誰先卜佳人有眼識英雄願得翠裾長

缺侍軍中 重瞳本是虞苗裔 垓下天亡耳妾身 薄命不如騅

早試樽前一 劒謝君悲

右調寄虞美人

夜半重圍聽楚歌 拔山豪氣頓銷磨 君王膽壯猶如此 嬌怯裙釵可奈何

叱咤暗鳴萬眾驚 帳中底事淚縱橫 應知絕世風流種 能便英雄百感生

亭長圖王畧地東 鴻門玉玦恨無功 傾城早判身先死 肯逐俘囚入漢宮

老雉羞嘗置楚軍 厠中人彘更奇聞 虞兮直得將身殉 劉季何曾庇細君

送王衡山年友之張秋別駕任

十年前與衡山友 懷鉛挾槧東西走 十年之後見衡山 版鋟頭

銜身縮綬驥足追風軼等倫遭逢特達眞非偶衡山自視猶欲
然初服心期殊否否憶昔論文角藝時揣摩利器推君右琢成
美玉鍊良金篇篇膾炙同人口力挽烏號中疊雙拖紫紆青亦
何有富貴逼人不自由毛錐安用長株守瞬息三遷大郡僚君
才小試新硯剖治中別駕古所尊豈類折腰米五斗男兒事業
須早圖射覆文場似窠藪半生局促轅下駒不惜千金享敝帚
夢回酒醒竟何成蠹食神仙空皓首羨君萬里奮鵬搏愧我一
經老甕牖燕市狂歌送故人君着鞭兮我擊缶

宋射陵雙壽

南極星明映少微長天寶婺更連輝銜盃日就青山醉舉案還
從白社歸千里驂騑爭蹀躞滿庭蘭玉報芳菲鹿車手挽同心
久今日雙栖笑綵衣

雲開海屋喜添籌白鶴瑤笙下十洲不羨據鞍稱鬢鑠但看緩
帶足風流書勳自昔標銅柱憲老於今賜玉鳩簪笏成行斑綵
戲賞心應勝赤松遊

送李九近修歸試西江時卻扇未久卽行

戊子六月

翩翩公子別金臺窄袖輕衫曉騎催應是蕊宮呼姓氏火雲飛
擁上蓬萊

烏衣燕子欲高騫王謝門庭誤後賢記取話深相努力烟樓十
丈已居前

書上賢能亦等閒憑君賈勇戰當關筆鋒況有新傳授橫插還
如畫遠山

綺閣縫裝色色工鴛鴦小枕繡當中臨行好乞金針度花樣今
年自不同

玉樹亭亭骨欲仙前身多分是青蓮虹霓早趁江心釣今日科名愛少年

風送滕王決勝遊天香收拾已深秋廣寒也只人如玉莫再聞尋十二樓

不才師門感舊知三年唱和等填箎此行珍重凌霄翮早寄泥金慰客思

惆悵離亭折柳條春明門外馬蹄驕相思紅豆都休託靜聽寬裳喚六么

李九近修卻扇未久歸試西江旣以詩代餞復見留別原唱依韻戲答

合歡枝上葉田田棲宿鴛鴦未半年懊惱秋風偏妬甚別教月姊羨鈞天

弱筆爲鋤硯作田菅騰消損不知年舊時憔悴秋風客今日乘
槎欲上天

凭肩私語畫闌西獻賦休教五色迷新試戰場非浪說君才應
獨騁驕嘶

行行徙倚暮雲西情到深時轉似迷羸馬亦應知惜別幾番回
首又長嘶

二載前經返故鄉灞橋折柳思茫茫這回不似當初別未唱陽
關已斷腸

風景從今認異鄉歸心離思兩茫茫春明門外千條柳盡是行
人九折腸

勻將蘭蕙豔文心着意攀花祝到今從此繡窗添晚課月明香
鼻拜深深

幾人同調復同心無限離情說自今三疊陽關數行淚不知情
思爲誰深

出古北口

絕壁摩天抱 帝京危墻插嶺鎖邊塵當關不用千人敵扼塞
長依萬里城日月蔽虧戈甲冷風雲擁護鼓鼙清巖疆自古山
河險眺望於今獨太平

三公主府

穹廬深處聳瑤宮形勝居然上國風帝子有家開朔漠名王尙
主視侯公山如城郭連雲黑天近林巒照日紅驚觀 宸游供
帳盛繁華寢已遍寰中

送海甯許夫子致政歸里

仕宦本浮雲進退乃大節始進必以正其退亦剛決一疏獨知

止高風千古絕吾師欲追蹤拂衣辭九列巖廊與江湖處之如一轍不愧大雅稱伊人明且哲

起家自儒素整鹽風味足設帳授生徒南北羣推轂見知名公卿氣節相敦劬一朝登玉堂堅志守初服屢掌文章柄秋月寒潭浴從茲簡帝心祕宗竚枚卜遭時方急流浩然懷松菊

服官秉素心臨財不苟得入領少司農釐剔靡遺力一芻與一粟誓無秋毫匿如何漏卮發翻射舍沙蜮雖逢寬網恩短章自陳劾聖明鑒其衷慰諭俾就職終以欲全名引年思去國豈不戀闕廷臣心實隱惻

江東多枿梓工師過繩尺中有櫟社樹一顧辱匠石輪囷不適時散才甘擯斥送別江之湄相對深憐惜更貽詩一縑期奮桑榆迹今也竊微名長可侍几席先生早乞身寸草春暉隔永懷

國士知其敢負疇昔

有弟亦知書爨應童子試兼經叨賞拔幸免子衿刺昨歲始掇
科立雪程門侍硜拙不見嗚謂可琢成器去後聞師言遺書遠
相示師歸過毘陵趨拜當不棄吳越一葦杭典型時仰企知己
何日酬扁舟重問字

驪歌日漸促吾徒增悒快颺然出國門一樽誰敢餉離別難爲
懷贈言當祖帳芳草助行色驛路繁花放臨歧重丁甯加餐自
頤養松石可盤桓琴書足怡暢因風問起居示我長無恙

題海甯許夫子讀書秋樹根圖

投簪何事愛吾廬皓首重尋舊五車石逕盤根攤素卷讀書還
讓老尙書

三十年來宦業隆經綸元在一編中從今林下閒披誦追憶寒

窗午夜功

千年老榦欺冰雪萬卷高吟避俗囂
占得深情居勝地肯將心跡混漁樵

何處山中小有天幅巾藜杖意翛然
松風不減濠梁趣讀盡南華第幾篇

經術傳家費揣摩積金爭似積書多
奚囊檢點青箱本細認丹鉛舊偃波

伏櫪曾邀國士知春風絳帳繫人思
畫圖省識橫經處他日雲亭好問奇

趙襄萼公贖藁卷第二

浙江書局刊

張大昌校

姚煥校

張景雲校

蒲裘萼公贍藁卷第四

男侗敦謹編

詩二 己丑至庚子

恭賦

御製萬壑泉消夏千峯翠作秋

勝境供臨眺天然景趣幽縱橫羣壑會高下眾峯稠落澗泉多
韻凌空翠欲浮噴珠還戛玉拄笏復凝旒似灑簾前雪如看陌
上樓淙淙寒月碎澹澹曉烟流歎熱全教退新涼頓覺留風翻
頻送暑雨洗更宜秋地與塵囂遠人將歲序遊道兼仁智者山
水亦相謀

恭賦

御製俗尚非交讓官箴乏協恭

禮讓稱淳俗寅恭號盡臣無爭由教化有善必咨詢皞皞風斯

古師師誼自親器凌獨吳會積習在官民觴豆猶攘臂冠裳易
反脣誇多還膝麗好異益趨新接膝成冰炭同舟似越秦何當
文物藪祇汨利名津悔訟殊虞芮宣猷愧召郇閭閣需表率廉
法可陶鈞誰任封疆責難求經濟人 天章垂訓戒拜手敬敷

陳

農民苦行應制

萬物勞形莫自佚惟有農民最堪恤終年力作在西疇苧蒲襪
襖無休日枝頭布穀早催耕家家負耒攜鋤出炎雲滿天日當
午汗滴禾下泥蟠膝枯槩軋軋四野聞饑餉往來人影密安得
年年盡有秋新畬舊畝齊刈鉶我稼千倉復萬箱酬爾勤劬開
百室冬日務聞猶未閒于茅索絢龜手疾似茲辛苦誰繪圖田
家樂止什之一 聖朝宵旰念民依寫入豳風與無逸

南苑校獵應制

宸遊飛鳳輦講武晾鷹臺風動施羅尉炎飛淨草萊三驅王者
禮七校羽林材劔挺霜花落弧張月影開清風先騎輦靈雨洗
塵埃帳殿龍媒繞旌門雉尾來畫旗雲漠漠組甲雪皚皚殪兕
殷朱轂驚鷗墜綠苔頒禽三面獲獻壽萬年杯數獸分熊掌烹
鮮割豹胎乳茶傾玉椀桐酒注金罍饒吹喧千里歡聲溢九垓
時政周史記作賦子雲才瑞靄凝雙闕傳呼警蹕回

鏡水雲岑應制

近水遙岑交映鏡光雲影相涵平開一片皎潔亂點長空蔚藍
鑑洗獨澄秋月霞披常對晴嵐天然別苑圖畫佳處全憑靜探
咏鳥鎗應制

自昔五兵皆利用火攻祕製更稱奇颺飛翻覺彎弧拙機發還

嫌踏弩遲迸落金丸隨電掣驚摧霜翮帶星移凌虛致遠真無
敵別有聲威震九達

嘉禾雙穎應制

嘉穀標奇瑞人占大有年綠疇駢穗聳紫陌結苞鮮含露枝偏
秀如雲影獨妍衢謠嬉鼓腹歲歲戴堯天

賦得一日看徧長安花

行徧長安綿繡鄉宮花新染百花香士林淺翠凝朝露夾道殷
紅襯夕陽載酒不愁人跡遠尋春肯惜馬蹄忙東皇爲報芳叢
盡閒逐游絲繞建章

冒雪訪巖湖先生行帳次韻

招尋暫駐曉行驂碎踏瓊瑤興偶酣但識齏鹽無俗味略傾肝
膽已長談天涯知己惟君在山鬼欺人只我堪相對塵霧淋漓

盡遠峯螺髻雪花簪

和世南先生早發喀喇和屯扈行

萬乘三驅道阻修岡巒盤鬱盡神州羽林曉發塵都洗毳帳寒

新酒倍讐

借用史記

嶺外馬蹄稠欲織霧中山影暗如樓揮鞭每念

君恩重貧病還堪說壯遊

時余抱病

和南湖先生熱河傲寓詩

雲山皆舊識几榻是新居退食權銷夏遲眠爲檢書月移簾幌

近花浸膽瓶疏佳句饒清賞知應愛此廬

題荔枝佛桑圖呈湯院長

駘奇長憶南州樹倩寫輕綃記土風荔子垂垂香豔處扶桑相

映一枝紅

佛桑本名扶桑

朱華欲奪摩尼燄丹實爭凝絳雪光何必無雙聲價貴佛花端

不讓神漿

和塞上紀雪

詔下期門早鞫鷹五更風雪乍奔騰
鑾輿駐蹕看霏玉虎帳
休軍暫釋冰笛落梅花聲浙瀝山飛柳絮影峻嶒一朝解網長
天霽塞草烟橫待月乘

琉璃河橋鐵柱擬應制

互水長虹鐵柱擎波心依約一篙橫
洪鑪鑄自何年月作鎮千秋未得名

佛手

金碧纍纍滿洞庭如來指掌幻成形
不知接引人多少祇見年年樹色青

素馨

靈根疑自廣寒移細刻冰盤綴綠枝性愛晝炎酣短簞花宜晚
吐亞疏籬看來白哲梅應妬摺得清香菊未奇省識畫圖憐獨
賞碧紗明月寄相思

扈從塞北詠懷

年來望斷大刀環客夢猶披戲綵斑一到蓬瀛迷去路兩番射
獵許隨班君王未肯毛錐棄風雪仍餘襍被還欲寄衡陽峯
下信塞鴻難過萬重山

何妨戴笠伴乘車平野連帷勝比閭縱少琴尊陪語笑尙攜墳
史恣畋漁大官賜饌傳餐後御幄分鮮罷獵餘共沐恩波慙
素食祇堪咄咄向空書

年年半載著征衣鎮日閒吟對翠微絕塞風雲天路近故園泉
石素心違書生汗馬功何在旅夜驚鴻夢卜稀蒲柳望秋叢百

感但看霜卉已先腓

熱河中元

商飈纔拂上林枝又是孟蘭設會時塞外清秋光欲滴山前圓
月影如歆燈燃蓮葉金波轉花落經臺梵唄遲爭看中元新景
象太平物序總相宜

徐節母左氏

巾幗有奇姿任俠同夫子破家因結客壯心猶未已慧眼議英
雄慢賢叱羣婢醴酒偶不設恐失天下士翟門張雀羅所天抱
沉痕典衣侍湯藥裏創糜十指傷心未亡人有孤何敢死祝融
偏寸椽從容勿遽徙急命負遺像存亡誓相倚造次顛沛中堅
毅每如此孺子露頭角家聲頽復起門多長者車視之良益喜
留賓咄嗟辦宛與疇昔似好客世其家內治惟終始苦節世所

難交道今如市青青歲寒松成蹊勝桃李吁嗟孟嘗與鄭莊丈
夫之倫奚足比

送宋蘭揮乞假歸省

歸騶忽整向鳴珂豈爲蓴鱸寄興多 聖意本憐思岷岫 主
恩暫許問烟蘿東山絲竹娛斑舞睢水綸竿伴嘯歌我亦庭闈
虛覲省送君西去羨如何

於今詩價重綿津五老丰姿獨有神

杜祁公致政作五老詩社於商邱

三徑龍

孫叢孝竹千秋人瑞指靈椿忘憂館邃陳書富文雅臺高得句

新忘憂館文雅臺皆商邱古蹟

牀下頻年空仰止鯉庭還乞代吾申

弔李靖忠公暨子孝穆先生

陟山南去是君家烟靄蒼茫水一涯底事斜風春柳外年年先
放杜鵑花

絳帳先生戰北門誰憐春草綠黃昏荒原收骨惟孤子日哭祠
堂望返魂

獨歷崎嶇負母尸寇鋒不犯事尤奇一門步武成忠孝萬卷傳

家自得師公有祖遺
藏書萬卷

死生餘恨總銷沈青史難鐫一片心只有太華峯頂月廬江直
照到如今

何孝婦詩

賢哉何家婦盡孝難其愚姑病不可療痴心猶踟躕願天願身
代中夜獨號呼救姑有神方那復惜肌膚割股入藥錫手刃血
模糊柔絲喘息絕九死乃一蘇天性既激發鴻毛視捐軀砥俗
賴斯人巾幗而丈夫

祝某總戎壽

應湯西崖
先生徵

堯天甲子歷方昌，瑞靄凝來畫戟香。
綬帶風流推素望，雅歌節奏應清商。
要知聖世干城寄，端籍耆年韜略長。
南極一星臨旭旦，文昌初宿有輝光。

史記天官書文昌宮六星，一曰上將。

送嶧令楊世兄之官

天香滿袖捧除書，墨綬銅章發軔初。
花縣春風輕拂旆，嶧山甘雨快隨車。
何愁枳棘非賢地，早喜弦歌近聖居。
孔李通門情不薄，敢推庭訓勗懸魚。

熱河行宮應制

天闢靈奇境，山圍沃野平。
千峯佳氣聳，萬壑瑞烟橫。
景擅神皋麗，風來絕塞清。
高涼銷溽暑，宮苑飭經營。
位置因天巧，規模不日成。
宸遊常駐輦，睿賞更怡情。
所樂惟山水，那居有棟楹。
土堦唐帝法，卑室妣王程。
解阜薰苴奏，吹漁典籍盈。
不須彫玉

瑱何事起金莖隄遠荷香靜亭閒蘚迹輕微颺吹浪皺細雨過
沙明魚唼吞花影鶯呼振柳聲小橋通畫舫曲嶂列層城不數
西泠勝方知蓬島名 聖懷彌暢悅 帝德自安貞惠及鵷班
末叨隨 鸞輅行大官頻賜食供奉許登瀛湛露三秋滴清風
兩夜生冰心期不改願借玉壺盛

送商邱宋太宰 予告歸里

天中嵩嶽何巍高靄雲布濩祥風翺蔚生名世光聖治華髮功
成冠六曹安車一旦辭闕下 宸衷繾綣溫綸褒羣公祖帳東
門道敷陳歌頌斟香醪憶昔開府江左右袞衣繡紱揮旌旌章
貢澄波曉色靜吳淞樂土春心陶武帳不聞借頗牧文園有會
皆卿舉巨手經綸整以暇江天鎖鑰聲無噤銓衡重寄下 內
詔望隆省眼誰能叨表率官方兼謹潔疏通典則精秋毫還朝

三載掌邦治山公啟事猶勞勞 聖明顧問常歎異矍鑠是翁
如俊髦時行時止合天道遂返初服觀莊濠彈琴百衲快閒適
理帙萬軸蠲噉味道直堪追孔卓鏤詩亦足當韓豪羨公心
賞樂何極不數絲竹催檀槽殷勤報 主情未艾相門接武多
鳳毛公卿袞袞世可嗣緒如繹繭抽長縲吾徒時願覩此樂籃
輿肩舁從公遨尙有蒼黎翹首亟冀爲霖雨流恩膏

題畫蘭贈同年孫漢瞻

九畹同根思舊譜一叢入畫見新詩但教護得幽香在發放秋
風正未遲

和毅菴先生初度韻

家慶應開畫錦堂偏聞塞笛弄伊涼人因愛日驚添歲天又新
秋悵各方無酒自酬青鳥使有詩還寄白雲鄉我生百感期相

近余小先生一歲而初度僅後七日 極目瀟湘月似霜

題西君畫

柳帶秋容草帶烟拒霜風骨澹逾妍涉江欲採津難問指點灘
蹤鷺影邊

頌曆

鳳曆遙頒紫禁中五雲深處瑞烟籠千官拜舞三呼肅一統直
書萬國同奉朔有天知日暖授時無地不年豐太平樂事歡聲
溢共祝 皇仁造化功

同年楊祇文祖母陳太君節壽詩

武陵閩閩冠重湖苦節偏鍾女丈夫纔得吹簫辭鳳侶未曾返
哺失鵲雛竹枯幸有孫枝茂蘭茁全憑勁草扶八十餘年芳躅
在手攀綽楔效嵩呼

庚寅七月題西君畫牡丹翠竹圖

徐熙風骨文同筆翠點寒梢墨作團爲愛此君瀟酒甚澹妝國
色與盤桓

洛陽豪貴鬪穠姿獨洗鉛華意態奇梅叟當年原有句竹陰水

照更相宜

聖俞牡丹詩竹
陰水照增顏色

壽定州王閣學太翁

雄才舊望壓幽燕甲子初周祝大年自是神仙娛畫錦不將姓
氏上凌烟堂前綵舞蓬萊地階下花承雨露天咫尺沙隄迎紫
氣德門流慶正如川

恒嶽千盤擅地靈虬松老幹自亭亭蔭培玉樹依鸞掖森列蘭
枝步鯉庭四葉人占星象聚三台座接衮衣馨 聖朝爵醕推
隆禮攬盡春光醉醲醑

瑞應寺並蒂文光果和兩院長原韻

嘉名自叶 天章瑞珍味應資佛力融聯映奎躔誇藝圃雙檠
珠顆出琳宮筠籠早上蓬瀛島綵筆今推燕許公好就新詩占
吉兆絲綸並掌紫垣中

題楊總戎紀恩圖

虎拜承恩御苑游芙蓉香裏漾輕舟看花不借春風送近水彌
知 聖澤流雪藕冰桃頻摘賜雲隄芳楮許遲留他年麟閣丹
青手認取身曾到十洲

塞外對月和韻

極目羊腸可若何偶然對酒復當歌清樽邀月知朋少好句貽
人得和多幸有雁羣來朔塞總如蟻夢到南柯愁心欲借冰輪
洗映取恩光太液波

月在今宵得幾何那堪絕塞起悲歌驚心但覺秋容老過眼空
憐夜景多網脫免兒能擣藥斧餘桂子易成柯廣寒不比人間
事瀉盡清光委碧波

獨對良宵喚奈何強爲吟嘯未成歌披雲只恐雙清少掬水方
知一勺多恩重大官頒玉饌警分細楷熟藜柯九天早奏霓裳
曲不借銀橋萬丈波

淒涼此夕更如何羈旅年年獨寤歌一似清輝圓日少幾番佳
節別來多碧天水浸迎霜草翠嶺烟迷落葉柯欹枕無聊成短
夢月明又照洞庭波

花月詩

小庭月浸淨無塵低亞花枝點綴新月似戀花偏窈窕花因媚
月更精神平章月色花香品珍重花前月下人憐我未酬花月

債舉杯邀月伴花身

月當初上晚涼侵花是將離動客心綽約花魂流月影澄鮮月
魄護花陰好花覲面誰賓主明月窺人自古今惆悵花晨同月
夕獨招花月訂知音

瑞紅鳥

雙棲小鳥戀芳藂彩翰天香瑞正同色借朝霞凝宿雨影分夕
照怯秋風羽毛許附丹山翼飲啄何辭白鴿籠世上漫誇名字
好一枝先占畫圖中

壽東平王母薛太孺人

丙戌進士
王坦祖母

獨歷冰霜八十年完貞全孝兩堪傳柏舟有賦悲黃鵠馬鬣誰
封泣杜鵑辛苦將雛珠作樹清芬絲鬢玉如仙 聖朝表節由
來重緝楔高懸碧漢邊

月冷霜清浸碧天歲寒松柏久忘年山河象服傳家貴門巷烏
衣恃母賢有婦冰心還步武生孫健翮早聯翮恰逢愛日椒觴
暖引得春風入管絃

塞北口占

秋高塞迴景蒼涼斗帳荒原擁小妝浪皺輕羅千嶂雪寒侵薄
絮五更霜馬嘶遠近人聲亂燈火高低夜燒長每聽曉鐘眠不
穩宮門早啟駕驪黃

曹母顧孺人六十節壽

縹緲仙人姑射峯滿身冰雪對寒松鏡翻雲鬢孤鸞影夢斷金
閨化鶴蹤子建才名初卓犖大家風範自春容霞觴此日添春
色闔苑笙歌隔幾重

壽吉水李右上六十六

辛卯六月

尺丹成百歲觴
黃周花甲算逾長
才名世豔清平調
閩人推柱史
藏綺戶薰風披畫錦
綵衣旭日耀明璫
遙知水碧荷香處
氤氳蓬壺接九閭

甲子初週介壽觴
翠巖玉井吐蓮芳
佳辰獨取鵬搏息
永晝偏宜鶴算長
天上盤根推鉅族
人間珠樹侍高堂
百年三萬六千日
六數相乘正未央

壽洪崑霞太夫人

紫泥封下五雲邊
壽母承恩華祝年
鶴髮康強宜象服
鸞章燦爛映魚軒
黃堂治績慈幃訓
彤管徽音奕葉傳
此日稱觴先拜頌
鸞鳴環佩謝堯天

賀安徽廉察楊宜君

帝簡才名掌外臺
遙瞻法曜映三台
風清雁代屏藩峻
雷動江

天榮戟開桃葉水深明似鏡
雨花烟暖馥如梅使君德政應相
匹看取庭槐次第栽

賀偏沅撫軍潘書原

學士承恩建節旄先聲雷動楚天高
文章舊價推冰鑑苗黍新
陰望雨膏預識威稜齊富范敢期約束視蕭曹
聖朝欲試調羹手祖帳何人解佩刀

題宋強齋倚竹圖

強齋辛酉舉於鄉乃家大夫所得士也哀然解首強齋
無喜色旣而十上公車不第亦無愠容余閒與晤對見
其靜氣溢於眉宇有浮雲富貴夷然不屑之意司鐸雖
水將一紀矣寒瓊冷帳左圖右書暇則以詩自娛其訓
士也力行教化董課以時薰其德而善良者益眾歲辛

卯以報最來京師余復相見於邸舍襟懷沖澹絕不異
曩時更出一小照示余修竹萬竿綠陰如幕科頭衫服
擁石攤書不必作阮家青白眼而笑傲之致可掬蓋不
惟肖其形并肖其神矣屬余顏曰倚竹圖余不工書倩
同年徐子壇長題之而余漫爲短句綴其後

森森萬箇碧琅玕直節虛中耐歲寒不是知音誰結伴雙清心
跡畫圖看

天寒袖薄獨精神瀟洒風標迥出塵水竹有心相映帶永嘉詩
句是前身

壽周福寧鎮

凌烟閣上有誰儔黃髮威名播九州澹泊武侯惟羽扇風流叔
子一輕裘閩疆自近蓬山界虎帳常聽海屋籌更羨鴛鴦棲玉

樹斑衣遙舞鳳池頭

恭和

聖製春寒梅遲

癸巳正月十六日

韶光早屆看梅時寒勒東皇放萼遲
萬點碎瓊凝黛幹一枝小
玉鎖烟絲月移瘦影人初覺風過含香蝶未知
取次上林開似雪陽春已布九天詞

恭祝

萬壽詩

雲開閭闔日中天臣庶嵩呼
玉陛前三月三春方履泰六旬
六甲正乘乾軒皇厯算周初度
夏后書疇錫大年盛事直超千
代史拜颺敢進九如篇

天經地義蘊 皇衷六十年來孺慕同
手定鴻圖兼創守心承

家法每謙沖 三朝謨烈光千載萬國尊親奉 兩宮大孝德
隆膺上壽虞琴長是播薰風

五紀垂衣化日長太和元氣本無疆蠲租分歲周星野解網回
春滿棘廊天自好生 君合德 帝惟仁壽曆增祥龐眉白叟
霑恩久傳語雲孫戴 聖皇

至治光華與日新健行不息體天真敕幾陶鑄唐虞典游藝窮
探河洛津旰食宵衣時傲揚 龍章鳳質倍精神由來壽考推
無逸喜卜吾 皇億萬春

物阜民豐久化成 深宮保泰更持盈尚衣浣濯頻供御玉食
珍奇盡卻呈祇爲 聖心常惜福可知儉德是長生海籌添值
歸餘歲餘慶年年介壽觥

昇平典禮煥丹青 手詔重頒戒百僚愛 主但將忠孝盡祈

天惟在雨暘調 君王不尙陳諛頌草野何能祝 聖朝聽取
同聲呼 萬歲微臣珥筆採衢謠

壽同年王枚孫母甯太淑人六十 癸巳十一月

堯天甲子正舒長華祝筵開畫錦堂壽母於詩稱燕喜坤元在
易贊含章山河象服 新綸寵門巷烏衣奕葉昌恰值黃鐘初
應律蓬萊佳氣接春陽

賀陳荀少職方榮卜新阡

鼇峯鬱鬱有佳城堂斧規模手自營山互太行雄地脈河分底
柱壯寰瀛朝元五氣星躔合 堪輿家以五星歸垣
爲五氣朝元之局 拱木千章雨
露盈坤德歸藏宜吉土發祥蘭桂振家聲

陽城闕闕迴無前攬秀鼇峯起墓田山水縈回眞勝地烟雲擁
護別開天帳穿疊疊千絲繞珠貫纍纍百琲圓 堪輿家以穿帳
層疊爲百珠攝

走多事之月五日多下
三
局富貴逼人，多輻輳青烏，誰是識牛眠。

題友人小照

萬疊烟嵐萬頃波，萬花深處掛藤蘿。一竿自得濠梁趣，何事寒江買釣蓑。

天然圖畫出天都，黃海霞光映日鋪。箕踞科頭盤石上，奇觀收盡錦囊無。

壽吉水李母姜太安人七十

尚書門第由來貴，壽母樽觴此日開。七十上齡逾甲子，尋常行樂勝蓬萊。花迎掄翟新恩重，露浥蘭蓀舊德培。遙望春暉頻拜舞，西池霞氣映江梅。

壽陸質翁七十

新孝廉陸榮程之父

金風玉露報新涼，東閣筵開介壽觴。入洛才名人似舊，過江門

第世宜昌蚌胎早吐珠雙顆鶴髮仍攤書一牀喜值華封三祝
歲堯天甲子正悠長

壽楚撫劉玉翁六十

晴川閣上響雲璈瑞靄遙凝畫戟高節鉞威名齊斗極江天鎖
鑰靜寒濤恰逢獻歲看麟紋更喜承家有鳳毛甲子一周期未
艾年年春色醉仙桃

壽兩粵制軍天翁六十

風清百粵鎮南天斗極光浮檠戟邊一攬海山皆壽域三遷節
鉞甫耆年箕裘奕葉承恩舊棣萼連枝得氣先望重吾宗稱
愛日喜吹玉律暖華筵

題邵甘來小照

調寄滿庭芳

小小茆亭綠楊深處蕭然名士之家圖書滿案老樹蔭周遮箕

踞科頭獨坐青眼對疏竹幽花風流甚東陵遺派山畔課鋤瓜
堪誇早摘就一筐寒玉五色團砂是邱園經濟泉石清華消
受詩狂酒渴何須倩琬液冰芽偏愁絕瓜期至矣爭許戀烟霞
壽賈奠坤太夫人七袞

堯天華祝曆方長壽母筵開戲綵堂天上恩榮餘愛日人間樂
事應韶陽成名令子能歸養步武文孫並擅場爭羨瑤池仙咫
尺珠湖春水正汪洋

壽癸己孝廉王佩璉太翁壺園五十

堯天甲子曆方長處士纔稱半百觴愛日當年勤菽水吟風夙
志見羹牆鯉趨獨授兼經業鶚薦先傳一瓣香遙憶江南春色
好枌榆介壽滿槐堂

甲午七月二十日恭和

御製賜浙閩總督范時崇詩

世胄策勳銘夏鼎 天章褒德念周楨
黃扉遠記從龍業 青史長垂仗節名
兩地山川留舊愛 一門旌鉞見雙清
南行拜誦君王訓 忠孝傳家益矢誠

甲午八月初七日恭和

御製賜予告提督馬進良詩

虎符初解佩麟閣 有餘威 恩賁雲霞札
功書日月旂歸輶 秦樹近華袞 御香微
戀闕丹心在 猶時理鐵衣

題西君先輩呈太恭人萱花海棠白頭圖

墨妙元無價 承歡更有情
花陰餘愛日 羽族亦嘉名
毫素天真露 庭階淑氣生
北堂清賞處 點綴小蓬瀛

和西君自題畫蘭卷

故園風景寒梅落後有芳蘭領受催花雨春透檀心看絳舌垂
垂微吐小亭臺靜香斜度 自來京國紅塵荏苒別芳姿十年
修阻乍展輕綃見無數花魂飛舞宛江皋故人重覩

所南遺韻縱橫墨掃儘天真爛熳神軒舉滿幅清芬早引向湘
汀沅浦肯低迷艾蕭爲伍 美人千里同心臭似折芳馨憑誰
寄與寫入冰紈穩教免當門鋤去謝東君是花盟主

壽同年王庭曙太翁丞右年伯七十

十五年前得良友金蘭氣誼周旋久長安邸舍每聯牀歌呼祖
張且擊缶相憐丈夫遇合難親老家貧心事負期以顯揚報所
生丁宦努力常在口我於甲申過眞州登堂拜翁再稽首是歲
翁已登耆年開筵命酌禮意厚湖海胸襟山岳姿笑彼局促轉
下走興酣揮翰亦揮弦吟風弄月窮奧藪方知家學有根源幾

見松柏生部婁彈指流光又十年天涯兄弟仍聚耦爲言翁年
行七十翼鑠豪彘尙如舊森森玉樹滿階除荀氏八龍將進酒
道遠何以侑一觴敢述素心爲翁壽

恭和

御製賜將軍潘育龍詩

宿將威名任統戎 宸章寵錫勵寅衷月明漢壘清刁斗風勁
秦關響角弓邊戍謹傳 天子詔 聖心歷記老臣功承恩不
數凌烟畫虎拜雍容白髮翁

恭和

御製賜將軍吳英詩

酬勳 天藻遡當年渡海何須造鐵船戰捷澎臺銷蜃氣威行
甌越洗狼烟到今彈壓三山靜此際恩榮百世延報道將軍眠

食健 九重南顧更訢然

題杜紫綸畫卷

深情聊寄小山詞雙燕偏留花落時但取傷春莫傷別司勳刻
意總相宜

長安花事悵迷津墨雨猶能洗麴塵豆蔻春風新得句可應添
作畫中人

一卷新詞百斛珠蘇黃骨格柳秦腴卻教寫入丹青裏覲面風
流似得無

賦得三十六宮都是春應制

乙未正月二十四日

八卦機緘本渾淪化鈞獨運滿乾坤一陽初動天心見萬物咸
章大義存炭入洪爐憑冶鑄梅開雪嶺識寒溫此中會得羲皇
意到處春光有妙門

庖犧奧義費研摩六六相乘卦畫殊卦本象儀因有數以乾一
至坤八
位數合計之畫分奇偶亦同符八卦奇偶之畫合地中雷起陽
得三十六初動天下風行陰漸敷識得循環生意在乾坤隨處是洪鑪

春歸應制乙未三月廿九日

三月春將盡清和欲屆時綠濃楊柳渡紅綻牡丹枝南陸行躔
近東皇返駕遲試吹姑洗律已向管中移

題蠟梅山茶圖

隨意花枝有化工色香全在寫生中何須更著丹青筆渲染冰
天試曉風

題阮少司空羅浮香夢圖

敬亭山前溪水綠羅浮峯尖積羣玉兩地梅花真鉅觀百丈冰
雪消塵俗先生家在敬亭閒舊遊訪勝羅浮巔寒香細嚼心脾

沁故交新友相忘年三十年來掛胸臆逸情長共烟雲逼月明
林下清夢遲特托丹青記疇昔師雄幻事那足誇寂莫春風問
酒家何如先生調羹之妙手眞賞不負山中花

江城五月落梅花應制

乙未七月初五日

五月風光似早春落英霏雪滿江濱爲聽玉笛聲中度一曲清
香洗俗塵

笛聲縹緲楚江隈長夏能教春色回料得知音人獨解曲終還
有暗香來

西君前輩奉 敕畫羅察白茶依韻題

青蔥寫入素綃寬種自西蕃進大官 御苑結根成玉圃嘉蔬
清味勝龍團 君王菲食心怡賞學士揮毫勢鬱盤題尾愧無
山谷句摩挲猶作菜畦看

乙未八月恭和

御製餞大學士李光地暫回閩省詩

綸扉翼贊藉鴻儒辭闕承 恩念弼謨幾載私情今日允十行
御札自天敷效忠父子同金石論道 君臣合節符拜誦 帝
歌應悚惕莫虛 聖主望征途

余旣從諸臣後恭和

御餞安溪夫子詩但率爾應制未暢所懷因依原韻再賦四章
聊以言志

千載宗風閩洛儒十年相業禹臯謨身經百折心難轉道際三
陽氣自敷宣室屢前 天子席平泉暫謝令公符此行端合先
民矩豈視合衡作畏途

賢相名高君子儒仰承 主德效臣謨宣勞久以股肱竭論道

獨將心腹敷三九年華成宦蹟夫子自言戊辰迄今歲周八千
驛路速郵符門牆下士偏惆悵立雪空思賦載途三九中間遭際亦分三節

忠愛天成命世儒一生拜獻盡嘉謨雲雷屯險才堪濟霖雨昇
平德式敷輔相自能通易象折衝何月讀陰符 君王念舊彌
恩眷撫手丁寧戒遠途

身任斯文闡曩儒體裁渾噩繼三謨榕村制藝傳燈遠鹿洞遺
編講席敷知止善隨時序退辭榮遙見德充符不材社櫟從繩
削敢負心期廢半途

恭題

御書松風二字乙未八月十七日

龍虬天矯鶴清標吟唳乘風下碧霄謾謾聲從毫素過森森影
向壘池搖韻高天籟三冬足筆走雲濤萬壑朝一自 奎章揮

洒後卷中長聽奏咸韶

恭題

御書任年華三字

乙未八月

鸞箋才展墨華浮 帝揭三光照九州
筆轉洪鈞看獨運 心通造化與同游
人閒甲子春常在 天上星辰歲迭周
妙道盡歸宸翰裏 年年長聽海添籌

恭題

御書時靈光

乙未九月十三日

乾象昭回星斗麗 天書揮洒鳳鸞翔
燄光萬丈浮箋碧 靈寶千年護墨香
魯殿昔聞延壽賦 藻宮今見紫宸章
巋然人在雲深處 日繞爐烟侍玉皇

題蟠桃圖

度索山頭桃爛熟，緋囊翠帶自交妍。玉堂寫就丹初轉，御筆題成墨正鮮。地接仙都原咫尺，花開歲歷記三千。羨他春色年年，在長占陽和雨露天。

過雙蓬山和前輩諸先生

山頭怪石影穹窿，雙立平開似短篷。蒼翠縱橫千疊浪，烟雲離合一帆風。連檣鳥道疑爭渡，掛席虹橋欲躍空。應笑愚公移未得，松濤吹送任西東。

題魚戲落花圖

嫩綠垂楊水一涯，小桃斜倚鬪芳華。笑看雙燕驚風處，下有遊魚戲落花。

平池新漲色如藍，魚鳥親人趣獨諧。若許烟波浮一葉，消他春思在江南。

恭和

御製上元前二日立春詩

丙申正月十二日

韶光先映九華燈
臘盡輕寒氣尚凝
莫砌未全舒曉葉
玉河應漸泮春冰
堆盤生菜嘗新味
翦綵爲花讓巧能
喜值芳辰瞻睿藻
青郊火樹小豐登

送董人中世兄之官蒲州

除書新下五雲邊
治譜遙從三策傳
蒲坂山川風近古
蘭陵閩閱仕逢年
優游政績同河潤
瀟洒清心理瑟絃
早播循聲夔峽

去高堂西顧一軒然

時夫子任川東監司

賦得禪房花木深

精舍多幽趣
芳菲景更幽
幾重花影散
一望樹陰稠
逕逐香風轉
人逢暇日遊
頻教屐齒折
隨地足句留

五
十

聞
浩

事
日

龍
山

香
由

筆
心

興
好

處
影

薰
同

綢繆報國情襪被自甘冰暑冷蓋棺方信玉壺清汲將泮水供
芹藻尸祝高風起後生

祝王松岩六十初度次自壽詩原韻二首

松岩名猷其子鎰於酉君前輩家

處士高名久蔚然門前多轍蘇成羶說詩休上人精舍飽飯文
申子薄田無意朱顏尋藥駐有時青眼對花眼庚申底事通宵
守甲子行看過歷年

江南野水樂閒鷗嘯傲靈鷲白髮秋靖節琴書清興在尙平婚
嫁素心酬能超世網觀三昧自足天機息百憂聽取枌榆齊進
酒夜闌忘却數更籌

題酉君前輩畫熟蟹

丙申十月

畫蟹畫生難畫熟今看蟹熟宛如生要知火候工夫到湯鑊蓮
花信手成

三三三之三三三三
三
螯跪分明絳雪鋪此身端合轉丹爐讀殘爾雅知名久不怕江
頭誤蔡謨

香稻早輸膾白玉桂薪初鑄殼紅銅箇中風味難描寫分付詩
筒與酒筒

送彭閣學館師遷葬回里

隆時爲臣易終身孺慕難豈不戀 闕廷所懷在故山堂斧繁
夢寐方舟下急湍大河清且泚少室幽以寬自是還鄉樂猶餘
憂國顏臺閣馭歷久恩重志行完夙心抱朗朗月映千峯寒
文柄頻在握冰鑑羅琳瑯目空四照閣身上百尺樓感人惟素
惻遇物若虛舟 帝簡掌絲綸肄士臨瀛洲曾隨執經末勗勵
準前修方期金甌卜旋見華簪抽勇退古所難全名復何求吁
嗟典型遠嵩高路悠悠

和西君前輩自題墨菊

雨沐風梳曉露餐菊花初放桂花殘黃金散盡憐無色搗就元
霜換錦團

詩中有畫畫中詩摩詰前身定不疑卻笑丹邱新意好青城學

士代題詞

見黃鎮成
墨菊詩

蕭疏墨暈吐芳葩依約柴桑處士家昨夜白衣人未到緇塵先
染隔籬花

漫傳服食便通神寄語南山採摘人好時花漿堪入硯畫來原

是此花身

好時出墨菊
汁可作書

金紫紛紛品若干獨尋三徑舊盟壇松滋新博封侯貴招隱同
時並拜官

老圃秋容取次成一枝曾映御袍明墨池換得新顏色鐵面應

加柱史名

骨傲清霜葉葉攢輕烟如幕影團欒羞教鄂杜繁花見函谷封泥請一丸

送李吏部卓菴乞假還蜀

銓衡清望接三台休沐承恩晝錦回吏部文章新閱閱西川風景舊樓臺耽間豈爲葺鱸好掃徑還將松菊開最羨兩番羅玉筍春明祖帳競銜杯

輓鄭母席夫人

生來巾幗傲鬚眉景仰慈幃令母儀琴瑟靜隨君子御詩書珍重後昆貽秦樓玉碎驚新夢蜀樹鶻啼感舊思會見馳封賁泉壤好憑輿論記豐碑

牡丹詩

灼爍朱英照檻妍朝酣國色畫中傳自矜富貴無雙豔共羨團
欒第一仙晴日烘開天正午晚霞簇上月初圓鞠場鬪采應驚
絕翰盡人閒白打錢

大紅毬

遊戲南華夢化時舞衣栩栩洛園枝晚來露濕愁飛倦雨過苔
侵欲蛻遲金谷樓前身綽約綠紗窻外影迷離莫教鳳子驚絃
扇一入花叢雨不知

綠蝶

姚家種占洛陽春金粟如來現化身風格正宜歸淨土光明端
不受緇塵折當繡佛香爲供繪出天花筆有神謾道法輪空色
相一枝曾映御袍新

佛面黃

一點胭脂巧染成宛然纖指落紅輕可憐芳印年年在最愛香
痕片片明天寶記中傳異事仙春館畔賜嘉名太真手澤終難
問留與詞人助寫生

春一捻

平頭千葉鎖春光

牡丹譜左氏家千葉
紫花亦名平頭紫

疑是緜封出尙方蜀國

綺裁新結束武都泥裏舊縑緜楊如佩去香塵冷李賀攜來錦

句長占得風流詩畫在花王應傲紫微郎

紫羅囊

壽維揚程蝶莊封翁

壽富兼居五福先錦堂圖畫總天然心閒計范經綸遠手老鍾
王格力妍況有星辰誇聚德何須甲子記生年雪深門外人多
少咫尺春風勝遇仙

再送館師彭閣學

十丈紅塵汗漫游幾人廊廟憶林邱雲梯月窟難飛步雪浪風
帆易放舟獨守素心招壠鶴早還初服狎波鷗歸招載得君
恩重不羨當年萬戶侯

臺閣丰裁仰大方志惟報國有文章春風鎖院掄元手

甲戌丙戌
先生

分校禮闈兩科殿元皆出門下明月錢塘選士場先生視學兩浙千頃澄波懷叔度一

緘垂露識孫陽栽成桃李尋松菊清興應隨化日長

壽侍御吳篁村太夫人七十

鍾郝芳聲自昔傳獨兼五福引萱年繡衣新耀萊衣綵彤管重
揮銀管編景讓垂魚遵母訓伯鸞舉案似賓筵可知咫尺神仙
地家在瓊花后土邊

賀東昌守楊元統

三刀政績鷹褒擢五馬風流號世家棠蔭祖孫相濟美 楓階
父子並升華承恩不數崔門戟接武應囀衛氏駟指日鋒車還
報最滿庭金紫燦雲霞

甘忠果公新祠詩丁酉三月應 滇紳士徵

峩峩廟貌享明禋六詔謳思舊事頻血染戰袍臣力竭名垂汗

簡 國恩新重臨飾鉞俯華胄永勒鐘彝啟後人峴首碑前清
淚落千秋直道在斯民

免胄交綏膽氣豪將星欲墮陣雲高一門殉節同茲日前路降
旗笑爾曹自是素心存馬革誰能授命等鴻毛於今堂構重輝
映子孝臣忠荷 寵褒

和宮詹前輩蒸詠

御製木紙扇

丁酉五月

輕勻如紙色浮空削哺

見後漢書

生新造物工七寶雕裝形未肖九

華裁製體難同清涼髣髴亭皋下文理霏微水石中本是 聖
朝楨幹器幸供磨斲奉仁風

薄於紈素滑於藤刻木神皇見未曾鑲月尙疑柯影動流風猶
帶樹香凝光搖雲母分千片巧上天孫更一層開闔陰陽歸掌

握不勞塵尾獵癡蠅

壽楊孟班曾大母陳夫人九十初度

冰霜何皎皎松柏何菁菁
厯歲不改柯苦節原可貞
根實滋以茂枝條發其英
武陵女丈夫宇宙閒氣生
太邱傳淑範相門百兩迎
間寢潔滌滌舉案就布荆
無何失所天矢志比程嬰
辛勤抱遺雛雛長復喪明
世事值滄桑蝴蝶與沸羹
子婦皆不祿婺緯淚縱橫
兩孫待含飴形影嗟零丁
繫母兼怙恃森森玉樹成
初賦柏舟詩二十葦未盈
險阻實備嘗炎涼幾變更
朱顏已白首鬢眉罕抗行
誰爲闡潛德韞璞光晶瑩
家君撫南楚拜疏請特旌
賜金建棹楔里閭兀崢嶸
文孫我同譜飛鸞振家聲
曾孫及吾門弱冠登蓬瀛
母年今九十謀以介壽觥
因語母曾孫造物猶權衡
母操如冰霜冰霜久逾清
母節如松柏松柏無彫彫

榮歸然峙靈光萬古綱常撐君家一綫脈保障夫人城後昆加
培植爲母增令名轉盼百歲坊永表 盛世禎

恭題

御詠暮春絡緯圖次韻

丁酉九月

蟲聲占物候催喚續筐盛又見蠶眠箔還隨鶯囀笙穿花雙翅
濕栖翠一枝平 睿藻敷仁育披圖感好生

送孔象九之官常山

新捧除書日月邊拊循百里正需賢家承北海饒經濟地接西
江藹誦絃競巧繭絲窳政拙紛來案牘費精研鋒車看騁驂
足前指康莊快著鞭

題畫

滿天風雪行人少遍地瓊瑤畫景多最愛柳州詩句好江山清

絕一漁養

竹色山光萬翠叢
合江亭上雨濛濛
楚天無限蕭騷景
盡在生綃片幅中

天門前輩河上竣事將圖南歸和原唱以送

浮空幻影一杯蛇
顛倒人生亦有涯
松菊未荒元亮宅
圖書猶富惠施車
憑將白眼爲嬉笑
賸與青山自咄嗟
淒絕客中先送客
春風不帶舊栖鴉

冥鴻休慮弋人多
矧繳驚心隙駟過
甘讓名場推傑子
閒尋勝地問貧婆
蠶叢已歷崎嶇路
鷗夢仍遊浩蕩波
我亦無官歸未得
獨依鷺棧聽驪歌

曠達常師阮嗣宗
賢勞暫學鄭司農
隄頭竹箭平千尺
岸口桃花束幾重
畿甸經年秋汎穩
故園此日臘醅濃
歸心已逐江潮

去酒社詩壇任合從

三世交親非泛與十年聚散不堪論
寂寥舊雨憐恩地珍重家風嗣
相門磨蠍同宮齊遇劫七羊歧路
黯銷魂何時搔首青天外雪盡鴻
飛沒爪痕

送江蘇觀察李鹿山

戊戌三月

久瞻福曜臨吳會再拜新綸約漢
章冰上吏行遲夏日鏡中人在潔
秋霜于公德種高閭駟召伯恩流
聽訟棠節鉞還期依故履江天長
見袞衣光

塞外遙哭亡兒佺徵

彼蒼何事酷吾兒萬遍沉思杳不
知轉眼已驚成死別回頭還記是
生離悲來祇在尋常處痛定難逾
十二時淒絕塞垣孤館暮吞聲彈
淚洒涼颼

分手恩恩思黯然臨歧送我更纏綿也知半載難爲別誰料今生已絕緣汝歿吾纔聞汝病吾衰汝不待吾年斷腸欲斷傷心淚須到他時會九泉

此身踪跡等浮雲百事憂煎賴汝分願我清貧謀典貸愁予疏懶代辛勤行裝歲歲封題密家問頻頻慰藉殷今日不堪開篋見相逢如夢泣斜暝

探得金環識故吾再來人定不模糊淚書猶漬前身骨癸酉之春次子

保馨傷余以愛緣未割滴淚和墨書其臂是秋在兒生知卽保馨後身也孩笑疑還舊掌珠初度命

名哀鞠子兒小名環馨家大人所命取羊叔子故事彌留訣母怨將雛兒臨歿呼其母云母爲我

兩世娘矣今三生石上精魂在兩世情緣解脫無

尚欲活我耶
追隨大父廿餘年左右依依劇可憐布被褐裘教屏當書籤卷軸付排編每聽曉漏驚先起常伴寒宵竟不眠短折未終娛老

志哭孫雙淚日潺湲

題西君前輩墨畫十二幀

戊戌七月

貌得飛瓊閨苑還銖衣雲珮態閒閒
韓湘金碧非三昧梁廣丹
青祇一斑未破蒼烟迷曉髻
盡收紅雨淡春山天香彩筆連城
價誰是豪奢買玉顏

牡丹

攬盡穠華夏景深東籬芳信到牆陰
參差晚節愁無色漏洩秋
香別有心三徑琴尊應預賞
重陽風雨不相侵更憑換骨神方
力好時花中仔細尋

六月菊終南好時出墨幽

弱態低隨宛轉歌烏江遺恨未消磨
祇今花亦知人意自惜虞
兮柰若何舞勝風前楊柳細
淚分雨後海棠多青陵怨魄堪同
調寫入輕紈伴楚娥

虞美人
蛺蝶

素質凌寒迥出羣山茶色態亦平分
寫生直欲欺冰雪繪影何

妨寄墨雲二妙尹邢元不妬雙清樂衛有餘芬花魂若肯相招

引夢到羅浮日未曛

梅花山茶

叢桂香殘菊未開漢宮秋色影蒼苔綃痕薄皺蜂鬚卷錦片斜

尖燕尾裁芳徑平扶樓洞館并刀纔落滿亭臺蜻蜒款款花前

舞知爲通靈筆墨來

剪秋紗靖健

最愛芳名火齊同

呂靖韻集珠也

半含蓓蕾嫁東風品香暗麝湘

簾外選色幽蘭澧浦中

樂府集沅澧所生花春黃不如秋紫

一自淡粧能絕代不

須渲染更窮工分司御史休狂語錯認新花是舊叢

玫瑰

狼籍春紅憶海棠別開柔豔占秋芳嫌將玉手脂添暈倩取金

壺汁洗妝擊露一枝迷蝶夢合波片影謝蜂忙偏教織女花間

宿宛轉鳴機慰斷腸

秋海棠絡緯秋海棠一名斷腸花

細葉纖條蕊更柔濡毫著意寫風流氤氳香沁猶存舌領略春

深欲點頭科斗未成三古字

花似丁子故一名丁子香

芭蕉同卷寸心愁何

人妙解連環結惆悵花前憶舊遊

丁香

蓮花今日開生面證果前身誦法華東土墨塵剛幾點

見法華經南

塘秋色已無涯靜看影淡高賢社遠挹香清茂叔家翠蓋紅妝

詩句好品題未必稱名葩

荷花

誰將墨雨酌花神點染雞冠別樣新報曉幾曾誇絳幘驚秋何

事戴緇塵朦朧纓冕元知幻黯淡容顏已逼眞若使養成能似

木寫生還問此花身

雞冠

秋到園林多豔冶金鳳飛來小立桐陰下五色九苞明月夜吹

簫人在曾同跨誰搗元霜和露洒染就雲翹點點輕烟掛鳳

子亦知尋隊也分明一幅丹山畫

鳳仙蛺蝶寄蝶戀花調

萬尺篔簹獨擅名洋洲一派屬彭城若非成竹胸中有那得寒

稍筆下生庭院珮環聲細靜瀟湘烟雨意分明繞枝蓮蔓心如

鐵翠袖修篁識此情

竹鐵線蓮

又題墨筆蓼花蝴蝶

寄想滄洲下筆遲疏疏紅蓼兩三枝可知明月寒溪景未是先
生賞鑒時

蝴蝶雙雙趁曉汀尋花逐隊幾曾停蓼蟲獨自知辛苦卻笑莊
生夢未醒

又題墨筆虞美人

綽約腰肢黯淡容帳前歌舞賸芳踪多因淚洗胭脂盡冷落烏
江第幾峯

麗景芳叢百卉妍此花偏在柰何天漢宮春色今同盡休再啼
紅學杜鵑

戊戌六月徐編修亮直奉使琉球國冊封索詩贈行以長

句送之

帝簡鴻才柱史班手擎黃誥降中山天吳浪東蛟龍伏渤澥
波搖日月閒聖代恩榮宣海國使臣風采動人寰徐陵詩思
平生健賦遍蓬瀛載筆還

銜命辭朝章服新旌麾曙色映麒麟樓船夙戒遲天使衣
錦先還拜老親正是捧觴爲壽日真成將母作歌人長風萬里
歸帆穩何似京華十丈塵

壽奇木公太翁七十

戊戌九月廿三日誕辰

天宇秋高玉露霖大椿蒼翠自亭亭蔭培珠樹依鸞掖森列蘭
枝侍鯉庭白社久推通德里華顛遙映老人星東籬正滿黃金
色攬取芬芳醉醪醴

西君先生貽余松竹梅圖系以長句并索南湖學士和章
寓意規勉讀之喟然次韻請正兼呈南湖先生

輪囷怪物無定駐神山離合視風雨誰爲寫生尺幅聚化工之
筆推虞山輞川錦江伯仲閒貽我墨妙了不慳蒼松偃蹇齧峭
壁疏竹寒梅並傑格怒發槎枒如轟霹更有長句繫此圖飲醇
不用黃墟沽摩挲識得深情無淨生羽草棲輕塵歲寒耐久有
幾人可共冰雪惟此君不材只合供題鳳栩栩亦作莊周夢幸
依廣廈無折棟

壽同年鎮江葉刺史

鴻才 帝簡重蕃宣崧岳鍾英本自天上相功名門閥貴外臺
聲望口碑鮮澄清鎖鑰雄三郡揮洒江山富百篇咫尺蓬萊榴
火豔金焦峯下聽薰絃

己亥五月四日爲佺兒周年忌辰余行永昌衛道中馬上

口占哭之

夜臺一去忽經年往事追思更黯然鍾愛偏伊逢短命臨歧獨
我隔遙天靈牀此日陳蒲酒客路誰家索紙錢贏得風前千點
淚滴將沙磧寄重泉

贈陝西制軍鄂朝宗

關中鎖鑰寄元臣半壁全湯氣象新威鎮邊疆資武庫道弘儒
雅擅文人召周德業風詩在韓范勳名史策陳拭目衮衣膺
帝寵漢家圖畫有麒麟

贈王仲山扇頭詩

襟懷如海氣如雲戎馬場中獨見君盡日春風吹四座幾年時
雨徧三軍運籌沉默隨機應磨盾從容草檄紛紜聽邊庭喧凱

奏漢家麟閣待書勳

題張參戎仁趾九日舉二子圖

將軍好武有奇功射得雙鷗恰兩雄應是國香同日夢偏教花
萼並枝紅弟昆早叶重陽會震坎何勞再索宮圖入丹青爭豔
羨可堪誇示女元戎

庚子五月解餉八里坤事竣回入嘉峪關初四日將抵酒
泉值亡兒佺徵大祥忌辰馬上口占哭之所謂長歌之
哀也

汝亡歲兩度我淚未曾住去年逢此日哭汝涼州路今年今日
又慘淡邊關暮欲酌汝一觴椒漿不能具欲焚一陌錢囊空紙
亦蠹祇有淚千行風吹落濛霧人生如轉轂死亦如電逐奄忽
屆大祥妻孥將易服汝常憂婦病嬾今安且淑星命犯孤鸞紅

絲錯繫足朝朝啼總帷此日舉家哭汝子亦漸長出痘無災毒
嬉戲曾祖前聊可解頰頤婦攜拜靈几拳曲學蒲伏我雖隔天
涯遙臆宛在目亡者去日遠生者悲日續孤櫬棲空房長夜誰
伴宿猶得撫棺號譬汝卧牀褥終當歸一坏便永離眷屬行行
記疇昔軍中夜飛雪擁枕發長嘆乍夢與汝訣朦朧是耶非但
痛汝天折哀慟呼我兒驚醒聲未絕涕泗尙交頤淋漓漬衾席
知是汝魂來顧我勞行役我本厭人世况復居荒域雪霜上顛
毛塵土和羹食傷心事更多豈能久視息顧汝乞冥司不生亦
不滅黃泉無歧途相見還相挈入關重徘徊悽愴天中節再哭
汝忌再長歌邊風四起胡笳裂

祝胡洛思初度

旌麾坐控酒泉郡弧矢連輝南極星蕭相勳勞垂史冊鄴侯功

德在生靈恩波千里長渠水公爲民開水利塞內外心地雙清
雪嶺屏霞瑄黃鍾方應律滿城歌吹祝椿齡

庚子八月初十祝綽撫軍

長庚燦爛碧天遙
棨戟祥光接慶霄
勳並蕭曹垂竹帛
名齊韓范入歌謠
櫓槍夜落牙門掃
鞬譯星羅玉塞朝
怡喜中秋佳節近
滿城絃管奏雲韶

答田霖蒼

貞巖太守寓齋晤霖蒼
恂恂儒雅眉宇閒
有英氣余心賞之
勗以卒業辱長句示慰
依韻奉答

筆落烟雲思湧泉
肯將榮達讓時賢
誰能相馬驪黃外
漫看爭棋黑白先
老我風塵投契少
多君氣宇賦才全
相期終奮垂天翼
證取南華第一篇

庚子初夏于役軍前宿邵仲南新構齋中卽景漫成四絕
一入蕭齋意洒然塵埃不到紙窗前誰知戎馬喧囂地別有桃源小洞天

茗椀香爐棐几橫膽瓶花影映窗明壁間一幅秋山畫似南山色更新

松石亭亭小砌中開窗如見碧山叢簷前鐵馬爭馳驟助得清音趁曉風

天涯到處是蘧廬信宿身疑在畫圖應識軍中多整暇經營斗室見規模

庚子十月初八日祝毛竹菴五十初度

昔年沂湘江神交衣帶水杖策來從戎天涯適萃止相逢非所期把臂驚且喜多君意氣深悃悃露眞摯念我客邊庭羈縻一

無倚芻米與糞鹽瑣屑爲布置一日如三秋命駕頻省視追述
司鐸時中丞禮顧異拂拭苜蓿盤品題瑚璉器感激國士知至
今縈夢寐邂逅天作緣宛若見昆季藹藹肝膈談我聞每心醉
維楚固多材如君乃杞梓負此干霄姿行將蔭百里驥足騁康
衢發軔自茲始掀天揭日功等閒丈夫事志趣各有尙要在垂
青史方當服政年利涉無涯涘並看雙鳥飛良會恐不易持觴
陳素心輒以介壽祉

趙裘萼公贖藁卷第四

浙江書局刊

張大昌校

姚煥校

張景雲校